

Aposel

Yesuyen Mere Basan Marte Meten

¹ Be, Tiofilus, nebe Yesu megen gar hinhinya daha mat meten ten hinhin, irde al saba yirde hinhin goyen hanƙapya gogo kan gunmirin. ² Irde kamyinde mat huwarde komatmin yingen basina yiryin mar goyen Holi Spirityen tarende hulyan yiryin gote baranya Al Kurun belen tumulgan tike hurkurin goyen gote baranya manan asan goyenter kamirin.

Yesu belen Holi Spirit nin doyan henayin yen mere basan marmen yinyin

³ Be, Yesube nurde hayen gwahade goyen po, al belen mayke ulin misin kurun katen kamyinde mat huwaryin. Irdeb, “Gwaha timekeb nenen fufinde huwarun gago yen nurnayin,” yenbe komatmin yago dilinde forok yen mere yirde hike dilinde wor po kenen hinhan. Be, kamyinde mat huwardeb nanƙahal 40 gayen megen gar hinhinya goyenbe Al Kurun belen al doyan yird yird mata nin komatmin yago goyen mere yirde saba yirde hinhin. ⁴⁻⁵ Be, go ten hinhinya goya goyen po komatminya gabu hen dula ten henyabe gaha yinyin: “Adone belen det dunen yen bina tiyyin goke momon dirde hinhem gobe Holi Spirityen baptais. Ningeb goke doyan hen hinayin. Yonbe fe belen baptais yirde hinhin gega, denbe hitnen tenbe Al Kurun belen Holi Spirit po baptais

diryen. Niŋgeb goke teŋbe aran ma Yerusalem tubul teŋ kunayin,” yinyin.

⁶ Be, Yesuyen komatmiŋ yago beley mere go nurde kamereb Yesuya Olip dondonde gabu irdeb, “Doyan Al Kurun, bikken asininin yago beley neŋ Israel mar doyan dirde hinhan gwahade goyen gayenter ge beley wor kuruninin hen doyan dirke igin megeninin neŋ Israel mar beley tumulgan titek we?” yen gusunan iramin.

⁷ Irkeb wol henbe gaha yinyin: “Nanne beley mata forok yenayin yen sanjininde nalu yirtin gobe dufayminde po yirtin geb den beley nurtek mon. ⁸ Gega den nurtek detbe gago momon diren tihim. Holi Spirit den hitte katke tareŋmiŋ teŋbe alya bereya Yerusalem taunde niŋya Yudia nanare niŋya Samaria nanare niŋyabe megen kurun gayen bana nin mar ne beley mataya mereya teŋ himeke nenen hinhan goke tagalde tukun hinayin,” yinyin.

*Yesube Al Kurun hitte mulgan hen hurkurin
(Mak 16:19-20; Luk 24:50-53)*

⁹ Be, mere tiyyin go kamereb komatmiŋ beley dilinde wor po kenen hikeya Al Kurun beley tumulgan tike hurkurin. Irkeb gagap beley bana kerkeb go ma kenamin. ¹⁰ Irdeb dilinbe Yesu hurkurin beley gon po nankenen hinhan. Irkeb al irawa amil faykekde umna titin gore gor kura mat wayhar minmon, bemel po ketalminde forok yen huwardebe, ¹¹ “Mel, Galili mar, danin nankinde nankenen diltin misiŋ teŋ han? Yesube diltin mar Al Kurun beley tumulgan tike hurka kenhan

al goyen kamebe gwahade go po mulgañ heñ wayyeñ,” yinaryum.

Matias belej Yudasyen gasuñ tirin

¹² Be, go kamereb Yesu komatmin yago gobe Olip dondon go tubul tenbe Yerusalem taunde mulgañ hamin. Olip dondonde mat Yerusalembe 1 kilomita gwahade. ¹³ Be, mel go Yerusalem forok yeñbe ya yeñ hinhande gor kwamin. Ya goyenbe al heñ heñ gasuñbe irawa hende bande niñgeb, yeñbe hende hinhan. Be, mel gobe hinhande gor hurkamin. Go mar gobe Pita, Yon, Yems, Andru, Filip, Tomas, Batolomiyu, Matiyu, Alfius urmin Yems, Yems urmin Yudasyabe Saimonya. Saimon gobe Roma gabman asogo irde hinhan mar Selot buda goyen bana niñ al. ¹⁴ Be, mel go hugiñeñ gabu irde dufaymin unkuñeñ po irde Al Kurun mere irde hinhan. Bere buda Yesu gama irde hinhan goya Yesu kulin wenya milin Mariaya manañ bana goñ tumñañ heñ Al Kurun mere irde hinhan.

¹⁵ Be, 120 al gwahade Yesu niñ dufaymin tareñ iramin mar goyen Pitaya hugiñeñ gabu irde hinhan. Be, wawuñ kurareb Pita belej huwarde gaha yinyiñ: ¹⁶⁻¹⁷ “Be, kadne yago, nebe Iskariot niñ al Yudas niñ yewen tihim. Yeñbe Yesu belej basaña irde meten unyiñ. Irke nenya tumñañ meten teñ hinhet. Gega yeñ belej Yesu maytek mar goyen belej kerde yunke kuñ Yesu tamin. Niñgeb al gore mata buluñ gwahade tiyyeñ yeñ bikkeñ Holi Spirit belej Dewit dufay unke mere Al Kurunyen asande katiñ gobe gayenter fudinde gwahade po forok yiyuñ,” yinyiñ.

18 (Be, Yudas mata bulun tiyyin gote hora belenbe megen tapum kura damu tiyamin. Irdeb megen goyenterbe yingen timiyyin. Irkeb bin pol yeke araynen fur tiyamin. 19 Irkeb al buda kurun Yerusalem hinhan gore mere momonmin nurdeb naña tapum gobe Akeldama inamin. Akeldama gote minbe 'dari wok yitin'.)

20 Be, Pita belen sopte gaha yinyin: "Al goyen goke Al Kurunyen Tikin Asandebe gahade katin hi:

'Yende tiyunbe bulun hen dulnen hiyen. Al kura gor ma po hiyen,' yitin. *Tikin 69:25*

Irde Tikin Asande gor kurabe mere gahade manan kayin:

'Yen wolminenbe al hoyan kura gasunmin go ten meten tiyyen,' yitin. *Tikin 109:8*

21-22 Ningeb katin gwahade goyen po gama irtek yenbe al kura Yon belen baptais nin mere tagalde hinhide mat kun kun Al Kurun belen Yesu tumulgan tike kinyin al goyen tenbe Yudasyen gasun wol kertek. Al gobe nenya tumnan Yesu gama irde kun wan ten hinhet al gore gab nenya henbe Yesuyen mere basan al hen Yesube fudinde huwarun yen tagalde tukun hiyen," yirin.

23 Be, gwaha yinenbe gabu iramin bana gon nin al irawa denye yuramin. Matiasyabe Yosepya. Yosep gote denyabe irawa. Kurabe Basabas, munan kurabe Yastus inen hinhan. 24-25 Go kamereb Al Kurun gahade mere iramin: "Doyan Al Kurun, Yudasbe Yesuyen mere basan al hinhin gega, meten go tubul ten kamdebe nebe gor nin yenbe gor po kun. Ningeb al kura yende gasun ten Yesuyen mere basan al hewon yen nurde hite.

Gebe al kurun gate dufayminya binja kenkela yenej ha geb, al irawa gayen ganunbe meten go tiyyen yen basin irarin goyen dikala dirayin,” inen gusunon iramin. ²⁶ Gwaha inenbe irem gote denem kanbe Yuda marte matare tilin tanaramin. Irkeb Matias denemde huwaryin. Irkeb gor hinhan mar gore Matiasbe Yesuyen mere basan al hihi yen nuramin. Irkeb al 11 hinhan goyen 12 hamin.

2

Pentekos nalure Holi Spirit katyin

¹ Be, Yuda marte gabu nalu kura Pentekos yen hanjen goyen forok yekeb Yesuyen mere basan mar aposel budaya Yesu nin dufaymin tarej irde hinhan mar tumnon 120 gobe gasun unkennde po gabu iramin. ² Gwaha ten hikeyab bemel po mene kurun migirin yara kura nanjinde mat forok yeke nuramin. Irkeb migirin gore po katenbe ya bin mel go hinhande goyen ep irde tukurin. ³ Irkeb koton kan nankenamin. Irdeb det kura kak melak yara gore yen hitte po katenbe bur yen kun al tonan heren keperde tukurin. ⁴ Irkeb Holi Spirit belen hard yunkeb almet mere kurayen kurayen yen go ma nurde hitin kurun goyen gwaha mat mere titin ala tiyamin.

⁵ Be, Yerusalem gorbe Pentekos nalu kurun goke tenbe Yuda mar nan kurar kurar hen Al Kurun dolon irde hanjen mar goyen wan gor hinhan. ⁶ Be, Yesuyen mere basan mar aposel buda hinhande gor migirin go nurdeb al buda kurun gore yinnin yen wayamin. Irdeb aposel

budaya Yesu niŋ dufaymiŋ tareŋ irde hinhan marya gore mere kurayen kurayen mat tikeb mel goreb merem mat merem mat nurdeb dinon kok yeŋ tulfut yamiŋ. ⁷ Irdeb dufaymiŋ titmiŋ hekeb gaha yamiŋ: “Ey! Mel gab tumŋaŋ Galili mar. ⁸ Gega dahade niŋgeb mereniniŋ nende gigen yeke nindikeŋ nurhet? ⁹ Irdeb neŋbe naŋa hoyande niŋ hoyande niŋ. Neŋ kurabe Partia naŋare niŋ, kurabe Midia niŋ, munan kurabe Elam naŋare niŋ, kurabe Mesopotemia niŋ, kurabe Yudia niŋ, kurabe Kapadosia niŋ, kurabe Pontus naŋare niŋ. Irde kurabe Esia* naŋare niŋ. ¹⁰⁻¹¹ Goyenbe go po moŋ. Neŋ kurabe Frigia naŋare mat watiŋ. Munan kurabe Pamfilia niŋ, Isip niŋ, irde Libia naŋa bana goŋ niŋ al Sairini taun bindere hanŋen mar. Irde al kurabe Krit motmotde niŋ, kurabe Arebia naŋare niŋ. Irdeb al kurabe Rom mat belneŋ wayan. Goyenbe dahade niŋgeb Al Kurun belen mata tiŋeŋ kurayen kurayen al belen gwaha mat forok yeŋ haŋ yeŋ ma nurtek goyen forok yirde hinhin gobe mereniniŋ mat yeŋ haŋ?” yeŋ kukuwamneŋ nuramiŋ. (Be, Rom mat wayamiŋ mar goyen kurabe Yuda mar, munan kurabe al miŋ hoyan goyen Yuda marte tikula gama irde hanŋen mar.) ¹² Irdeb hurkunŋat teŋ gor ŋakŋak teŋbe, “Gab da matabe gago?” yeŋ yingeŋ uliŋ kadam gusaŋaŋ gird tiyamiŋ. ¹³ Gega kuramiŋbe Yesu niŋ dufaymiŋ saŋiŋ irde hinhan mar goyen nanosak mere yirdeb, “Mel gabe wain ugun po

* **2:9:** Esia naŋa gobe gayenter niŋ Esia naŋa kurun goke ma yitiŋ. Gayenterbe Turki inen hanŋen.

nene kukuwa hahan, ” yamin.

Pita belen mere tagalyin

¹⁴ Irkeb Pitabe aposel buda 11 goya huwardeb kuware al buda goyen gaha yinyin: “Be, kadne yago, den Yuda mar, Yerusalem taunde ninya sinjare ninya, ga nurnan. Mata forok yihi gayen min gwahade yen momon diren tihim geb, kenkela kirmintin kernan ko. ¹⁵ Gabe 9 kilok wampot Al Kurun mere ird ird nalure hite. Gega den belenbe fe nen kukuwa hahan yen denhan? ¹⁶ Mon, hakot Al Kurunyen mere basan al Yoel belen Yuda mar nin mere ten asande kayyin gobe hanka gago forok yihi. ¹⁷ Al Kurun belenbe gaha yirin:

“Tonne Holi Spiritbe al megen nin hitte fe wogor-tin yara irde yunen.

Irkeb kame gab nalu funan forok yiyyen.

Irkeb urtinja wertin yagoya belen merene basan hen tagalnayin.

Irde al fonentinj belen yuwarwarte dufayne yenen bebak tinayin.

Irde salanentinj belen mitere dufayne yenen bebak tinayin.

¹⁸ Fudinde, nalu goyenterbe meten marne, alya bereya, tumnan

Tonne Holi Spirit yunmeke merene basan hen tagalnayin.

¹⁹⁻²⁰ Irdeb Doyan Al Kurun wayyen nalu kurun goyen forok yewen tikeb

megenya nankindeyabe mata tinen kurayen kurayen al belen yenen tulfut yetek goyen forok yirmeke yennayin.

Nanabe kidoma hiyyen, munan gagasibe buk yen dari yara hiyyen.

Munan megenbe dari, kakyabe kaki bukdulnen forok yenayin, 'yitin hi. *Yoel 2:28-32*

²¹ Gega nalu funan goyenterbe al kura ne nin nurde gama nirde hinayin mar goyen mun po gab tumnan yawaren, ” yirin.

²² “Ningeb, mel Israel mar, mere ga nurnan ko. Nasaret nin al Yesube fudinde Al Kurun belen ten kerke wayun yen nurnayin yenbe Al Kurun belen taren unen hike diltinde mata tinen kurayen kurayen kurun gogo forok yirde hike yenen hinhan. Denbe goyen kenkela nurde han gogo. ²³ Be, Al Kurunbe kame mata forok yiyyen goyen kenkela nurde hinhin geb, bikken dufaymin kiryin goyen po gama irde Yesu goyen den hantinde kirun. Irkeb den belenbe Al Kurun ma nurde unen han mar haninde pel irkeb kuruse hende mayke kamun. Ningeb den gare po Yesu mayke kamun.

²⁴ Gega kamde kamde taren Yesu tanartek goyen Al Kurun belen ten sin irde isan hekeb huwarun. Kamde kamde sanin gore epte ma basin irun.

²⁵ Be, Yesu huwarun goke bikken Dewit belen asandebe gahade kayyin:

‘Doyan Alnebe huginen neya hike kenen hime.

Yenbe ketalner hen faran nurde hi geb, kafura ma hewen.

²⁶⁻²⁷ Goke tenbe bener mat amanen wor po nurde Al Kurun turun irde hime.

Nebe ge belen metere ma nubul tike bida hewen. Delger wukkekk wor po nenen ha gayen nubul tike bida hen hen mata gobe ma kenen.

Kamde bida hetek yara gega, fudinde wor po ge belen faran nurke huwareñ yen nurde hime.

²⁸ Huginen hen hen belnen goyen nikala nirañ.

Ningeb kame geya tumnan henbe goke amanen nurde hen, 'yitiñ hi,' yiriñ. *Tikiñ 16:8-11*

²⁹ Be, Pita belen sopte gaha yinyiñ: "Kadne yago, asininiñ Dewit belen gwaha yiriñ gega, yenbe bikken kamke mete tiyamiñ. Irde fudinde wor po gasunbe gor mete tiyamiñ yen nurde hite. Irde wañ wañ gayenter wor metemiñ gobe hi. ³⁰ Goke tenbe Dewit belen mere tiyyiñ gobe yingen ge ma yiriñ. Yenbe Al Kurunyen mere basañ al geb, Al Kurun belen biña tenya, 'Kame Dewityen minde niñ al kura yingen yara po forok yenbe gasunmiñ ten Doyañ Al Kurun hiyyen,' yiriñ goyen nurde hinhin. ³¹ Mata kame forok yiyyen goyen nurde ep henbe Al Kurun belen Mesaia metere mat isañ hekeb bana goñ ma bida hiyyen goke tagalyiñ. ³² Be, Mesaia gobe Yesu. Nen kurun gab Al Kurun belen kamtiñde mat isañ heke huwarun goyen dilniniñde wor po kintiñ geb, yen ge kawan tagalde hite gago. ³³ Yesu gobe Naniñ Al Kurun belen tumulgan tike hurkunbe Naniñde tareñ ten Doyañ Al Kurun hiyun. Irde Naniñ belen Holi Spirit niñ biña tiyyiñ goyen unke tenbe gago fe wogortinen irde duna. Irkeb migiriñ kurun goyen nurde diltiñde wor po mata kenhan gago. ³⁴ Dewitbe uliñ tumnan ma Al Kurun hitte hurkurin. Gega gahade kayyiñ:

'Al Kurun belenbe Doyañ Alne gaha inyiñ:

Wañ ketalner hen al denem yan wor po hawayiñ.

³⁵ Irkeb asogo girde han mar goyen bul yirde yawan gasa yirmeke katkeb yufurka tiyayin, yitin. *Tikin 110:1*

Mere gabe yingen ge ma kayyin. Yesu nin ten kayyin. ³⁶ Ningeb den Israel mar, mere diren tihim gayen fudinde wor po yen nurnan ko: den belen Yesu kuruse hende mayke kamun. Gega Al Kurun belen kamtinde mat isan heke huwarun. Irkeb yen belen po Doyan Al Kurunya Mesaiaya irun, yinyin.

Al budam Al Kurun nin bin mulgan heke baptais tamin

³⁷ Be, al buda go meremin nurdeb, 'Fudinde mata bulun tin, yen memyak wor po nurdeb Pitaya aposel buda kadam yagoya goyen, "Kad-ninin yago, ningeb daha titek?" yen gusunan yiramin. ³⁸ Irkeb Pita belen wol henbe gaha yinyin: "Ningeb den kurun gayen mata buluntin yubul ten Al Kurun nin bitin mulgan hena. Irdeb Yesu Kristu nin dufaytin taren irde yende denemde baptais tenayin. Gwaha tike gab Al Kurun belen mata buluntin goyen haldeb Holi Spiritmin dulin dunen yen bina tiyyin goyen dunyen. ³⁹ Go bina tiyyin gobe al kura Al Kurun belen hoy yiryen mar kurun goke ten bina tiyyin. Ningeb bina tiyyin gobe denya fonentin yagoya al gisaw han mar goke manan nurde tiyyin," yinyin.

⁴⁰ Irde saba min unken goyen po ma yiryin. Saba kurayen kurayen yirde hayhay yirde gaha yinyin: "Ga hite nalure gayenbe mata bulun kurun forok yen hi. Ningeb mata bulun goyen yenen yilwa yirnayin. Gogab Al Kurunyen bearar

go ma kennayin,” yinyin. ⁴¹ Be, al buda gobe Pitayen mere goyen fudinde yeñ nurdeb Yesu niñ dufayminñ sanñ irdeb baptais taminñ. Goyare al tiñeñ baptais taminñ marbe 3,000 gwahade forok yaminñ. Irdeb mel hakotkenñ goya tumñañ Yesuyen alya bereya haminñ. ⁴² Be, go tiyaminñ mar gobe yende aposel buda gote saba goyen hugineñ teñ hinhan. Irdeb hugineñ awalikde po heñ kadam farañ gurd teñ hinhan. Irde Yesu kamenya komatminñ yagoya binje nene yeñ kamde kamde niñ mere yiryinñ goyen bin bak yeñ yeñ ge binje kadam gunenñ teñ awalikde nene hinhan. Irdeb hugineñ Al Kurunñ mere irde hinhan.

Yesu niñ dufayminñ tareñ irde hinhan marte mata igin

⁴³ Be, aposel buda belenñ mata tiñeñ kurayen kurayen forok yirke al tumñañ goyen yenenbe hurkunñkat teñ kafura haminñ. ⁴⁴ Irdeb Yesu niñ dufayminñ tareñ irde hinhan marbe tumñañ gabu irde awalikde heñ det kadam gunenñ teñ hinhan. ⁴⁵ Gwaha teñ henyabe dawetminnya samunminñ yago al belenñ damu teñ hikeb murungem yade diñunñ yago det kuranñ nurkeb farañ yurde hinhan. ⁴⁶ Mel gobe hugineñ gise hañka Al Kurunyen ya balem koya belenñ po milgu irtinñ bana sawsawa al gabu irde hanyende gor gabu irde hinhan. Irdeb kurate yayanñ gabu mukneñ mukneñ irde hinhan. Gwaha teñ henbe Yesu kamenya komatminñ yagoya funañ dula teñ yeñ kamde kamde niñ mere yiryinñ goke dufay heñ dula teñ hinhan. Binde mat fudinde wor po kadam niñ dufay heñ

tumꞆande aman hej gwaha teꞆ hinhan. ⁴⁷ Irkeb Al Kurun turun irde hinhan. Be, mata kurun goyen teꞆ hikeb Yerusalem hinhan mar gore igin nurde yunet turun yirde hinhan. Irkeb Al Kurun belen hugineꞆ gise hanꞆa al tineꞆ yawan Yesu gama irde hinhan mar hitte gabu yirde hinhin.

3

Pita belen al kahan simsimam sope iryin

¹⁻² Be, goyare goyenbe al kura kahan simsimam miliꞆ belen gwahade po kawan kiryin goyen al belen hugineꞆ tukunbe Al Kurunyen ya balem milgu irtin koya gote yame kura goyenter kerde hinhan. Yame gote denembe “Yame kusamun” inen hanyen. Gor keperde hikeb alya bereya Al Kurun doloꞆ irnin yen wakeb hora kanan yirde hinhin. Be, 3 kilok wawunbana kura Al Kurun mere ird ird nalu hekeb Pitaya Yonyabe Al Kurunyen ya balemde kwaryum.

³ Be, Pitaya Yonya gobe hako ga yamere hurkuren tikeyabe al kahan simsimam goreb hora nin kanan yiryin. ⁴ Irkeb irem gore tumꞆande huwarde kimiꞆde keneꞆbe Pita belen, “Deyya ga dena,” inyin. ⁵ Gwaha inkeb det kura wet nunyen tahar yenbe kotan kan yinyin. ⁶ Gega Pita belenbe, “Nebe horanem moꞆ wor po. Goyenpoga det kura ne hitte hi goyen gunen tihim geb, Nasaret nin al Yesu Kristuyen denemde ginhem, huwarde kwa!” inyin. ⁷ Gwaha inenbe yen belen po al goyen hanin yase belen tanarde isan hirin. Irkeb goyare po kahan huwa heꞆ sanin haryum. ⁸ Irkeb huwardebe solok solok

yeŋ kuŋ waŋ tiyyiŋ. Irdeb Pitaya Yonya irde tumŋaŋ Al Kurunyen ya balem koya beleŋ po milgu irtin bana sawsawa al gabu irde hanyende gor hurkuŋbe kuŋ waŋ teŋ solok solok yeŋ Al Kurun turun iryiŋ. ⁹ Be, al go kuŋ waŋ teŋ Al Kurun turun irde hikeb al gor hinhan gore al go keneŋ ¹⁰ bebak teŋbe, “Ey! Al gabe kahaŋ simsimam, yame deŋem Yame kusamuŋde gor keperde hiyen al go goyen gago,” yeŋ hurkuŋkat teŋ diliŋ fot yamiŋ.

Pita beleŋ Al Kurunyen ya balemde mere tagalyiŋ

¹¹ Be, al goreb Pitaya Yonya yubul titek ma irkeb irem go gama yirde Al Kurunyen ya balem koya beleŋ po milgu irtin bana sawsawa al gabu irde hanyende gor kwamiŋ. Gasuŋ gobe “Solomonyen Paranda”^{*} inen hanyen. Irkeb al gor hinhan gore keneŋ hurkuŋkat teŋbe yeŋ hitte kup yeŋ kwamiŋ. ¹² Irkeb Pita beleŋ al yeŋ hitte waŋ hike yeneŋbe gaha yinyiŋ: “Deŋ Israel mar, al igiŋ hihi gayen keneŋ goke hurkuŋkat teŋ diltiŋ fot ma yenayiŋ. Deyya gabe Al Kurun diliŋde al igiŋ niŋgeb, gore al kahaŋ simsimam gayen sope irhar yeŋ denen haŋ? Moŋ! Deyyat tareŋdebe epte moŋ geb. ¹³⁻¹⁵ Niŋgeb ga nurnaŋ ko. Yesube Al Kurunyen Meten Al, Al Wukken, irde Al Huwak wor po. Gega deŋ beleŋ igiŋ ma nurd unenbe mayke kami yeŋ tukun Pailat haniŋde kerdeb pel

^{*} **3:11:** Solomonyen Paranda: Al Kurunyen ya balem kurun gote ya murun sobam siŋa siŋa kutiŋ hinhan. Ya murun gobe tola karkuwaŋ yimiytiŋ hinhan. Ya siŋa kurhanbe “Solomonyen Paranda” inen hinhan gogo.

iranj. Irkeb Pailat belenj tubul timeke kwi yekeb denj belenj kamyenj po yanj. Irdeb al kura al gasa yirke kamtinj al goyen tenj sinja irke kat kuyenj yanj. Gwaha tenjbe Al Kurunya huginjenj henj henj gote belenj kerd duntek albe gogo mayanj. Gega hakwanininj Abraham, Aisak, Yekopya, asinininj yagoyat Al Kurunj belenjbe kamunje mat isanj henjbe al belenj turunj irde hinayinj yenj al denjem turunj yanj wor po irunj. Ninjgeb Yesu kamunje mat huwarunj gobe dilynininj bilminje wor po kintinj geb, gago momonj dirde hite. ¹⁶ Deyyabe Yesu ninj hekkej nurde har geb, al kahanj simsimam kenenj hinhan gago kahanj huwa henj tarenj hihi. Deyyabe Yesuyen saninj belenj gab al ga sope iryenj yenjbe yenj ge hekkej nurde har gore al gago kenjela wor po sope ira kenhanj,” yinyinj.

¹⁷ Irde sopte gaha yinyinj: “Be, kadne yago, denj wor doyanj martinj belenj tiyanj gwahade goyen po Yesube al gwahade yenj minj kenjela ma nurdeya bulunj iranj yenj nurde hime. ¹⁸ Gega gobe bikkenj Al Kurunj belenj kame Mesaiaminjbe ulinj misinj kurunj katenj kamyenj yenj mere basanj marminj yinke tagalaminj geb, gwahade goyen po forok yiyunj. ¹⁹ Ninjgeb mata buluntinj yubul tenj Al Kurunj hitte mulganj henayinj. Irkeb Doyanj Al Kurunjininj belenj mata buluntinj halde dunenjbe tontinj tarenj yiryenj. ²⁰ Irde kamebe Yesu, Mesaia bikkenj denj ge tenj basinja iryinj goyen tenj kerke katyenj. ²¹ Gega yenjbe gayenterbe Al Kurunya har. Be, kunj kunj Al Kurunj belenj det kurunj gayen yirde gergenj yire yeke gab katyenj. Mata gabe bikkenj Al Kurunj belenj mere basanj marminj

diliñde wukkenj wor po yenej hinhin goyen momon yirke tagalamin. ²² Be, bikkenjbe Mose belej Yesu niñ yeñ Israel mar gaha yinyiñ: ‘Doyañ Altin Al Kurunj belejbe mere basañ almiñ kura ne yara po deñ miñde niñ forok iryen. Niñgeb al gore mere dirde hiyenj kurunj gobe kenkela nurde gama irde hinayiñ. ²³ Al kura yende mere ma nurde hiyenj al gobe Al Kurunj belej biñ arñenj nurd yunke go mar gobe yende al ma henayiñ,’ yiriñ,” yinyiñ.

²⁴ Irde sopte gaha yinyiñ: “Irde Al Kurunjen mere basañ al, Samuelya, mere basañ mar kame kame wañ hinhan kurunj gore wor mata kurunj gayenter forok yeñ hañ gake gwahade po forok yenayiñ yeñ bikkenj tagalde hinhan. ²⁵ Niñgeb Al Kurunjen mere basañ marmiñ belej gwahade tagalde hinhan gobe deñ ge teñ tagalde hinhan. Irde deñ ge teñbe Al Kurunj belej Abraham diliñde biña teñbe, ‘Kame fonenje kura forok yiyyenj gore megen niñ al buda kurunj gayen nere guramya tarenya teñ teñ hiryonj hiyyenj,’ inyiñ. Be, biña tiyyiñ gwahade po Al Kurunj belej asetinj wenj hitte wor biña teñ hinhin gobe deñ ge teñ biña teñ hinhin. ²⁶ Niñgeb deñ ge teñbe Al kurunj belej guram dirde saninj dirke mata bulunjinj goyen yubul tinayiñ yeñ nurdeb metenj almiñ basinja irde teñ kerke deñ hitte wa wayyiñ,” yinyiñ.

4

Pitaya Yonya yade koyare yeraminj

1-2 Be, Pitaya Yonya belen Solomonyen Paranda inen hanyende gor hinaryumya goyenbe gor gabu iramin mar goyen Yesu kamde huwaryin mere goke momon yirde hinaryum. Gwaha ten henyabe Yesu tiyyin gwahade goyen po al kamtin manan kame huwarnayin yen mel goyen saba yiraryum. Gwaha ten hikeb Al Kurun dolon ird ird mata doyan mar pris budaya, Al Kurunyen ya balem kurun gote doyan marte kurunminyabe Sadusi marya belen* wan mere go nurdeb bin ar yamin. ³ Irkeb mel gore Pitaya Yonya yad merere yertek yen yawaramin. Gega bikken wawun hirin ningeb, gise ga yenbe yad koyare yeramin. ⁴ Gega irem gote mere nuramin marbe budam wor po mere goyen fudinde yen nurde Yesu nin dufaymin taren iramin. Irkeb al yen wa Yesu nin dufaymin taren iramin mar bikkek goyabe gayamunkek goya gabu irde al parguwak po kapyan haminbe 5,000 gwahade hirin.

Pitaya Yonya mere kurunde hararyum

⁵ Be, fay urkeb Yudia nanare nin doyan marya Yuda marte doyan mar parguwakyabe Moseyen saba basan hen tagal tagal marya belen irem gote mere nurnin yen Yerusalem gor gabu iramin. ⁶ Gabu iraminde gorbe Al Kurun dolon ird ird mata doyan mar pris buda gote karkuwanmin Anas, Kaiafas, Yonya, Aleksandaya, irde Anas gote taynen wen hoyan manan gor gabu iramin. ⁷ Be, mel gore Pitaya Yonya yawanbe yen ge igin ma nurde yunenya, "Ganun belen igin dinkeb

* **4:1-2:** Sadusi mar: Al kamtin sopte huward huward goyen fudinde yen ma nurde hinhan mar.

mata gogo tiyarun? Ganunđe sanjnde gogo tiyarun?” yeŋ gusuŋaŋ yiramiŋ. ⁸ Irkeb Pita gobe Holi Spirit beleŋ hard unkeb wol heŋbe gaha yinyiŋ: “Be, deŋ Yuda marte doyaŋ marya doyaŋ mar parguwakya, ga nurnaŋ ko! ⁹ Deŋbe al kahaŋ simsimam faraŋ uryeke igiŋ hiyuŋ goyen goke muŋ teŋ merere derde daha mat igiŋ hiyuŋ gote miŋ nurniŋ yeŋ gusuŋaŋ dirhaŋ? ¹⁰ Niŋgeb deŋya Israel mar hoyoŋ manaŋ tumŋaŋ mere tiyeŋ tihim gayen ga nurde bebak tinayiŋ. Be, al kahaŋ simsimam gabe Nasaret niŋ al Yesu Kristu deŋ beleŋ mayke kamuŋ gega, Al Kurun beleŋ isaŋ heke huwarun al gote tarende igiŋ hiyuŋ. Niŋgeb diltiŋ mat huwarke gago kenhaŋ. ¹¹ Yesu niŋ teŋ Al Kurunyen asaŋdebe siraw mere mat gahade katiŋ hi:

‘Deŋ, ya ird ird mar beleŋ ya irniŋ yeŋ hora kura tawayamiŋ gega, igiŋ ma keneŋbe temeyamiŋ.

Goyenbe al hoyoŋ beleŋ tukuŋ gore po yamiŋ tareŋ wor po iryiŋ,’ yitiŋ hi. *Tikiŋ 118:22*
 Niŋgeb hora gwahade goyenbe deŋ beleŋ Yesu gogo pel iran. Gega Al Kurun beleŋ teŋ meten kurun wor po unun. ¹² Niŋgeb Yesu po ga neŋ mata bulunđe mat dumulgaŋ teŋ teŋ sanjŋ goyen Al Kurun beleŋ unun. Niŋgeb megen niŋ al kura beleŋ epte ma Al Kurun hitte alya bereya yumulgaŋ tiyyeŋ,” yinyiŋ.

¹³ Be, gor gabu iramiŋ mar goreb Pitaya Yonyabe saba kurun ma titiŋ, irde al denem moŋ yeŋ nuramiŋ gega, ‘Neŋ ge kafura ma heŋ mere tareŋ po tagalde har,’ yeŋbe hurkunƙat tiyamiŋ.

Irde irem gobe Yesuya tumṇaṇ heṇ kuṇ waṇ teṇ hinhan mar goyen kurabe gago yeṇ biṇ bak ya miṇ. ¹⁴ Irde al kahaṇ simsimam goyen igiṇ heṇ Pitaya Yonya irde tumṇaṇ huwarde hi ke keneṇbe Pita beleṇ mere tiyyiṇ goyen wol heṇ heṇ ge kukuwamṇeṇ nuramiṇ. ¹⁵ Irdeb mere teṇ teṇ gasuṇde matbe yakira tike belṇeṇ muṇ po siṇare kukeb yiṇgeṇ uliṇ mere sege irde gaha ya miṇ: ¹⁶ “Al irawa gabe daha yirtek? Al buda kuruṇ Yerusalem taunde haṇ kuruṇ gobe irem gore mata tiṇeṇ wor po goyen tike kenaṇ. Neṇ wor mata forok yiyuṇ gote igineṇbe kenhet gago niṇgeb, epte ma ‘usi’ yetek. ¹⁷ Gega mata forok iraruṇ gote mere momoṇbe kuruṇ heṇ kuke al nurde pasi henayiṇ goke igiṇ ma nurde hite geb irem goyen, ‘Sopte Yesu ineṇ haṇyen al goke tagalkeb muduntek,’ yineṇ utaṇ yirtek,” ya miṇ. ¹⁸ Gwaha yeṇbe irem go sopte hoy yirke wakeb, “Derbe al hoyaṇ hitte kuṇ Yesu niṇ ma wor po tagalde saba yiriryen!” yeṇ mere tareṇ po yirdeb utaṇ yiramiṇ. ¹⁹ Gega Pitaya Yonya beleṇ wol heṇbe, “Al Kuruṇbe da mata niṇ igiṇ nuryeṇ? Yende mere gama irtek ma dende mere gama irtek? Goyen dindikeṇ dufay henaṇ ko. ²⁰ Munāṇ deyyabe Yesuyen mata delderer yeneṇ meremiṇ nurde tiyaryum goyen tagal tagal niṇ epte ma wor po bada hereṇ,” yinaryum.

²¹⁻²² Gega al kahaṇ simsimam miliṇ beleṇ gwahade po kawaṇ kiryiṇ, damam 40 fole irtiṇ goyen Pitaya Yonya beleṇ Al Kuruṇyen saṇiṇde sope iraryum goyen al budam wor po go keneṇbe Al Kuruṇ turuṇ iramiṇ geb, Yuda marte doyaṇ mar

belen goyen nurdeb gwaha mat kura irem goyen bulun yirtek mon hamin. Niñgeb dulin mohonde po kafura mere yirde yubul tike kwaryum.

Yesu nin dufayminj tareñ irde hinhan mar belen Al Kurunj mere iraminj

²³ Be, Pitaya Yonya gobe yubul tike mulgan hen dinun yago hitte kwaryum. Irdeb pris buda gote karkuwanminya Yuda marte doyan mar parguwakya belen mere yiramin goyen tumnan dinun momon yiraryum. ²⁴ Irkeb mere goyen kanduknen nurdeb tumnande Al Kurunj ugun po gahade inamin: “Doyan Al Kurun, ge belen po nankinya megenya makanya yirdeb dawet bana gon han kurun gayen yirarin. Irde doyan yirde ha. ²⁵ Ge belen mere tike meten alge asininin Dewit gore Holi Spirityen tarende merege nurde basan hen gaha yirin:

‘Danin megen nin marbe yen ge bearar ten han? Irde danin dufay bulun kukuwamnen po yerde mere mayde han?’

²⁶ Megen nin doyan mar karkuwanya nana ga doyan irde han mar wan gabu irdeb Doyan Al Kurun asogo irde han.

Fudinde, al buda kurun gobe bikken Al Kurun belen basina irde olip fimin tonande sam irtin Al goyen gogo asogo irde han,’ yirin.
Tikin 2:1-2

²⁷ Niñgeb, fudinde, Dewit belen mata goke yirin gwahade goyen po forok yiyun. Yesube ge belen bikken Mesaia inen basina irarin. Gega Israel nana doyan al Herotya Roma gabmanyen al Pontius Pailatya belen Yesu, gere Meten Al, delger

wukken wor po kenej hayen al goyen asogo irtek yej Israel mar Yerusalem bana gan han goya al min hoyan Yuda mar monya gabu irde mere mayan. Irdeb mayke kamun. ²⁸ Goyenbe mata gobe mali ma forok yiyun. Mel buda gore gwaha tinayin yej dufayge bikken kerarinyen geb, gogo gwahade po forok yiyun. ²⁹ Ningeb Doyan Al Kuruninin, Yesu nin tagalde hite goyen utan dirnin yej mel gore kafura dirde han gabe yenen ha. Ningeb nejan meten marge sanjan dirkeb mel goke kafura ma henbe igin merege tagalde tukutek. ³⁰ Irde Yesu, gere Meten Al, delger wukken wor po gote denemde garbam mar sope yirde, mata tinen kurayen kurayen forok yirde hitekeyab tarenge kurun goyen alya bereya yikala yirde hayin.” inamin.

³¹ Be, Pitaya Yonya irde gabu iramin mar belen Al Kurun mere irde pasi irkeb goyare po Al Kurun belen wol henbe mel go hinhan gasun goyen an sok iryin. Irkeb gor hinhan mar gobe tumnan Holi Spirit belen hard yunkeb Al Kurunyen mere tagal tagal nin kafura ma henbe tagalde kun hinhan.

Yesu nin dufaymin taren irtin marbe detmin kadam gunen tej hinhan

³² Be, Yesu nin dufaymin sanjan irde hinhan mar gobe tumnan dufayminya mataminya un kuren po hamin. Irdeb al kura belen, “Detne kurun han gabe nere kudinjan mon,” yej hinhan, irde detmin kurun goyen yingen ulin kadam gunen tej hinhan. ³³⁻³⁵ Be, aposel buda belen Yesu kamyinde mat huwaryin goyen Al Kurunyen

tarenđe tagalde hike al beleş fudinđe yeş nurde hinhan. Irde al tumŋaŋ megeş minyaŋya ya minyaŋ marbe al beleş damu tikeb muruŋgem goyen aposel hitte yawaŋ haniŋde yerde hinhan. Irkeb aposel beleş al kura det kuraŋ amu heş hinhan mar tumŋaŋ gale heş yuneş hinhan. Gwaha teş hikeb al kura det kuraŋ ma amu heş hinhan. Be, Al Kuruş beleş yeş gama irde hinhan mar goyen mata gwahade teş hikeb guram yirde igiş igiş wor po yirde hinhin.

³⁶⁻³⁷ Be, al kura, deŋembe Yosep manaş megeş tapummiş kura al beleş damu tike muruŋgem goyen tawaŋbe aposel buda yuniş. Yeşbe Liwai mar al, irde Saiprus motmotde niş al. Aposel buda beleşbe Banabas ineş hinhan. Deş gote mişbe, “kadom faraş yurde tarenş yird yird al.”

5

Ananiasya Safiraya

¹ Be, al kura deŋembe Ananiasya berem Safiraya manaş megeş tapummiş kura al beleş damu tikeb muruŋgem taryum. ² Gega ire uŋya gobe hora goyen tumŋaŋ Yesuyen mere basaş mar aposel buda haniŋde kertek ma yirkeş goke sege irdeb hora kurhanbe yiŋgeş ge basaş irdeb uş beleş kurhan po tawaŋbe, “Megeş gote muruŋgembe gago po,” yeş aposel buda haniŋde kiryiş. ³ Irkeş Holi Spirityen saŋiŋde Pita beleş bebak teşbe, “Ananias, daniş geb Satanyen dufay po gama irde hora kurhanbe giŋgeş ge bana kerdeb tumŋaŋ gago po tawayhem yara teş Holi Spirit usi irha? ⁴ Megeşge goyen damu ma

tikeyabe gere hinhin. Irde damu tike murungem wor gere po. Niñgeb hora go ten dufayger det kura ire yenbe gwaha irtek yara. Gega da belen wor po girkeb dufay goyen forok yekeb mata bulun gogo taha? Usi taha gobe al ma usi yirha, Al Kurun usi irha geb,” inyiñ. ⁵⁻⁶ Irkeb Ananias gobe mere goyen nurdeb goyare po kamde katiñ. Irkeb al fonen kura gor hinhan gore wanbe al hakwa go mala ten tukun mete tiyamiñ. Be, Ananias belen Holi Spirit usi irde goke mun po kamke kenamiñ marya mere momonmiñ nuramiñ marya tumnan tulfut yen kafura hamiñ.

⁷ Be, 3 awa gwahade kamereb berem Safira gobe un hitte mata gwahade forok yihi yen ma nurdeya Pita hinhin ya binde gor hurkurin. ⁸ Irkeb Pita belenbe, “Safira, momon nira. Megentirinde murungembe gago po we?” inkeb, “Gwaha, tumnan gogo po,” inyiñ. ⁹ Irkeb Pita belen wol henbe, “Dahade niñgeb derbe tumnande mere sege irdeb Doyan Al Kurunyen Holi Spirit tunan urhar? Almege tukun mete tahan marbe yamere gogo forok yahan yenha. Niñgeb ge wor gade kuniñ tahan geb,” inyiñ. ¹⁰ Irkeb goya goyen po Pitayen kahan minde gor po katen kamiñ. Be, un tukun mete tiyamiñ mar gore wan hurkunbe berem wor kamtiñ kenenbe tukun un ketalde po mete tiyamiñ. ¹¹ Be, ire unya go hitte mata forok yirin gote mere momon nurdeb Yesuyen alya bereya sios gobe tumnan kafura wor po hamiñ. Yesuyen alya bereya mon wor gwahade po kafura hamiñ.

Aposel buda belen garbam mar budam sope

yiramiñ

¹² Be, aposel buda beleş mata tiñeñ Al Kurun beleş po forok yirtek goyen al hitte budam forok yirde hike diliñ fot yeñ hinhan. Irde Yesu niñ dufaymiñ tareñ irde hinhan marbe tumñañ dufaymiñ unñkureñ po kerde Al Kurun doloñ irniñ yeñ al wañ gabu irde hanñyen gasuñ kurun kura “Solomonyen Paranda”^{*} iney hanñyende gor gabu irde hinhan. ¹³ Be, Yerusalem taunde hinhan mar goyen tumñañ Yesu niñ dufaymiñ tareñ irde hinhan mar goke tagalde turuñ yirde hinhan. Gega go mar goyen hitte mata forok yeñ hinhan goke kafura heñbe al kura yeñya awalik heñ heñ ge kama heñ hinhan. ¹⁴ Gega alya bereya tiñeñ beleş Doyañ Al Kurun niñ dufaymiñ sañiñ irdeb budam forok yeñ hinhan. Irkeb Yesuyen alya bereyabe budam wor po hamiñ. ¹⁵ Irde aposel buda beleş mata tiñeñ kurayen kurayen teñ hinhan goyen yeneñ hinhan geb, garbam miñyañ mar sapirte yawañ beleşyañ yerde hinhan. Kurabe yawañ gasuñ ugamde yunke goyañ ferde hinhan. Gwaha yirteke gab Pita wañ beleş goyañ kuñ heñyabe haniñ yerde yuni yeñbe gogo teñ hinhan. Munañ kurabe Pita toneñ beleş po awrum yurke igiñ henayiñ yeñ nurde teñ hinhan. ¹⁶ Irkeb tiyuñ budam Yerusalem biñyañ biñyañ niñ mar gore garbam marya al unñgura ketal yurtiñ miñyañ mar goyen aposel buda hitte yawañ hike sope yirke tumñañ igiñ heñ hinhan.

^{*} **5:12:** Solomonyen Paranda: Al Kurunñyen ya balem kurun gote ya muruñ sobam siña siña kutiñ hinhan. Ya muruñ gobe tola karkuwañ yimiñtiñ hinhan. Ya siña kurhanbe “Solomonyen Paranda” iney hanñyen gogo.

Aposel budabe kanduk kenaminj

¹⁷ Be, pris buda gote kurunminya yen faran urde hinhan mar Sadusi budaya belej, 'Nej fole dirnin tahan,' yen bin ar yekeb aposel buda nin igin ma wor po nurdeb yade gasa yirnin yen mere sege iraminj. ¹⁸ Irdeb aposel buda goyen yade kawe marya mata bulun ten hinhan marya yerde hanjen koyare gor yeraminj. ¹⁹ Gega wawunbe Doyan Al Kurunyen miyon belej kunbe koya gote yame fegelde sinare yukurinj. ²⁰ Irdeb, "Al Kurunyen ya balemde kunbe al buda kurun goyen al kura Yesu nin dufayminj tarenj iryenbe Al Kurunj dilinde al gergen hen hen mata goyen goke kenkela po tagalnayin," yinen hulyan yirynj. ²¹ Be, miyon belej yinyin goyen nurdeb fay urkeb Al Kurunyen ya balemde kunbe alya bereya saba yird yird minj uraminj.

Be, goya goyenbe pris buda gote kurunminya yen faran urde hinhan marya gore aposel buda goyen daha yirnin yen Yuda marte doyan mar parguwak tumnanj hoy yirke wanj gabu iraminj. Irdeb mel go koyare yeraminj goyen yawan merere yirnin yenbe al hulyan yirke kwaminj. ²² Gega kunj forok yen nankenaminjbe aposel buda gobe gor ma hinhan. ²³ Gwahade kenenjbe mulganj hen kunbe, "Koya yamebe sinj mat tarenj irtin, irdeb ya gote doyan marbe tumnanj gor hanj. Goyenbe yame fegelde hurkun nankenhet gega, gorbe al minjonj. Hubu wor po!" yinaminj. ²⁴ Irkeb pris buda gote karkuwanminya Al Kurunyen ya balem doyan irde hanjen marte kurunminya belej mere momonj go nurdeb, "Aposel

budabe daha tahan? Irdeb kamebe da mata forok yiyyen?” yen n̄akn̄ak tiyamin.

²⁵ Be, gwaha ten hikeb al kura wanbe, “Mel, ga nurnan. Al yad fere tiyan mar gobe Al Kurunyen ya balem bana gon alya bereya saba yirde hike yenhem be!” yinyin. ²⁶ Irke ya balem kurun gote doyan marya kurunminya gore mere go nurdeb kun aposel buda go yad wayamin. Goyenpoga al buda kurun meremin nurde hinhan mar gore yen ge hen hora kaka dirnak yenbe ohkohom po Israel nan̄a doyan mar tumnan̄a gabu iramin gasunde gor yawayamin.

²⁷ Be, aposel buda go yawan dilinde yirkeb pris buda gote kurunmin̄a gore bin̄ ar hende gaha yinyin: ²⁸ “Yesu belen alya bereya ne nin̄ saba yirde hinayin̄ dinun̄ goyen bada po henayin̄ yen utan̄ dirtin̄. Gega parsay hen̄ Yerusalem taunde gar kawanyan̄ po mere tagalde tukun̄ hikeb al budam nurd pasi hahan̄. Gwaha tenbe Yesu kamun̄ gobe yen belen̄ po mayan̄ yen min̄ge dirnin̄ ten han̄?” yinyin. ²⁹ Irkeb Pita belen̄ kadam yagoya huwarde wol henbe, “Nenbe Al Kurunyen mere po gama irtek. Dende mere ma nurtek geb! ³⁰ Be, ga nurnan. Den̄ belen̄ Yesu kuruse hende mayke kamun̄. Goyenbe nen̄ Israel marte asinin̄in̄ yagot Al Kurun̄ belen̄ kamtin̄de mat isan̄ hiyun̄. ³¹ Irde yingen̄ hitte tumulgan̄ ten san̄in̄ unenbe denem yan̄ kurun̄ wor po irdeb, nen̄ al gayen ga Dumulgan̄ ten ten̄ Al irun̄. Goyenbe nen̄ Israel mar kurun̄ gayen mata bulun̄ yubul ten yen ge bininin̄ mulgan̄ heke mata bulun̄nin̄in̄ halde dunen̄ yen nurdeb gogo tiyun̄. ³² Nin̄geb nenbe Yesu hitte

mata forok yitiñ goyen dilniniñde yenenbe gago kawan tagalde hite. Irde Holi Spirit manañ bebak tinañ yeñ dikala dirde hi. Be, Holi Spirit gobe Al Kurun belen yende mere gama irde han mar goyen tumnañ yunen hi,” yinyiñ.

Gamaliel belen aposel buda niñ igiñ mat tagalyiñ

³³ Irkeb meremiñ nuramiñ mar gobe biñ ar yekeb, ‘Fudinde wor po, aposel buda gayen gasa yirteke kamwon,’ yeñ nuramiñ. ³⁴ Be, gabu iramiñde gorbe Yuda marte tikula sañiñ po gama irde hanjen Farisi mar al kura denjembe Gamaliel goyen gor hinhin. Yenbe Moseyen saba basan hen tagal tagal al. Al gobe al budam palap irde hinhan. Be, al gore huwardeb, “Aposel buda ga belnen po siñare yukunañ,” yinkeb gwaha yiramiñ. ³⁵ Irkeb gabu iramiñ mar goyen gaha yinyiñ: “Mel, Israel mar, al buda gayen ga daha wet kura yirniñ yenbe kenkela dufay hen ga mata tinayiñ. ³⁶ Nalu kura hakot yara po mata kura forok yiyun goyen bitiñ sir yan? Al kura denjem Teudas belen, ‘Nebe al denne yan,’ yekeb al 400 gwahade belen gama irde hinhan. Gega go al goyen maykeb yeñ gama irde hinhan mar gobe bur yekeb hubu po hiriñ.

³⁷ “Be, Teudas kamereb nen Israel marte denniniñ kapyan hen tumnañ asande kerd kerd nature Galili niñ al kura denjem Yudas belen, ‘Roma gabman asogo irniñ,’ yinen al usi yirke gama irde hinhan. Gega yeñ wor mayke kamkeb yeñ gama irde hinhan mar goyen wor bur yamiñ. ³⁸⁻³⁹ Niñgeb gwahade goyen po aposel buda belen

mata tej hañ gayenbe dufayminde po tej hañ kenem metermin gobe hubu hiyyen. Munañ Al Kurunyen dufay gama irde tej hañ kenem den belen, ‘Bada henañ,’ yinnayin gega, epte ma meretin nurnayin. Monço al buda gayen asogo yirhet usi tenbe Al Kurun asogo irnayin geb. Goke tenbe dinhem gago. Mel gayenbe okohom po yubul tike kunayin,” yinyin.

Aposel budabe Yesu nin tej kanduk yenamin goke amanen nuramin

⁴⁰ Irkeb al buda gor hinhan mar gore, ‘Mere dira gabe fudinde,’ yen nuramin. Irdeb aposel buda go sopte hoy yirke wakeb gabu iramin gote kurunmin belen, “Yesu gore yingen ge al saba yirde hinayin dinun gobe sopte ma po tagal-nayin,” yinen utan yirdeb fuleña marmin yinkeb al gasa yird yird kan po yusulak tenbe yakira tiyamin. ⁴¹ Irkeb aposel buda goyen mere gasun go tubul tej kun henya, “Nenbe Al Kurun belen Yesuyen al wor po yen nurd dunen hi. Niñgeb Yesu nin tej ulninin misin katehet gago,” yen amanen wor po nuramin. ⁴² Irdeb al saba yird yird nin bada ma hamin. Huginen gise hanca Al Kurunyen ya balemde gor kun mere igin Yesube Mesaia yitin goyen mere kawan po tagalde kun hinhan. Irdeb almet yayan wor gwahade po tej hinhan.

6

Yesuyen alya bereya sios faran yurd yurd meter nin al 7 basiña yiramin

¹ Be, gwaha ten hinhan goyenterbe Yesu nin dufaymin taren irde hinhan marbe budam forok yen hinhan. Goya goyenbe Yerusalem nin Yuda mar yingende mere ten hitin beleŋ gise hanƙa beretap binƙe gale heŋ yunen hinhan. Goyenbe yende beretap po yunenbe, Grik mere ten hitin beretap gobe yubul ten hinhan. Irkeb Yuda mar Grik mere ten hitin goreb goke igin ma nurdeb tiyuj min mar goya kadam mohonde tiyamin.

² Goke tenbe Yesuyen mere basan mar aposel buda 12 gore Yesuyen alya bereya sios tumnan gabu yirdeb gaha yinamin: “Nende metenbe Al Kurunyen mere tagalde tukun tukun. Ningeb binƙe gale heŋ heŋ goke ten metenninin wor po goyen harhokninin untek gobe igin mon.

³ Ningeb kadninin yago, den gabu irde han bana gon nin al 7 kura dindiken basina yirnayin. Goyenbe mel gobe Holi Spirityen saninde wor po meten ten hanyen, irde Al Kurun beleŋ dufay igin yunen hike meten ten hanyen mar goyen po basina yirnayin. Irkeb binƙe gale heŋ heŋ metenbe mel gore ten hinayin. ⁴ Gogab nenbe Al Kurun mere ird irdya meremin tagal tagal nin po dufay hetek,” yinamin.

⁵ Be, gwaha yinkeb al buda kurun gob amanen nurdeb al 7 basina yiramin. Denembe Stiwen, Filip,* Prokorus, Nikanor, Timon, Parmenasyabe Antiok taunde nin al Nikolasya. Nikolas gobe al min hoyan gega, Yuda marte tikula gama irde Yuda mar al hirin. Munan Stiwenbe Yesu nin hekkeŋ wor po nurde hinhin, irde Holi Spirityen

* **6:5:** Filip gabe Yesuyen aposel 12 bana kura gogo mon, al hoyan.

tarenđe po meten ten hinhin. ⁶ Be, al buda gwahade basiņa yirdeb aposel buda hitte yukamiņ. Irkeb al 7 gobe sios faran yurd yurd niņ yade yapat yiramiņ goyen goke tonan hende haniņ yerde Al Kurun belen faran yurde hiyen yen gusunan iramiņ.

⁷ Be, Al Kurunyen mere Yesu niņ yitiņ gobe Yerusalem taun kurunde gor niņ mar belen tumnan nurde tukamiņ. Irkeb Yesu niņ dufaymiņ taren iramiņ marbe aran po budam hamiņ. Be, Al kurun doloņ ird ird mata doyan mar wor budam Yesu niņ dufaymiņ sanin iramiņ.

Yuda mar belen Stiwen fere tiyamiņ

⁸ Be, sios faran yurd yurd niņ basiņa yirtin al kura Stiwen gobe Al Kurun belen kenkela po guram irde taren kurun unkeb al budam diliņde mata tiņen kurayen kurayen Al Kurun belen po yirtek goyen forok yirde hinhin. ⁹ Gega Yuda mar kurabe Stiwen niņ igin ma nurde wan kwep kwep iramiņ. Be, gwaha iramiņ marbe “Doyan Mar Miņmoņ Mar”[†] yineņ hinhan. Mel gobe yingende gabu yare po gabu irde Yuda marte tikula po nurde hinhan. Yenbe Sairini taunya Aleksandria taunyare mat wayamiņ. Kurabe Silisia nanaya Esia nanayare mat wayamiņ. Be, mel goreb wan Stiwen gogo merere fulenā iramiņ. ¹⁰ Gega

[†] **6:9:** “Doyan Mar Miņmoņ Mar” gabe bikken al hoyan belen yukun meten marmiņ yirde hinhan. Goyenbe murungem moņ meten ten hinhan. Irde dufaymiņde kun wan titek moņ. Doyan marmiņyen mere po gama irde meten ten hinhan. Goyenbe doyan marmiņ belen yubul tike dufaymiņde kwamiņ goke tenbe denje gwahade yurde hinhan.

Stiwenbe Al Kurunyen Holi Spirit belej faran urkeb kenkela po dufay henya mere yirke asogo irnin yej wayamin mar goyen gwaha mat kura wol hetek yej ma nuramin.

¹¹ Irkeb mel gore al kura balminde hoy yirdeb, “Den belej kunbe, ‘Stiwen belej Moseya Al Kurunya sukal yirke nurtin,’ yej al momon yirde tukunayin,” yinen bin yawaramin. ¹² Irkeb kunbe gwahade po tagalkeb Yuda marte doyan mar parguwakya Moseyen saba basan hen tagal tagal maryabe al buda gote mere go nurdeb bin ar yamin. Irdeb Stiwen fere tenbe mere yare tukamin. ¹³⁻¹⁴ Irdeb merere gor usi titek yej al kura yawaramin gore huwardeb, “Al garebe, ‘Nasaret nin al Yesu belej Al Kurunyen ya balem gayen pir iryen, irde Mose belej mata ten hinayin yej dunyin goyen wor yade hoyan hoyan yiryen,’ yeke nurtin. Al gabe ya balem gaya Yuda marte tikula goyen wor gwahade po huginen sukal yirde hiyen!” yinamin. ¹⁵ Irkeb merere gabu iramin mar gob Stiwen belej daha mat wol heke nurnin tihit yej tumnan her yej kenamin. Irkeb Stiwen kiminbe al bulak wor po Al Kurunyen miyon yara heke kenamin.

7

Stiwen belej saba tiyyin

¹ Irdeb Al Kurun dolon ird ird mata doyan marte kurunmin belej, “Stiwen, mel gare mere ulger irde han gayenbe fudinde?” yej gusunan iryin. ² Irkeb Stiwen belej wol henbe gaha inyin: “Mel, kadne yago, ga nurnan. Bikken

wor pobe hakwaniniᅇ Abrahambe Mesopotemia naᅇare hinhin. Goᅇ po hikeya Al Kurunᅇ saᅇiᅇmiᅇ turᅇunᅇ yaᅇ goᅇ diliᅇde forok yeᅇbe, ³ ‘Naᅇageya tayge yagoya yubul teᅇbe naᅇa ne beᅇeᅇ gikala gireᅇde gor kwayiᅇ,’ inyiᅇ. ⁴ Irkeb Abraham gobe Kaldia marte naᅇa Mesopotemia goyeᅇ tubul teᅇbe Haran taunde kuᅇ goᅇ hinhin.

“Be, naniᅇbe gor kamkeb Al Kurunᅇ beᅇeᅇ Abraham teᅇ kerke Yudia naᅇa ga hite gayenter wayyiᅇ. ⁵ Gega Al Kurunᅇ beᅇeᅇ megeᅇ tapum muᅇ kura ma unyiᅇ. Hubu wor po. Irde goᅇ hinhinya goyeᅇbe diriᅇ wor hubu. Gega Al Kurunᅇ beᅇeᅇ megeᅇ Abraham keperde hinhin gayen yeᅇya foᅇeᅇmiᅇ yagoya niᅇ tubul teᅇ yunmeke yende kudiᅇeᅇ hiyyeᅇ yeᅇ Abraham hitte biᅇa tiyyiᅇ. ⁶ Goya goyeᅇbe gaha inyiᅇ: ‘Foᅇeᅇge yagot diriᅇeᅇ weᅇbe almet naᅇare kuᅇ albak hinayiᅇ. Irkeb naᅇa miᅇ mar beᅇeᅇ dama 400 gayen gasa yirde buluᅇ buluᅇ yirke meteᅇ muruᅇgem moᅇ teᅇ hinayiᅇ. ⁷ Gega foᅇeᅇge yago buluᅇ buluᅇ yirde hinayiᅇ mar gobe ne gare gab yeᅇeᅇ. Go kamereb foᅇeᅇge yagobe naᅇa go tubul teᅇ waᅇ megeᅇ gayenter doloᅇ nirde hinayiᅇ,’ inyiᅇ. ⁸ Irdeb kame Al Kurunᅇ beᅇeᅇ biᅇa tiyyiᅇ goke, ‘Ne biᅇa teᅇ himyeᅇ goyeᅇ fudiᅇde yeᅇ nurnayiᅇbe geya foᅇeᅇge yagoyabe guba yeᅇ yeᅇ mata teᅇ hinayiᅇ,’ inyiᅇ. Be, kamereb urmiᅇ Aisak forok yiriᅇ. Irkeb urmiᅇ go kawaᅇ hiriᅇde mat kuᅇ naᅇa fay 8 hekeb guba yeᅇ unyiᅇ. Be, Aisakbe kame Yekop naniᅇ hiriᅇ. Irdeb Yekopbe urmiᅇ yago 12 miᅇyaᅇ hiriᅇ. Be, mel goreb hakwaniniᅇ yago hamiᅇ.

9 “Be, hakwaniniñ 12 kura Yosepbe naniñ belen yeñ po amanen nurde igiñ igiñ irde hinhin. Irkeb itiñ yago belen daniñ nenbe gwahade ma dirde hi yeñ biñ ar yekeb kuliñ Yosep niñ igiñ ma nurdeb, ‘Al kura hitte kuñ muruñgem moñ meten ten ten almiñ hiwi,’ yeñ al yunke damu tiyamiñ. Be, Yosep damu tiyamiñ mar gore tenbe Isip kwamiñ. Goyenbe Al Kuruñbe yenya hugiñen hen farañ urde hinhin. 10 Niñgeb kanduk kurayen kurayen yenen hinhin gega, Al Kuruñ belen farañ urde hikeb igiñ po hinhin. Irde dufay igiñ wukken wor po unkeb go hende mata ten hikeb Isip niñ doyan al kuruñ Fero belen igiñ kinyiñ. Be, Fero belen Yosep go dufaymiñ wukken kenenbe Isip naña gote doyan al irdeb dawetmiñ yago tumñañ, ‘Doyañ yirde hayiñ,’ inyiñ.

11 “Be, go kamereb Isip nañaya Kenan nañaya bana gonbe biñge kamde kamde nalu kuruñ wor po forok yekeb hakwaniniñ yagobe biñgem moñ hamiñ. 12 Be, Yosep naniñ Yekop go Isip nañabe biñgem yañ mere momoñ nurdeb hakwaniniñ yago gogo yad yerke kwamiñ. Be, mel gobe Isip ma kuñ hanjen. Tiñen gog po ga kwamiñ. 13 Be, mel go Isip mat tiyuñminde mulgañ hamiñ. Hen henbe sopte Isip kukeb Yosep belen yingen ge, ‘Nebe al gwahade,’ yeñ itiñ yago momoñ yiryiñ. Be, Yosepyen miñ gote mere momoñ goyen Isip niñ doyan al kuruñ wor nuryiñ.

14 “Be, go kamereb Yosep belen naniñ Yekopya dirnen wenya asem yagoya 75 hinhan goke wanañ yeñ keya heke wayamiñ. 15-16 Irdeb gor hinhan. Be, gor hen henbe Yekop go kamkeb

hakwambe ten tiyujminj Sekem tukaminj. Be, Sekem gorbe Hamor urminj yago belen al hakwam yerd yerd ninj hora talde horabok yiraminj goyen Abraham belenj damu tiyyinj. Nijgeb Yekop hakwam gobe tukunj gor po keraminj. Irdeb kame hakwanininj 12 goyen wor kamkeb yukunj gor po yeraminj.

17 “Be, Al Kurunj belenj Abraham hitte binj tiyyinj gote iginenj forok yetek nalu henj hikeb nende al Isip hinhan gobe kurunj bulunj fuful tiyyinj. 18 Goyenterbe al hoyanj kura Yosep ma nurde untinj al gore Isip nanj gote doyanj al kurunj hirinj. 19 Irdeb yingenj iginj henj henj ge po nurde asininj yago usi yirdeb bulunj bulunj yirninj yenj nurdeb, ‘Dirinjinj yago besare ninj goyen yemeyke kamnanj,’ yenj patku yirde hinhin.

20 “Be, goya goyenbe Mose kawanj hirinj. Yenbe dirinj mali yara moj. Al Kurunj dilinde iginj kinyinj. Dirinj gobe Isip mar belenj kennak yenj naninja milinja belenj gagasi karwo gayen yaminj bana po balminj kerde hinaryum. 21 Gega dirinj gobe ya bana balminj kerde hitek ma hekeb naninja milinja belenj tukunj hoyande tubul tikeb Isip ninj doyanj al kurunj Fero wirinj belenj kenenj tenj tukunj yende irde mosoy heke kurunj hirinj. 22 Mose go kurunj henjyabe Isip marte saba karkuwanj kurayen kurayen yawaryinj. Irde mereminja metenjinjyabe tarenj wor po hirinj.

23 “Be, Mose gobe kunj damam 40 hirinj. Be, wawunj kurarebe dinunj Israel mar yene yenj kurinj. 24 Kunjbe Isip al kura gore Israel al kura goyen bulunj wor po irde hike kinyinj. Irdeb

Israel al goyen faran ure yenbe wol hen Isip al go mayke kamyin. ²⁵ Be, Mose gobe dufaymindeb, 'Mata tihim gayen kenenbe Israel mar belen Isip marte haniinde mat dumulgan ten ten al Al Kurun belen basina irtin albe gago yen bebak tahan,' yen nuryin. Gega gwahade mon.

²⁶ "Be, fay urkeb sopte Israel mar hitte kurin. Kunbe Israel mar iraw kura yingen ulin arde hike yinyin. Irdeb daha mat kura mere yirmekeb awalik hiri yenbe, 'Irem, dani ditdigiren ulin arde har? Derbe min unken po geb!' yinyin.

²⁷ Goyenbe al kura kadom mayde bulun wor po iryin al goreb Mose upel urdeb, 'Ganun belen nende doyan al gerde mere sope ird ird al girun?

²⁸ Gwaha tenbe ki Isip al mayke kamun gwahade goyen po niren taha?' inyin. ²⁹ Irkeb mere go nurdeb Mose gobe Isip nin al mayke kamyin goke busaharde Midian marte nanare kurin. Irdeb gon albak henbe bere ten urmin irawa minyan hiri.

³⁰ "Be, Midian marte nanare kun dama 40 gon hinhin. Be, dama 40 goyen kamereb Sainai dugu bindere sawsawa po kurun nana bana gon kurin. Kunbe he dirnen kura goyen kak melak hen humga kutin yara ten hinhinde gor Al Kurunyen miyon forok yeke kinyin. ³¹ Be, Mose gob goyen kenenbe dilin fot yeke bindere kun kenkela po kene yen kurin. Irkeb kak melak hinhinde gor mat Doyan Al Kurunyen mere forok yeke nuryin. ³² 'Nebe Al Kurun, asige yago Abraham, Aisakyabe Yekopya belen dolon nirde hinhan al go goyen,' inyin. Irkeb Mose go kafura hen ulin

barbar yeke kak melak goyen kentek ma iryinj. ³³ Irkeb Doyan Al Kurun belen, 'Ge huwarde hare gabe ne hime. Ningeb al mali watek mon, himam wor po. Ningeb kahanbasange go yugu tiya! ³⁴ Nere alya bereya Israel marbe Isip mar belen bulun bulun yirde han gobe yenen hime. Irdeb ulinj misinj bulun wor po katen han goyen nurdeb Isip marte yufukde mat yumulgan tiye yen katehem. Ningeb ga nura. Sopte Isip gumulgan timeke kwayinj,' inyinj.

³⁵ "Be, Mose gobe han kanya Israel mar belen pel irdeb, 'Ganun belen nende doyan al gerde mere sope ird ird al girun?' inke Midian marte nanare busaharyinj al go goyen. Gega Al Kurun belen, 'Mosebe Israel marte doyan al hiyyen. Irde yende alya bereya Isip marte yufukde mat yumulgan ten yukun asem yago bikken hinhan nanare gor yukuyen,' yenbe ten kerke Isip mulgan hej kurinj. Kukeb Al Kurunyen miyon kak melak bana forok yen mere iryinj gore faran urde hinhin. ³⁶ Irkeb Israel mar goyen Isip nanare mat doyan yirde yukurinj. Nana go tubul tiyenbe Isip nana bana gonbe mata tinen kurayen kurayen Al Kurun belen po yirtek goyen forok yiryinj. Irde makan kura Makan Bukken inen han yende gor manan mata tinen kurun kura forok iryinj. Irde sawsawa nana al ma hitek bana gon dama 40 hinjanya goyenter wor gwahade po ten hinhin.

³⁷ "Be, Mose, go ten hinhin al goreb mel Israel mar goyen gaha yinyinj: 'Kamebe Al Kurun belen den minde ga nin po mere basan almin kura ne yara ten kerke fonjentinj yago hitte wayyen,'

yinyiņ. ³⁸ Be, Mose goreb asininiņ yago Isip tubul tiyamiņ mar goyen tumņañ sawsawa naņa bana goņ gabu yirke gor hinhan. Irkeb Sainai dugure hurkuņ Al Kurunyen miyoņa mere tenbe katen asininiņ yago mere yiryiņ. Yenbe dugure gor henbe miyoņ gore asininiņ yagoya neņ kamekken gake ten Al Kurunyen mere gwahader hitiņ goyen unyiņ.

³⁹ “Be, Mose belen dugure hurkuņ Al Kurunyen mere nuren yenbe asininiņ yago gwaha gwaha tinayiņ yinenbe hurkuriņ. Gega goyen ma gama iramiņ. Gwaha titņenbe meremiņ go pel irde Isip niņ biņ mulgaņ hamiņ. ⁴⁰ Niņgeb Mose go dugure gor po hikeya mel gore itini Aron hitte kuņbe, ‘Kolge Isip naņare mat dad wayuņ al gobe Sainai dugure hurkuņ det kura irde mulgaņ ma hen hi gobe go ma nurde hite. Niņgeb igiņ dinke nindi-geņ det toneņ kura yirde dolon yirtek. Irkeb gore doyaņ dirke kuņ hitek,’ inamiņ. ⁴¹ Irdeb goya goyen gab gol hora belen po bulmakaw foņeņde toneņ iramiņ. Irdeb Al Kurunniņiņ yen dapņa gasa yirde yawaņ galak irde det yiņgeņ haniņde iramiņ goke amaņeņ wor po nuramiņ. ⁴² Irkeb Al Kurun belen goke igiņ ma wor po nurdeb harhok yunke mel gote dufaymiņde po naņkiņde niņ det naņa, gagasiya dinambeya goyen dolon yirde hinhan. Be, goke tenbe Al Kurunyen mere basan mar belen asaņdebe gahade katiņ hi:

‘Deņ Israel mar, dama ⁴⁰ sawsawa naņa bana hinhanya goyenter dapņa gasa yirde galak hen hinhan kurun gobe ne niņ moņ.

⁴³ Irdeb sel ya irde usi tikula al Molek ineni hanyen

goyen bana goŋ kerde doloŋ irde tukun hinhan.

Irde kurabe Refan inenŋ hanyen goyen manan gwahade po irde hinhan.

Det gobe Al Kurunŋ niŋ ma nurde hanyen mar beŋen doloŋ irde hanyen goyen deŋ manan hantiŋde yirde doloŋ yirde hinhan.

Niŋgeb goke teŋbe naŋatiŋde mat dakira timekeb Babilon naŋa gisaw yeŋ nurde haŋ goyen fole irde sorte wor po kuŋ kunayiŋ, 'yitiŋ hi.

Amos 5:25-27

⁴⁴ “Be, Al Kurunŋ beŋen, ‘Sel ya kura gahade irayiŋ,’ inenŋ Mose ikala irde tuŋaŋen unyiŋ. Irkeb asininiŋ yagobe Al Kurunŋ beŋen Mose inyiŋ goyen po gama irde ya go iramiŋ. Irde sawsawa naŋa bana goŋ heŋya, ‘Al Kurunŋbe neŋya hite,’ yeŋ nurde sel ya goyen tukunŋ hinhan. ⁴⁵ Be, go teŋ hinhan mar gobe tumŋaŋ kamde hubu hekeb dirŋen weŋ kame forok yamiŋ mar gore sel ya go tamiŋ. Goya goyenbe Yosua beŋen doyaŋ yirde yukuriŋ. Irkeb Al Kurunŋ beŋen Kenan naŋa miŋ mar goyen yeŋ wa meheŋ heŋ yakira tikeb mel gore kame kuŋbe naŋa go tamiŋ. Be, gor kuŋ heŋyabe Al Kurunŋ doloŋ ird ird sel ya goyen manan teŋ kuŋ hinhan. Be, kame Dewit beŋen Israel marte doyaŋ al kurunŋ hiriŋ goyenter manan sel ya gobe hinhin po. ⁴⁶ Be, Dewit gobe Al Kurunŋ beŋen amaŋenŋ wor po nurde unenŋ hinhin. Niŋgeb hakwaniniŋ Yekop beŋen doloŋ irde hinhin Al Kurunŋ goyen Dewit beŋen, ‘Ya tareŋ ird unmeke gor hiwoŋ,’ yeŋ nurde gusuŋaŋ iryiŋ. ⁴⁷ Goyenbe ya gobe yeŋ beŋen ma iryiŋ. Urmiŋ Solomon beŋen ga iryiŋ. ⁴⁸ Gega det kurunŋ gayen doyaŋ

yirde hi Al Kurun gobe al ya irtin bana gon ma hiyen. Ningeb goke tenbe Al Kurun belen yirin goyen nurdeb mere basan almin Aisaia belen gahade kayyin:

⁴⁹⁻⁵⁰ ‘Be, Al Kurun belen gaha yirin:

Megenya naninyin det kurun gabe nigen yir-mirin.

Irdeb naninbe nere keperd keperd gasun irde, megenbe kahanne kerd kerd det irmirin.

Ningeb ya dahade go goyen irde nunen yen ha?

Ne hen hen gasunbe al belen epte ma ird nun-nayin,’ yirin.

Aisaia

66:1-2

⁵¹ “Be, merebe gwahade yitin gega, denbe ya gake ugun po nurde ya gayen sukal irde hiyen yenbe merere gago nerhan? Den gab tonantin tareh wor po. Denbe Al Kurun nin ma nurde han mar belen ten han yara. Bitinya kirmininyabe titmin wor po. Al Kurunyen mere nurde bebak titek mon. Irde asininin yago belen mata ten hinhan gwahade po den manan Holi Spirit pel irde han. ⁵² Den gayenbe asininin yago belen Al Kurunyen mere basan marbe okohom kura yubul ten hinhan yen nurde han? Mon, hubu wor po geb! Al Huwak wor po kame watek goke tagalde hinhan mar goyen gasa yirke kamde hinhan. Irdeb gayenter al goyen wor forok yeke den belen pel irde mayke kamun. ⁵³ Denbe Al Kurunyen miyon belen Yuda marte tikula Mose unyin goyen asininin yago belen den gayen ga wor wor dunamin. Gega goyen mun kura ma gama irde han,” yinyin.

Horare Stiwen mayke kamyin

⁵⁴ Be, Stiwenyen mere go nurdeb al merere keperde palña irde hinhan mar goreb mam isen bearar tiyamin. ⁵⁵ Gega Stiwen go Holi Spirit belen hard unkeb kotan kan nankinde nankenenbe Al Kurunyen sanin turnun yan goyen kinyin. Irdeb Yesube Al Kurunyen hanin yase belen harde hike kinyin. ⁵⁶ Irdeb, “Ga kenan. Nankin hol yeke Al Urminbe Al Kurun hanin yase belen huwarde hike kenhem,” yinyin. ⁵⁷ Irdeb mere go nurtek ma yirke kwep kwep irde kirmin migisun yurdeb Stiwen hitte kup yen kun tanardebe megen korkor irde tulun ten Yerusalem taun sinare ten kwamin. ⁵⁸ Irdeb Stiwen go maynin yen ulinhormin yugu ten al fonen kura denembe Sol gote kahan minde yeramin. Irde hora yadeb Stiwen mayde hinhan. ⁵⁹ Be, mayde hinhanya goyenbe Stiwen belen huwardeb, “Doyan Al Kurun Yesu, tonnebe hanger kerhem,” inyin. ⁶⁰ Irdeb dokolhon yugulun ten kawan po, “Doyan Al Kurun, mel gare mata bulun tahan gake ma nurayin,” inyin. Be, mere gwahade ten gab bubulkun sul yirin.

8

¹⁻² Goyare goyenbe Sol belen Stiwen kamyin goyen kenenbe igin po kama yen ayan kiryin.

Be, al kura Al Kurun kenkela nurd unen hinhan mar belen al hakwa go tukun mete tenbe doloñde hinhan.

Sol belen yirke Yesuyen alya bereya sios bur yamin

Be, goyenterbe Yesuyen alya bereya sios Yerusalem hinhan go ulinje kanduk kurun wor po forok yeke keneje bur yen kurabe Yudia nanare kwamin, munan kurabe Samaria nanare kwamin. Gega aposel buda 12 gobe Yerusalem gor po hinhan. ³ Be, Sol gobe sios goyen gwaha yirmeke gab bada henan yen nurdeb ya kurar mat kurar kun Yesuyen alya bereya bulun bulun yirde yukun koyare yerde hinhin.

Filipbe Samaria nanare kurin

⁴ Be, al bur yen kwamin mar gobe tiyun kurar mat kurar kunbe mere igin Yesu nin yitin goyen tagalde kun hinhan. ⁵ Be, Filip wor Samaria nanare nin taunde kura gor kun Yesube Mesaia yen kawan po tagalde hinhin. ⁶ Irkeb meremin nurde hinhan. Irde Filip beley mata tinen Al Kurun beley po ga yirtek goyen wor forok yirde hike yeneje mere ten hinhin goyen upsinen nurnin yen wan hinhan. ⁷ Be, Filip beley mata tinen forok yirde hinhin gobe al budam ungura ketal yurtin goyen ungura go yakira tike gisi ten al go yubul ten kat kun hinhan. Irde al ulin simsimamya sisibuga garbam minyan marya kurun goyen wor sope yirke igin hen hinhan. ⁸ Irkeb gor nin marbe amanen wor po nurde hinhan.

Kalga al Saimon

⁹ Be, han karya wor po Filip gor ma kurinyabe al kura denembe Saimon, taun goyenter hinhin. Gor hen yabe megen nin tarende mata ten hike Samaria nana bana gon nin mar beley turun yan kenej hinhan. Irkeb, "Nebe al gwahade,"

yeŋ yiŋgeŋ turuŋ turuŋ irde hinhin. ¹⁰ Irkeb taun goyenter niŋ maryabe doyaŋ mar kuruŋ goreb, “Al gabe tareŋmiŋ kuruŋ. Al Kurunyen Tareŋ ineŋ hanyen gobe gago,” yeŋ dufaymiŋ yeŋ ge po irde gama irde hinhan. ¹¹ Taun goyenter niŋ marbe al gore nalu ulyaŋde po megen niŋ matare mata tiŋeŋ forok yirde hike turnuŋ yaŋ keneŋ gama irde hinhan. ¹² Gega Filip beleŋ taun goyenter kuŋ Al Kuruŋ beleŋ doyaŋ yird yird mataya mere igiŋ Yesu Kristu niŋ yitiŋ goyen tagalkeb alya bereya mere gobe fudinde yeŋ nurdeb baptais tamiŋ. ¹³ Be, Saimon goyen wor Filipyen mere go fudinde yeŋ nurdeb baptais tiriŋ. Irdeb Filip beleŋ mata tiŋeŋ karkuwaŋ kurayen kurayen forok yirke turnuŋ yaŋ keneŋbe Filip go kurar mat kurar kuŋ hikeb gama po irde hinhin.

¹⁴ Be, aposel buda Yerusalem hinhan mar go, “Samaria naŋare niŋ marbe Al Kurunyen mere nurde fudinde yeŋ dufaymiŋ saŋiŋ iran,” yeke mere momoŋ nuramiŋ. Irdeb Pitaya Yonya yad yerke Samaria naŋare niŋ taunde gor kwaryum. ¹⁵⁻¹⁶ Be, irem go kuŋ gor forok yaryum. Goyenbe Yesu niŋ dufaymiŋ tareŋ irde hinhan mar goyen yiŋgeŋbe Doyaŋ Al Kuruŋ Yesuyen al hihit yeŋ fe baptais po tamiŋ gega, al uŋkureŋ muŋ kura Holi Spirit ma tiriŋ goyen nuraryum. Niŋgeb Holi Spirit wor tenayiŋ yeŋ irem gore Al Kuruŋ gusaŋaŋ iraryum. ¹⁷ Goya goyenbe mel gote tonan hende haniŋ yerde Al Kuruŋ gusaŋaŋ irkeb Holi Spirit tamiŋ.

¹⁸ Be, megen niŋ tareŋde mata teŋ hinhin al Saimon go alya bereya Holi Spirit tamiŋ go

yenenbe horamiñ teñ wayyiñ. ¹⁹ Wañbe, “Irem, hora ga duneñ geb, derte sañiñ go nunyi. Irkeb ne wor al kura tonande hanne yermekeb Holi Spirit teñ hinayiñ,” yinen hora go yunen tiyyiñ. ²⁰ Irkeb Pita beñ wol henbe, “Ge gayen Al Kurun beñ Holi Spirit duliñ duneñ hi goyen hora po damu tiyen yeñ nurde ha? Epte moñ geb. Gebe gwahade nurde ha geb, horage goya gigenyabe kak alare po kuriryen. ²¹ Dufay haha gobe Al Kurun diliñdeb bulun wor po geb, meten gabe geya titek epte moñ. ²²⁻²³ Dufaygebe bulun wor po. Beger gobe dufay bulun gore po makin girtin ha. Irde mata bulun gore po tugu guntinyen genhem. Niñgeb dufay bulun haha gobe tubul po teñbe Al Kurun niñ bege mulgan hiyyen. Gogab yeñ beñ gab mata bulunge go halde gunyen,” inyiñ. ²⁴ Irkeb Saimon go mere goyen nurde wol henbe, “Ne niñ teñ Al Kurun gusuñan ird nunayiñ. Irkeb, ‘Gebe dufay bulun gwahade miñyan geb, mata gwahade ulger forok yiyyen,’ ninha goyen ulner ma forok yiyyen,” inyiñ.

²⁵ Be, Pitaya Yonya gobe taunde gor niñ mar Yesu niñ tagalde henya yeñbe Doyan Al Kurun goyen momon yirdeb yubul teñ kwaryum. Yubul teñ Yerusalem mulgan heñ kuñ henyabe tiyun budam Samaria nana bana goñ niñ alya bereya goyen Yesu niñ yitiñ mere igiñ goyen momon yirdya yirdya kwaryum.

Filip beñ Itiopia nanare niñ doyan al kura fe baptais iryiñ

²⁶ Be, go teñ hinaryumya goyenbe Doyan Al Kurunyen miyon kura beñ Filip gaha

inyiņ: “Huwarde naņa ga tubul teņ belen kura Yerusalem mat Isip kurkutiņ hire gor kwayiņ. Kuņbe belen haniņ Gasa taun belen kutiņ keneņbe goyen gama irde kwayiņ,” inyiņ. (Be, Gasa kuņ kuņ belen gobe gayenterbe go ma kuņ hanjen, tubul tiyamiņ.) ²⁷ Be, miyon gore gwaha inkeb Filip go huwardeb belen go gama irde kuriņ. Kuņbe Itiopia naņare niņ al salanneņ deņem yaņ kura waņ hike kinyiņ. Al gobe Itiopia naņare niņ doyaņ bere kuruņ Kandasiyen samuņ doyaņ yird yird al. Yeņbe Yerusalem kuņ Al Kuruņ dolon irdeb mulgaņ heņ naņam kuņ hinhin. ²⁸ Yeņbe nima kura hos belen yuluņ teņ hanjen hende gor keperde kuņ henya be Al Kuruņyen mere basaņ al Aisaia belen asaņde mere kayyiņ goyen kapyaņ heņ hinhin. ²⁹ Be, Holi Spirit belen Filip goyen, “Nima waņ hi goyen bindere kwa,” inyiņ. ³⁰⁻³³ Irkeb Filip gobe kup yeņ nima goyen bindere kuņbe al goyen Al Kuruņyen mere basaņ al Aisaia belen asaņde kayyiņ goyen kapyaņ heņ hike nuryiņ. Be, Al Kuruņyen mere kapyaņ heņ hinhin gobe gahade: “Sipsip gasa yirde hanjen gasuņde sipsip yukutiņ gwahade goyen, yeņ wor mayniņ yeņ tukamiņ.

Al gobe sipsip dirneņ wuyneņ walde hikeyabe balmiņ po hanjen go gwahade goyen yeņ wor mere muņ kura ma tiyyiņ.

Al gobe megen niņ mar belen merere kerde nanyaņ iramiņ.

Irde mere sope ird ird doyaņ marbe mere fudinde goyen ma gama irde buluņ mat kwamiņ.

Al gobe megen niŋ mar belen mayke kamyiŋ. Niŋgeb al ganuŋ belen epte goyenter niŋ marte mata buluŋ kurun gobe gwahade yeŋ tagalyeŋ? Hubu wor po!” yitiŋ hi. *Aisaia 53:7-8*

Be, Filip belen mere go nurdeb Itiopia niŋ al goyen, “Mere kapyaŋ haha gob miŋbe goke yitiŋ yeŋ bebak taha?” inen gusuŋaŋ iryiŋ. Irkeb al goreb, “Moŋ, al gore kura miŋ gwahade niŋ katiŋ ma ninen hiyen. Niŋgeb daha mat miŋ nuren?” inyiŋ. Gwaha inenbe, “Waŋ kepera,” inke Filip gob nima go hende hurkuŋ ketalmiŋde kipiryiŋ. ³⁴ Irkeb al goreb Filip inyiŋ: “Mere gabe Al Kurunyen mere basaŋ al ganuŋ niŋ wor po yitiŋ? Yingen ge ma al hoyan ge? Ge gab bebakken daw nurde ha? Nurde ha kenem igiŋ bebak nirayiŋ?” inyiŋ. ³⁵ Irkeb al gore Aisaia belen mere kayyiŋ kapyaŋ heŋ hinhin gote miŋbe Yesu niŋ yeŋ hi inenbe Yesu uliŋde mata forok yiriŋ goyen momoŋ iryiŋ.

³⁶⁻³⁷ Be, irem go kuŋbe fete kura gor forok yaryum. Irdeb Itiopia al goreb, “Febe ima go hi geb, igiŋ gor baptais nirayiŋ?” inyiŋ.* ³⁸ Gwaha inenbe al goreb meten marmiŋ goyen, “Gar muŋ kura heŋ ga kutek,” yinkeb usaŋ hamiŋ. Irkeb Filip belen al goyen tukun fe bana baptais iryiŋ. ³⁹ Be, irem go fe tubul ten siŋare hurkukeb Doyaŋ Al Kurunyen Holi Spirit belen bemel po Filip bana

* **8:36-37:** Asaŋ kurareb gahade katiŋ hi: ³⁷ Irkeb Filip belen wol henbe, “Gebe mere gayen bubulkuŋger mat fudinde wor po yeŋ nurha kenenbe igiŋ baptais giren,” inyiŋ. Irkeb al gore, “Gwaha, Yesu Kristube Al Kurun Urmiŋ goyen fudinde wor po nurde hime,” inyiŋ.

kerde tenj hoyande kurin. Irkeb Itiopia al gore ma kinyin. Goyenpoga al gobe Yesu nurde unhem yej aman wor po hej nanam kurin. ⁴⁰ Be, Filip gobe Holi Spirit belej bana kerde tukun Asdot taunde irdeb kawan irke forok yirin. Irkeb gor mat Sisaria taunde kwe yej kun henyabe taun kurayan kurayan mere igin Yesu nin yitin goyen tagalde kun kunbe Sisaria taunde forok yirin.

9

Sol belej Yesu nin bin mulgan hirin

¹ Be, Filip belej Samaria nanare kun gwaha tenj hikeyabe Sol gobe alya bereya Yesu nin dufay tarej iramin mar goyen gasa yirde bulun bulun yirtek po nurde Al Kurun doloj ird ird mata doyan mar pris buda gote kurunmin hitte kurin. ² Kunbe gaha inyin: “Damaskus taunde nin Yuda marte gabu ya buda gote doyan mar hitte kunbe dufanne momon yiren. Irmeke faran nurkeb Yesu gama irde han mar kura yenenbe fere yirde Yerusalem gar yawayen. Ningeb asan kan nunayin. Irkeb kun gor nin gabu ya doyan mar yikala yirmekeb faran nurnayin,” inyin.

³ Be, Sol gobe kun Damaskus taun binde hekeb bemel po nankinde mat hushi tarej kura nana folekken kurun gore yej hitte timiyyin. ⁴ Irkeb deldol wor po irdeb megen takten mayyin. Irkeb goya goyenbe al melak kura, “Sol, Sol, danin mununen bulun bulun nirde ha?” yeke nuryin. ⁵ Irkeb Sol belejbe Doyan Al Kurun goyen, “Ge be ganun?” inen gusunan iryin. Irkeb wol henbe, “Nebe Yesu, mununen bulun bulun nirde ha al

goyen. ⁶ Niŋgeb huwara. Huwardeb Damaskus taunde gor kwa. Irkeb al kura goreb gwaha gwaha tiyayiŋ ginyeŋ,” inyiŋ.

⁷ Be, Solya kuŋ hinhan mar goyen wor mere go nuramiŋ gega, al gore kura mere tiya yeŋ ma kenamiŋ. Irdeb ŋakŋak teŋ mere ma tiyamiŋ. ⁸ Be, Sol gobe takteŋ mayyiŋde gor mat huwardeb nankenhem yiriŋ gega, diliŋ kidoma wor po hiriŋ. Irkeb det yentek ma wor po hiriŋ. Irkeb yeŋya kuŋ hinhan mar gore go keneŋbe haniŋde tanarde Damaskus taunde tukamiŋ. ⁹ Tukuke gorbe nankahal karwo gayen diliŋ titmiŋ gwahade po hinhin. Irkeb biŋgeya feya kutŋa irde hinhin.

¹⁰ Be, goya goyenbe Yesu niŋ dufaymiŋ saŋiŋ irtiŋ al kura Damaskus taunde gor hinhin. Deŋembe Ananaias. Be, Doyaŋ Al Kuruŋ beleŋ yuwarwarte forok yeŋbe, “Ananaias,” inyiŋ. Irkeb wol heŋbe, “Doyaŋ Al Kuruŋ, dahade?” inyiŋ. ¹¹ Irkeb gaha inyiŋ: “Tarsus taunde niŋ al kura deŋembe Sol goyen Yudasyen yare heŋ Al Kuruŋ mere irde hi. Niŋgeb Beleŋ Huwak ineŋ hanŋen goyen gama irde kuŋbe yamiŋde forok yeŋbe Sol niŋ gusuŋaŋ irayiŋ. ¹² Yeŋbe diliŋ titmiŋ hiyuŋ goyen yuwarwarte al kura deŋembe Ananaias beleŋ kuŋ igiŋ hiwi yeŋ haniŋ tonanŋde kerde Al Kuruŋ gusuŋaŋ irde hike kinuŋ,” inyiŋ. ¹³ Gwaha inkeb Ananaias beleŋbe gaha inyiŋ: “Doyaŋ Al Kuruŋ Yesu, al budam beleŋ al goke tagalke nurmiŋ. Al gobe ge gama girde haŋ mar Yerusalem haŋ goyen buluŋ wor po yiruŋ. ¹⁴ Irdeb pris buda gote kuruŋmiŋ beleŋ, ‘Kuu

Damaskus gor Yesu doloŋ irde haŋ mar fere tiyayin, inke gar wayuŋ,” inyiŋ. ¹⁵⁻¹⁶ Gwaha inkeb Doyaŋ Al Kuruŋ Yesu belen, “Al gobe metenŋe tiyyen yeŋ hakot basaŋa irmirin. Yeŋ belenbe naŋa kuruŋ gayen kuŋ henyaŋbe al miŋ hoyanya doyaŋ marminyaŋbe Israel marya hitte kuŋ ne niŋ tagalde tukuyen. Yenbe ne niŋ ten kame uliŋ misiŋ kuruŋ katyen goyen ikala ireŋ. Niŋgeb kuŋ ginhem gwahade po irayin,” inyiŋ. ¹⁷ Gwaha inkeb Sol hinhin yare gor kuriŋ. Kuŋ kenenbe haniŋ tonanŋe yerdebe, “Kadne, gar waŋ hikeya Doyaŋ Al Kuruŋ Yesu belen forok yeŋ mere giruŋ al gore nad nerke gago wayhem. Niŋgeb delgebe sopte igiŋ hiriryen. Irde Holi Spirit hard gunyen,” inyiŋ. ¹⁸ Irkeb goyare po det kura makaŋ dapŋa kakafok yara diliŋ pet tike kidoma hiriŋ kuruŋ goyen wok yekeŋ sopte wuk yeke det yinyiŋ. Irkeb Ananias belen tukun fe bana baptais iryiŋ. ¹⁹ Be, baptais tirin kamereb sopte binŋe nekeŋ uliŋ yul yirin goyen taren hiriŋ.

Sol Damaskus taunde heŋ Yesu niŋ tagalyin

Be, Sol gobe Damaskus taunde gor niŋ mar Yesu niŋ dufaymin taren iramin goya nankahal karwo ma sipte gwahade gor hinhin. ²⁰ Irdeb mel goya muŋ kura ulyanŋe ma henyaŋbe aran po sabamin miŋ ure yeŋ Yuda marte gabu yayan kuŋbe, “Yesube Al Kuruŋ Urmin,” yeŋ tagalde kuŋ hinhin. ²¹ Irkeb al buda meremin nuramin mar gore goyen kenenbe hurkunŋat tenbe, “Al gabe Yerusalem gor Yesu gama irde haŋ mar bulun bulun yirdeb gar niŋ Yesu gama irde haŋ

mar wor yad fere yirde pris buda gote kurunjin hitte yuke yen wayun al goyen gago mon? Ningeb daha ten hibe gago?” yen kadam gusunan gird tiyamin. ²² Gega gise hanka Sol beley saba ten hike sabaminbe tonnen yan hen hinhin. Irde, “Yesube Mesaia,” yen hike Yuda mar Damaskus hinhan mar gob gwaha mat kura mere titek mon hamin.

²³ Be, nalu budam hubu hiri. Goyenbe Yuda mar beley gabu irdeb mayteke kami yen sege iramin. ²⁴ Gega al kura beley mel gote dufay goyen momon irke nuryin. Be, mel gobe koya kurun Damaskus taun milgu irtin gote yame karkuwande kurar mat kura Sol go wan sinare kwen tikeb maytek yen wawunya nan kahalya usan minmon yameyan goyan pet ten hinhan. ²⁵ Gega wawun kurarebe Solyen mere nurde gama irde hinhan mar beley hora karkuwan po koya kurun irtin hende hoyan taun go milgu irtin goyen yamen de mat Sol goyen tiri kurun bana kerdeb hulyanalde palgir irke megen kurkurin. Irdeb gor mat Damaskus taun go tubul ten kurin.

Solbe Yerusalem mulgan hiri

²⁶ Be, Sol gobe Damaskus tubul ten Yerusalem mulgan hen kurin. Kun forok yenbe Yesu nin dufaymin sanin irtin mar gor hinhan goyen daha mat kura awalik yirmewon yen kurut yen hinhin. Gega mel gobe Sol Yesu nin dufaymin taren iryin goyen fudinde yen ma nurdeb tumnan yen ge kafura hamin. ²⁷ Gega Banabas beley aposel buda hitte tukurin. Tukunbe Sol gob Damaskus kun henya daha mat Doyan Al Kurun kenke mere

iryiņ, irde Damaskus taunde gor Yesu niņ tagal tagal niņ kafura ma heņ tagalde hinhin goyen momoņ yiryiņ.

²⁸ Be, Banabas beleņ aposel buda go gwaha yinke nurdeb awalik iramiņ. Irkeb mel gore Yerusalem bana Al Kurunyen meteņ teņ hinhan goyen Sol niņ sagurayneņ nurdeb yenya gwaha teņ hinhan. Gorbe Yuda mar hitte Yesuyen deņemde Al Kurunyen saba tagal tagal niņ kafura ma heņ tagalde kuņ hinhin. ²⁹ Gwaha teņ henyabe Yuda mar Grik mere teņ hitiņ goya kadom mohonde teņ hinhan. Irkeb daha mat kura mayteke kami yeņ epte ma tiyamiņ. ³⁰ Gega diņuņ Yesu niņ dufaymiņ tareņ irtiņ mar beleņ mere momoņ go nurdeb Sisaria taunde tukurkamiņ. Irdeb gor mat hakwa hende tiyuņmiņ Tarsus taunde teņ kerke kuriņ.

³¹ Be, Yudia naņaya Galili naņaya irde Samaria naņare niņ sios goyen kanduk karkuwaņ forok yeņ hinhan kuruņ goyen hubu hekeb merem moņ heņ kanduk kura ma keneņ hinhan. Irde saņiņ henayiņ yeņ Holi Spirit beleņ faraņ yurkeb Doyaņ Al Kuruņ niņ dufayniniņ tareņ irniņ yeņ al budam yeņ ge biņ mulgaņ heņ hinhan. Irdeb Doyaņ Al Kuruņ palap irde henya mata teņ hinhan.

Pita beleņ Lida taunya Yopa taundeya kuņ Al Kurunyen meteņ tiyyiņ

³² Be, goyenter Pitabe Israel marte naņa bana goņ niņ tiyuņ kurar mat kurar kuņ hinhin. Kuņ henyabe Yesu gama irde hinhan mar Lida taunde niņ wor kuņ yinyiņ. ³³ Be, gorbe al uliņ simsim hitiņ kura kinyiņ. Deņembe Ainias. Yeņbe dama

8 gayen gasunḡe niḡ hirinḡ. Yinḡen kuḡ waḡ titek epte moḡ. ³⁴ Be, Pita beḡen keneḡbe, “Ainias, Yesu Kristu beḡen guram girde sope gira niḡ, huwardeb ferd ferd gasunḡe go gigenḡ sope ira,” inyinḡ. Irkeb goya goyen po huwaryinḡ. ³⁵ Irkeb alya bereya Lida taunde niḡya Saron naḡa bantotore hinhan mar gore Ainias iginḡ hirinḡ goyen keneḡbe Doyaḡ Al Kurunḡ niḡ dufayminḡ tareḡ iraminḡ.

³⁶ Be, Yopa taundebe Yesu niḡ dufayminḡ sanḡin iryinḡ bere kura hinhin. Deḡembe Tabita. Grik mere matbe Dorkas inenḡ hanḡen. Yenḡbe huginḡen mata iginḡ po teḡ hinhin, irde alya bereya det minḡmoḡ mar faraḡ yurde hinhin. ³⁷ Be, Pita beḡen Lida taunde hinhin goya goyenbe bere go garbam bulunḡ po heḡbe kamyinḡ. Kamkeb bere hakwam goyen he fiminḡ beḡen sam irde utma tiyaminḡ. Irdeb yaminḡ banabe al heḡ heḡ gasunḡbe irawa kurabe hende kurabe bande geb, tukunḡ gasunḡ hende goyenter keraminḡ. ³⁸ Be, Yopa taunde mat Lida taundebe gisaw moḡ geb, Yesu niḡ dufayminḡ tareḡ irtinḡ mar Yopa taunde hinhan gore Pita Lida taunde hinhin goyen nurdeb al irawa kura yad yerke keya kuḡbe, “Ge niḡ po nurde wayhar niḡ, wake araneḡ po kuninḡ,” inaryum. ³⁹ Irkeb Pita go huwardeb al irawa goya Yopa taunde kwaminḡ. Kuḡ forok yekeb Tabita hakwam hinhinde gor teḡ hurkaminḡ. Hurkukeb beretap goḡ doloḡde hinhan goreb milgu irdeb amil kurayen kurayen Tabita dilinḡ henya beretap goke yiryinḡ kurunḡ goyen ikala irde henya esenḡ hinhan. ⁴⁰ Irkeb Pita beḡen bere buda

goŋ hinhan goyen tumŋaŋ yakira tike siŋare kurkamiŋ. Kurkukeb dokolhoŋ yuguluŋ tenbe Al Kuruŋ gusuŋaŋ iryiŋ. Irdeb fulgaŋ kaŋbe bere hakwam goyen, “Tabita, huwara,” inyiŋ. Gwaha inkeb nankeŋeŋ Pita keŋeŋbe huwarde kipiryiŋ. ⁴¹ Irkeb Pita beleŋ haniŋde tanarde isaŋ hekeb huwaryiŋ. Irkeb Yesu niŋ dufaymiŋ tareŋ irde hinhan marya beretap budaya goyen hoy yirkeb waŋ bere goyen kenamiŋ. ⁴² Be, mata forok yiriŋ gote mere momoŋbe Yopa taunde niŋ mar kuruŋ gobe nurde tukutiŋ ala tiyamiŋ. Irdeb al budam Doyaŋ Al Kuruŋ niŋ dufaymiŋ saŋiŋ iramiŋ. ⁴³ Be, Pita go al kura dapŋa sikkeŋ po det yirde hinhin al gote yare nalu ulyaŋde yara po gor hinhin. Al gote deŋebe Saimon.

10

Konilius beleŋ Pita hoy iryiŋ

¹ Be, Sisaria taunde gorbe Roma al kura 100 fulena marte doyaŋ al kura hinhin. Deŋembe Konilius. Fuleŋa mar gobe “Rom niŋ fulena mar” yineŋ hanjen. ² Koniliusya diriŋmiŋmiŋ yagobe tumŋaŋ Al Kuruŋ palap irde yeŋ ge po nurde doloŋ irdeb merem gama irde al bunineŋ faraŋ yurde Al Kuruŋ mere ird ird niŋ biŋ sir ma yeŋ hinhan. ³ Be, wawuŋbana kura 3 kilok gwahaderbe Al Kuruŋ mere ird ird nalu hekeb mere irde heŋya yuwarwarte miyoŋmiŋ kura forok yeke kinyiŋ. Irkeb miyoŋ gore, “Konilius,” inyiŋ. ⁴ Irkeb kafura heŋbe her yeŋ, “Doyaŋ Al Kuruŋ, dahade?” ineŋ gusuŋaŋ iryiŋ. Irkeb miyoŋ gore wol heŋbe, “Al Kuruŋbe ge beleŋ

mere irde hayen goyen nurde hiyen, irde alya bereya buninjen faran jurde ten hayen goyen wor genej hiyen. Yenbe ge nin bin sir ma yen hiyen geb, nad nerkeb gago mere momonj gire yen wayhem. ⁵ Al kura hulyan yirkeb Yopa taunde kunayin. Kunbe al kura denem Saimon, denem kurabe Pita inen hanjen goyen gor hi geb, tupi tenbe mulgan hen wanayin. ⁶ Yenbe Saimon dapna sikkenj po det yirde hiyen al gote yare hi. Yaminbe makan sinja belen mat hi,” inyin.

⁷ Be, miyonj gore gwaha inenbe kukeb Konilius belen metenj marminj irawayabe fulenja alminj unjkurenj kura goya hoy yirkeb yen hitte wayaminj. Fulenja al gobe Al Kurun palap irde yen ge po nurde hiyen al. Yenbe Koniliusya hen faran urde hiyen. ⁸ Wakeb Al Kurunjen miyonj forok yen mere iryin goyen kenkela po momonj yirdeb hulyan yirkeb Yopa taunde kwaminj.

Al Kurun belen yuwarwarte Pita mere iryin

⁹ Be, mel go kunj tiyunde kura gor feraminj. Irde fay urkeb sopte kunj nanja banjahal hekeb Yopa taunde forok yetek hen hinhan. Be, goyareb Pitabe ya yen hinhin gote armomde* Al Kurun mere ire yen hurkurin. ¹⁰ Hurkun Al Kurun mere irde henyabe binje bulun wor po iryin. Be, binjgebe hako kanj hikeyabe yenbe ya hende gor hinhin. Irkeb Al Kurun belen mata kura ikala iren tike ulin kanduk po hirin. ¹¹ Irkeb yuwarwarte nanjinj gerenj yirin. Irkeb det kura

* **10:9:** Yuda marte ya gote armobe bantotok geb, al belen hiryonde iginj hurkun gor keperde usan hen hanjen.

amil yara goyen muruŋ sipte kurhan kurhan al beŋ tanartineŋ irde palgir irke naŋkinde mat megen katyiŋ. ¹² Bana goŋbe dapŋa kahaŋ yaŋ megen huwarde kuŋ hitiŋya, buda, kunereyabe nu kurayen kurayen kuruŋ goyen bana goŋ hike yinyiŋ. ¹³ Be, det go yeneŋ heŋyabe al melak kura nuryiŋ. Gorebe, “Pita, huwarde det go gasa yirde nawa,” inyiŋ. ¹⁴ Irkeb wol heŋbe, “Moŋ, Doyaŋ Al Kuruŋ, badne wor po. Dapŋa gabe delger wukkeŋ moŋ, buluŋ yeŋ hitiŋ gobe neb kura ma nen himyen,” inyiŋ. ¹⁵ Irkeb al melak gore sopte po, “Det kurayen kurayen Al Kuruŋ beŋ yirde diliŋde wukkeŋ yitiŋ gobe ge beŋ wukkeŋ moŋ yeŋ bada ma hawayiŋ,” inyiŋ. ¹⁶ Be, mere gabe wawuŋ karwo gayen Pita hitte forok yeke nuryiŋ. Be, mere go hubu hekeb goyare po det amil yara dapŋa kurayen kurayen bana goŋ miŋyaŋ goyen tumulgaŋ tike naŋkinde hurkurinŋ.

¹⁷ Be, yuwarwarte det kinyiŋ goyen miŋ niŋ dufay heŋ hinhin goya goyabe al karwo Konilius beŋ hulyaŋ yirke wayamiŋ goyen Saimonyen ya niŋ naŋkeneŋ waŋbe ya keneŋbe siŋare huwaramiŋ. ¹⁸ Irdeb, “Saimon Pita ineŋ haŋyen al go goyen gar hi we?” yineŋ al ya bana goŋ hinhan goyen gusuŋaŋ yiraminiŋ.

¹⁹ Be, goya goyenbe Pita go yuwarwarte det kinyiŋ gote miŋ niŋ hako po dufay heŋ hikeb Holi Spirit beŋ, “Saimon, al karwo kura ge niŋ naŋkeneŋ wayhaŋ. ²⁰ Niŋgeb huwarde kurkuŋ yena. Mel gobe ne beŋ po yinmeke ge niŋ wayhaŋ geb, wake kuniŋ ginke goya yeŋya kuŋ kuŋ niŋ kama ma hawayiŋ,” inyiŋ. ²¹ Irkeb Pita go

kurkun mel goyen yenenbe, “Al goke nankenen wayhan al gobe ne gago. Ningeb dahade nurde ne nin nankenen han?” yinen gusunan yiriyin. ²² Irkeb mel goreb, “Nenbe Konilius Roma nin 100 fulenā marte doyan al beley hulyan dirke wayhet. Yenbe Al Kurun palap irde dolon irdeb dilinde huwak igin po hiyen. Irkeb Yuda mar wor tunnan palap irde hanjen. Kibe Al Kurunyen miyon beley forok yenbe Konilius goyen, ‘Al kura hulyan yirke Saimonyen yare Yopa kunbe Pita tupi ten wanayin. Irkeb yen beley gab mere girke nurayin,’ inun geb, gago yen beley hulyan dirke ge gupi ten kunin yen wayhet,” inamin. ²³ Irkeb Pita beley yinke yare hurkamin. Irdeb go wawun gobe gor feramin.

Pita beley Konilius hitte kun Yesu nin tagalyin

Be, fay urkeb Pita go huwardeb mel goya Sisaria taunde kwamin. Irkeb Yesu nin dufaymin taren irtin mar kura Yopa taunde hinhan goyen wor yenya kwamin. ²⁴ Be, sopte fay urkeb kun Sisaria taunde forok yamin. Koniliusbe Yopa kwan mar goyen hanka wan forok yinin tahan yen nurdeb yende minde nin alya bereya dinun yende yende goyen hoy yirke wan gabu irdeb mel go po doyan yirde hinhan.

²⁵ Be, Pita go kun yare forok yen ya bana hurken tikeb Konilius beley Pita palap irde yamere Pita kahan minde dokolhon yugulun ten kuku tiyyin. ²⁶ Irkeb Pita beley, “Huwara! Nebe al gigen yara po nin, gwaha ma nirayin,” inenbe haniinde tanarde isan hirin. ²⁷ Irdeb Pita go Koniliusya mere tenya tenya ya bana hurkunbe al

buda kurun go yinyin. ²⁸ Irdeb gaha yinyin: “Neñ Yuda mar beley den al hoyande ninya awalik heñ gabu heñ heñ gobe nende matarebe bisam irtin geb, go po gama irde hityen. Gob denbe kenkela nurde hañ. Gega Yuda mar mon gobe wukken mon bulun ningeb, Al Kurunya awalik hetek epte mon yen himyen goyen bada hawayin yenbe Al Kurun beley yuwarwarte nikala nirun. ²⁹ Goke tenbe ne nin keya hekeb mere ma timin. Mali po huwardeb wamin. Goyenbe Konilius, gebe dahade nurdeb ne nin keya hawan?” inyin.

³⁰ Irkeb Konilius beley huwardeb gaha inyin: “Gote yeren 3 kilok wawunbana gaha nana gayen yaner heñ Al Kurun mere irde hinhem. Gwaha ten himekeya al kura ulinhormin faykek wor po melak heñ hinhin gore delne mat forok yen huwardebe, ³¹ ‘Konilius, Al Kurunbe mere irde hayen goyen nurde hiyen, irde alya bereya buninon faran yurde hayen goyen wor bin sir ma yen hiyen. ³² Ningeb al kura yad yerkeb Saimon Pita inen hanjen goke Yopa taunde kunayin. Yenbe al kura Saimon inen hanjen gote yare hi. Al gobe dapna sikken po det yirde hiyen. Yaminbe makan sinu beley mat hi,’ ninun. ³³ Be, gwaha ninkeb goya goyen po al yad yermeke ge nin keya kwan geb, gago wayha. Neñbe Doyan Al Kurun beley mere yirayin ginun goyen tumnan momon dirke nurnin yenbe Al Kurun dilin mat gago wan gabu irde doyan girhet. Ningeb igin ten wayha geb, mere goyen momon dira,” inyin.

³⁴ Be, mere go nurdeb Pita beley gaha inyin: “Han kab bebak tihim. Fudinde wor po, Al Ku-

runbe Yuda mar po ma igin yenej hiyen. ³⁵ Al minj kurar nin kurar nin merem hoyan hoyan Al Kurun palap irde dilinde mata huwak po ten han mar go gab igin yenej hiyen. ³⁶ Denbe Al Kurun belej Israel mar nin bikkenj mere kiryin gobe kenkela nurde han. Mere gobe Al Kurun belej megen nin marya awalik hen hen ge ten Yesu Kristu ten kerke katyin goke yitin. Yesu Kristube megen nin mar tumnanj gote Doyan Al Kurun. ³⁷ Denbe mata kurun Yudia nanja bana gonj forok yej hinhin gobe nurde han. Hanjapya Yon Baptais belej Galili nanjare, 'Mata buluntin yubul ten baptais tenan,' yej alya bereya saba yirde hinhin goyen kamere mata kurun goyen forok yirin. ³⁸ Mata kurun gobe gahade: Al Kurun belej Holi Spirit ten kerke Nasaret nin al Yesu go hitte katyin, irde tareminj wor unyin. Irdeb Al Kurunbe yenya hinaryum geb, Yesu gobe Yuda marte nanja bana gonj tiyun kurar mat kurar kunbe alya bereya faran yurde al Satan belej bulun yirke garbam hinhan goyen tumnanj guram yirde sope yirde hinhin. ³⁹ Yesu belej mata kurun Yuda marte nanja bana gonj ten hinhin goya Yerusalem taunde gor ten hinhin gobe dilniniinde wor po kenej hinhet. Gega gor nin mar belej tenj kuruse hende mayke kamun. ⁴⁰ Goyenpoga kamunde gor mat yerenkek hekeb Al Kurun belej isan henbe kawan irke kenan. ⁴¹ Gega al tumnanj ma kenan. Nejen bikkenj Al Kurun belej basinjan dirtin mar po gab Yesu kamunde mat huwarkeb kintin. Irdeb yenya dula ten hinhet. ⁴² Yesube al kamtinjan dilin gergen hanja matamin yenej

bulunya iginya pota yirde murungem yunyen yen Al Kurun belen basina iryinj albe gogo yen tagalde tukunayinj dinun. ⁴³ Yesu goke ten bikken Al Kurunyen mere basan mar belen, 'Al kura kame wayyen goke dufay saninj irkeb Al Kurun belen al goke ten mata bulunmin halde unyen,' yen tagalde hinhan," yen Pita belen Koniliusya yaminde gabu iramin mar goyen yinyinj.

Holi Spirit Yuda mar mon hitte katyinj

⁴⁴ Be, Pita belen saba gwahade ten hinhin goya goyab Holi Spirit belen saba go palna irde hinhan mar hitte katyinj. ⁴⁵⁻⁴⁶ Irkeb mere kurayen kurayen ten Al Kurun turun irde tiyamin. Irkeb Yuda mar Yesu nin dufaymin taren irtinj kura Pitaya wayamin gore go yenen hurkunkat tenbe, 'Al Kurun belenbe Yuda mar mon al min hoyan nende matare ma kutinj gega, yen wor Holi Spirit yuna be!' yamin. Irkeb Pita belen, ⁴⁷ "Mel gabe nen Holi Spirit titinj gwahade goyen po yen wor Holi Spirit tahan ningeb, al ganun belen fe baptais ten ten nin bisam yiryen?" yirin. ⁴⁸ Irdeb, "Denbe, 'Yesu Kristuyen al hihit,' yen Yesu Kristu denemde baptais tenayinj," yinen baptais yiryinj. Go kamereb baptais tamin mar gore Pita goyen, "Nenya mun kura hen ga kwayinj," inen basina iramin.

11

Pita Yerusalem mulgan hirinj

¹ Be, al min hoyan Yuda mar mon wor Al Kurunyen mere nurde gama iran mere momon goyen aposel budaya Yesu nin dufaymin taren

irtin mar Yudia naŋa bana go nin beley nuramin.
² Ningeb Pita mulgan hej Yerusalem hurkukeb Yuda mar Yesu nin dufaymin sanin irtin mar gore igin ma nurde huwardeb Pita goyen, ³ “Ge gayenbe daha tihim yen al min hoyan nende guba mata ma gama irde hanjen marte yare kun dula tayan?” yen bin ar hende mere iramin.

⁴ Irkeb Pita beley mata forok yirin goyen kenkela po momon yire yen min urdeb gaha yinyin: ⁵ “Nebe Yopa taunde hej Al Kurun mere irde hinhem. Irkeb Al Kurun beley mata kura nikala nirej tikeb ulne kanduk wor po hiyun. Irkeb yuwarwarte det kura amil yara goyen murun sipte kurhan kurhan goyen al beley utirin ten tanartinen irde nan kinde mat pangir irke ne hitte katke kinmin. ⁶ Kenkela kenenbe bana gonbe dapna kahan yan megen kun hitinya, buda, kunereyabe nu kurayen kurayen kurun goyen bana gon hike yinmin. ⁷ Irkeb al melak kura nurmin goreb, ‘Pita, huwarde dapna go gasa yirde nawa,’ ninun. ⁸ Irkeb ne beley wol henbe, ‘Mon, Doyan Al Kurun, badne wor po. Dapna gabe delger wukken mon, bulun yen hanjen gobe mun kura ma nitin. Hubu wor po,’ inmin. ⁹ Be, al melak gore sopte po nan kinde mat, ‘Det Al Kurun beley yirde dilinde wukken yitin gobe ge beley wukken mon yen bada ma hawayin,’ ninun. ¹⁰ Mere gobe wawun karwo gayen ne hitte forok yeke nurmin. Be, mere go hubu hekeb goyare po det amil yara dapna kurayen kurayen bana gon minyan goyen tumulgan tike nan kinde hurkun. ¹¹ Irkeb goya goyenbe al karwo Sisaria mat ne

niñ keya kwan mar goyen ya hinhem siñare gor huwaran. ¹² Irkeb Holi Spirit beļenbe, ‘Mel goya kun kun niñ kama heñ bada ma hawayiñ,’ ninuñ. Irkeb mel karwo goya Sisaria taunde kutiñ. Irde kadne 6 Yopa taunde niñ gayen wor gama nirke tumñan Koniliusyen yare kutiñ. ¹³ Kun forok yetekab Konilius beļen nenenbe Al Kurunyen miyon beļen yamiñde forok yeñ mere iruñ goyen momoñ niruñ. Meremiñbe gahade: ‘Al kura Saimon, Pita inen hanjen al gobe Yopa taunde hi niñgeb, al kura yinke yeñ ge keya kunañ. ¹⁴ Yeñ beļen gab Al Kurunyen mere tawan momoñ girkeb geya diriñmiñgeyabe tumñan mere go nurdeb gama irke Al Kurun beļen dumulgan tiyyen,’ inuñ. ¹⁵ Be, hankap ga mere miñ urde hinhem goya goyabe Holi Spirit hankeypaya neñ hitte katun go gwahade goyen yeñ hitte wor katun. ¹⁶ Irke go kenenbe Doyan Al Kurun Yesu beļen Al Kurun hitte mulgan hewe yenya, ‘Yonbe fe baptais yirde hinhin gega, denbe Al Kurun beļen Holi Spiritde baptais diryen,’ dinuñ goyen goya gab bene bak yiyuñ. ¹⁷ Niñgeb Al Kurun beļen Holi Spirit neñ dunuñ gwahade goyen po al miñ hoyan Yuda mar moñ goyen Yesu Kristu niñ dufaymiñ tareñ irkeb yeñ wor yunuñ. Niñgeb daha tihim yeñ ne al nebañen muñ gare Al Kurunyen meten walen? Neb badne wor po!” yinyiñ. ¹⁸ Be, Yuda mar Yesu niñ dufaymiñ tareñ irde hinhan go Pita mere tiyyiñ go fudinde yeñ nurdeb Al Kurun turuñ irde, “Fudinde go. Al miñ hoyan neñ Yuda mar moñ wor Al Kurun beļen biñ bak yirke Al Kurunya awalikde hitek yeñbe mata buluñmiñ

yubul ten yen ge bin mulgan hen han,” yamin.

Antiok nin Yesuyen alya bereya

¹⁹ Be, Yudia nanare nin doyan mar belen Stiwen mayke kamyin go kamereb Stiwen dinun Yesu nin dufaymin sanin irtin mar wor gasa yirde bulun bulun yirde hikeb go mar gobe burgagaw keramin. Irdeb kurabe Fonisia nanare kwamin. Kurabe Saiprus motmotde kwamin. Munan kurabe Antiok taunde kwamin. Mel go burgagaw kerde kwamin mar goyenbe kun mere igin Yesu nin yitin goyen Yuda mar po momon yirde kun hinhan. ²⁰ Gega Saiprus motmotde nin marya Sairini taunde nin mar Yerusalem mat bur yen kwamin gore Antiok taunde kunbe Grik mar gor hinhan goyen wor mere igin Doyan Al Kurun Yesu nin yitin goyen momon yirde hinhan. ²¹ Doyan Al Kurunyen tarenbe mel goya hinhin geb, mere go nurdeb alya bereya budam mata bulunmin yubul ten Yesu nin dufaymin taren iramin.

²² Be, Yerusalem nin sios gore mere momon go nurdeb Banabas ten kerke Antiok kurin. ²³ Kun Antiok gor forok yenbe Al Kurun belen bunin yirde igin igin yirde Holi Spirit yunyin go yenenbe aman nin pultik yirin. Irdeb sanin hen hen ge faran yure yenbe, “Bitinde mat Doyan Al Kurun Yesu gama irde hinayin. Irde yen nin po nurde hinayin,” yinen saba yirde hinhin. ²⁴ Banabasbe al igin wor po, irde Yesu nin dufaymin taren irde hekkej nurde unen hinhin. Holi Spirit belen hard unen ketal urtin hinhin. Ningeb Banabas belen saba yirkeb al budam Yesu nin dufaymin taren iramin.

²⁵ Be, gor matbe Banabas go Sol niñ nan̄kene yeñ Tarsus taunde kuriñ. ²⁶ Kuñ nan̄keneñ keneñbe tupi teñ Antiok wayaryum. Be, go dama goyen Banabasya Solyabe Yesu Kristuyen alya bereya Antiok hinhan goya hen̄be alya bereya budam saba yirde hinaryum. Be, Antiok gorbe Yesu niñ dufaymiñ sañiñ iramiñ mar goyen al siñare niñ mar belej “Kristen” yinamiñ. Dene gob bikken̄be hubu.

²⁷ Be, irem go Antiok hinaryum goya goyenbe Al Kurun̄yen mere basañ mar kura Yerusalem mat Antiok katamiñ. ²⁸ Al kura deñembe Agabus. Yeñ belejbe Holi Spirityen tareñde huwardeb, “Kamebe bin̄ge kamde kamde nalu kurun̄ kura Roma gabman belej nana doyañ ira bana gayen forok yiyyen,” yiriñ. Be, Klodius belej Roma gabmanyen doyañ al hikeya mere tiyyiñ gwahade po forok yiriñ. ²⁹ Irkeb Yerusalem niñ mar farañ yurniñ yeñbe Yesu niñ dufaymiñ tareñ iramiñ mar Antiok hinhan gore hora yirtiñ ala tiyamiñ. Al tumñañ gor hinhan gobe gwahade hite yeñbe goyen po gama irde hora yeramiñ. Horam yañ marbe tolok yeramiñ, munañ al hubu nurdeb bande yeramiñ. ³⁰ Hora gabu iramiñ gobe teñ Banabasya Solya haniñde keramiñ. Irkeb Yerusalem kuñbe tukuñ sios gote doyañ mar yunaryum.

12

Herot belej Yesuyen alya bereya sios bulun̄ bulun̄ yiryiñ

¹ Be, goya goyenbe Yuda marte doyaŋ al kurun kura denem Herot beley Yesuyen alya bereya sios bulun yire yenbe fulenŋa marminŋ yad yerke kun kuraminŋ yawaraminŋ. ² Yawarkeb Herot beley fulenŋa marminŋ yinkeb Yon itinŋ Yemsbe fulenŋare ninŋ bidila po mayke kamyinŋ. ³ Be, Herot beley mata tiyyinŋ goke Yuda mar beley amanŋ heke yenenŋbe Pita wor Yems irminŋ gwahade ire yenbe fulenŋa marminŋ yinke tenŋ fere tiyaminŋ. Goyenbe Yuda marte dula nalu kurun kura beret yis minŋmonŋ nen hanŋyen goyenterbe Pita fere tiyaminŋ. ⁴ Irdeb koyare kerdeb, monŋgo busaharyenŋ yenbe Herot beley fulenŋa marminŋ 16 hulyanŋ yirdeb, “Al sipte beley wa doyaŋ irnayinŋ. Irdeb naluminŋ hubu hekeb al sipte kura beley wor kunŋ gasuŋminŋ tenŋ Pita go doyaŋ irnayinŋ. Gwahade po tenŋ hinayinŋ,” yinyinŋ. Herotbe Pasoba* dula nalu goyen hubu heke gab Pita go sinŋare taktenŋ kawan alya bereya dilinŋde maymeke kamyenŋ yenŋ nuryinŋ. ⁵ Goke tenbe Herot beley fulenŋa marminŋ yinke Pita goyen koyare po kerde doyaŋ irde hinhan. Gega siosbe Al Kurunŋ beley faranŋ uryenŋ yenŋ gusuŋanŋ irtinŋde hinhan.

⁶ Be, gisebe mayteke kamyenŋ yenŋ nuraminŋ

* **12:4:** Bikkenŋ Israel mar Isip nanŋa tubul tenŋ Kenan kuninŋ tiyaminŋyabe Al Kurunŋ beley sipsip al dirinŋ dirnenŋ gasa yirde darim yade yame kantayanŋ sam yirnayinŋ yinyinŋ. Munanŋ al kura gwaha ma tiyaminŋ marbe Al Kurunŋyen miyonŋ beley wanbe mel gote urminŋ matalinŋya dapnaminŋ matalinŋya goyen tumŋanŋ gasa yirke kamaminŋ. Gega mereminŋ gama iraminŋ marbe miyonŋminŋ beley yubul tiyaminŋ goke dufay henŋ henŋ ge dula mata tenŋ hinhan.

goyen wawunbe Pitabe fulenḡa mar irawa kahalte firṡinḡe hinhin. Irde fulenḡa mar irawa hoyanbe yamere huwarde doyanḡ heḡ hinaryum. Pita gobe hinhin gwahade po sen beleḡ haniḡ yase beleḡ feḡ teḡ tukunḡ fulenḡa al kurate haniḡde feḡ titiḡ hinhin. Be, haniḡ tapa wor gwahade po irtiḡ hinhin. ⁷ Irkeb al kura mata gwahade forok yewenḡ tiya yeḡ ma nurde hikeya Al Kurunḡen miyonḡ beleḡ al yad fere yird yird ya bana gonḡ forok yiriḡ. Irkeb ya bana gonḡbe fay urde wuk yeḡ tukuriḡ. Irkeb Al Kurunḡen miyonḡ goreb Pita gegelhek beleḡ tur irde isanḡ heḡbe, “Aranḡ huwara!” inyiḡ. Gwaha inkeb goya goyen po sen haniḡde fere titiḡ hinhin goyen suk yeḡ kataryum. ⁸ Irkeb Al Kurunḡen miyonḡ beleḡbe, “Kahanḡbasanḡgeya uliḡhorge biḡde niḡya yad hor yira,” inyiḡ. Irkeb Pita go gwaha tiyyiḡ. Irkeb sopte po, “Uliḡhorge kurunḡ siḡare niḡ go wor ulger kerde gama nira,” inyiḡ. ⁹ Be, Pita go Al Kurunḡen miyonḡ goyen po gama irde siḡare kurkuriḡ. Goyenpoga Al Kurunḡen miyonḡ beleḡ mata teḡ hinhin gobe fudiḡde farḡenḡde yeḡ ma nurde hinhin. Yeḡbe yuwarwarte teḡ hime yeḡ nurde hinhin. ¹⁰ Be, Al Kurunḡen miyonḡya Pitaya go fulenḡa mar meheḡde niḡ goyen fole yirde kunḡ kura goyen wor fole yirde kunḡ funanḡbe taun bana hurkunḡ hurkunḡ yame kurunḡ ain beleḡ po irtiḡde gor huwararyum. Irkeb yame go momḡonḡde hol yeke kwaryum. Be, muḡ kura kutḡenḡ teḡbe goyare po Al Kurunḡen miyonḡ gobe unḡkel kuriḡ.

¹¹ Irke gab Pita gobe biḡ bak yeke, “Gabe farḡenḡde be! Yuwarwarte moḡ. Yuda marbe

ne niŋ Herot beley mayde gwaha kura ira yeŋ kentek yeŋ nurde haŋ gega, fudinde wor po Al Kuruŋ beley miyoŋmiŋ hulyaŋ irke waŋ nađ siŋa nira,” yiriŋ.

¹² Irde biŋ bak wor po yeke Yon al beley Mak iney hinhan gote miliŋ Mariayen yare kuriŋ. Yare gorbe al budam gabu irde Pita goyen faraŋ uri yeŋ Al Kuruŋ gusuŋaŋ irde hinhan. ¹³ Be, Pita go kuŋbe yame mayyiŋ. Irkeb metey bere kura deŋem Roda beley yame hol ire yeŋ kuriŋ. ¹⁴ Gega Pita beley yame mayde mere tiyyiŋ goyen nurde amaŋ wor po heŋbe yame hol irde miŋmoŋ, kup yeŋ mulgaŋ heŋbe al gabu irde Al Kuruŋ mere irde hinhan mar goyen, “Melya, Pita waŋ yamere hi!” yinyiŋ. ¹⁵ Irkeb mel goreb, “Kukuwa haha?” inamiŋ. Gega, “Moŋ, fudinde wor po Pita be,” yeŋ parsay po hiriŋ. Irkeb, “Moŋ, yende miyoŋ wet?” inamiŋ.

¹⁶ Gega Pita go yame mayde ma nurtiŋey po tiyyiŋ. Irkeb yame hol irdeb Pita keneŋbe tulfut yamiŋ. ¹⁷ Irkeb haniŋ po tuŋaŋ teŋ, “Mere ma,” yineŋbe Al Kuruŋ beley teŋ siŋa iryiŋ goyen momoŋ yiryiŋ. Irdeb, “Yemsya dininiŋ Yesu gama irde hitiŋ mar hoyaŋ wor ne hitte mata forok yihi gake bebak yirnayiŋ,” yineŋbe tiyuŋ hoyande kuriŋ. Be, Yems gobe Yesu kuliŋ irde Yerusalem niŋ sios gote doyaŋ al hinhin.

¹⁸ Be, fulena mar Pita doyaŋ irde hinhan mar gobe wampot huwardeb bana goŋ yeŋ ge naŋkeneŋ tukamiŋ. Gega bepyaŋ miŋmoŋ, hubu wor po. Niŋgeb gwaha kura tiya yeŋ ma nurde ŋakŋak teŋ kandukŋey nuramiŋ. ¹⁹ Be,

Herot belej mere momon go nurdeb fuleja marmij yinke Pita keramij ya bana kurun goyen nankenen tukamij. Gega go ma po kenkeb Herot belej Pita doyan iramij mar goyen, “Wawunbe daha tahan?” yinen gusunen yirdeb bin ar yeke Pita doyan iramij mar goyen gasa yirke kamamij.

Herot kamij

Be, go kamereb Herot go Yudia nanare matbe Sisaria taunde kurun gor mun kura hinhin. ²⁰ Be, goyenterbe Tairya Saidonya taunde nin mar belej Herot daha wet kura iramij. Irkeb Herot gobe bin ar yeke igin ma nurde yunen hinhin. Be, taunde gor nin marbe Herot belej doyan irde hinhin nanare mat binje yade hinhan geb, Herot bin ar yen hinhin goke kanduknen nuramij. Ningeb Herotya awalik hen hen belej nin nankenenbe taunde gor nin mar kura belej Herotyen meten doyan al kura Blastus hitte kwamij. Kunbe mel goya Herotya kanduk minyan hinhan goyen sope irde awalik hini yen Blastus inke igin nuryin. Irdeb yen belej kun Herot inke yen wor igin nuryin.

²¹ Be, Herot belej Tairya Saidonya taunde nin mar mere yire yen nalu kiryinde goyenter hekeb doyan mar karkuwande umna tenbe gote keperd keperd gasunde keperde alya bereya mere yiryin.

²² Irkeb taunde gor nin mar belej turun irde hekhok ten epte ma tenbe, “Gab al belej ma mere tiya! Al Kurun belej mere tiya!” yen kin kabon tiyamij. ²³ Be, Herot gob alya bereya belej gwaha inke aman henbe Al Kurun ma kasor iryin.

Irkeb goke tenbe goya goyen po Al Kurunyen miyon beley wan mayke katiyij. Irkeb goyare po kundu beley diliy gergen hikeya nen natorok irke kamiyij.

²⁴ Be, Herot beley sios buluy irde hinhin gega, Al Kurunyen merebe kuruy hej tukuriyij.

²⁵ Be, Banabasya Solya Yerusalem kwaryum goyen metenminj pasi irdeb Antiok mulgan haryum. Mulgan hej henyabe Yon, Mak iney hanyen goya tumnanj Antiok kwaminj.

13

Holi Spirit beley Banabasya Solya basiña yiryij

¹ Be, Antiok taunde gor niy Yesuyen alya bereya sios bana gonbe Al Kurunyen mere basanj maryabe saba mar kura hinhan. Go mar gote denembe Banabas, Saimon al beley Niger iney hinhan, irde Sairini taunde niy al Lusiusya, Manainyabe Solya. Manain gobe Galili nanja gote doyan al kuruy Herotya tumnanje paka yirke karkuwanj haryum. ² Be, kurarebe go mar goyen binje kutna irde Doyan Al Kuruy dolon irde hike Holi Spirit belenjebe, “Banabasya Solyabe metenne ten hiriryen yey basiña yirmirij. Ningeb yapat yirkeb yenbe hoyan munj po metenj tiyiryen,” yinyij.

³ Irkeb mel go kutnare hej Al Kuruy mere irde hinhan goyen kamereb irem go hende hanij yerde Al Kuruy gusunanj irdeb yubul tike Antiok taun go tubul tenj kwaryum.

Banabasya Polyabe Saiprus motmotde kwaryum

⁴ Be, irem go Holi Spirit belej bul yirke Selusia taunde kurkaryum. Irdeb gor mat hakwa tenbe Saiprus motmotde kwaryum. ⁵ Kunj Saiprus motmotde forok yenbe Salamis taunde kwaryum. Gorbe Yuda marte gabu yayan kunjbe Al Kurunyen mere tagalde hinaryum. Irkeb Yon, Mak inen hanjen gobe irem go faranj yurde hinhin.

⁶ Go kamereb Salamis taunde matbe Saiprus motmot muruj kurhan Pafos taunde kunj forok yaryum. Gorbe Yuda mar al kura kalga mataya soya mataya ten hitin al goyenbe Al Kurunyen mere basan hen tagalde hime yen al usi yirde hinhin. Denembe Ba-Yesu. ⁷ Al gobe gor nin gabman doyan al Sergius Paulus goyen meten faranj urde hinhin. Sergius Paulus gobe dufaymin wuk yitin ningeb, Al Kurunyen mere nure yenbe Banabasya Solya nin keya hirin. ⁸ Gega Ba-Yesu, Grik mere mat Elimas inen hanjen gore irem goke igin ma nurde asogo yirdeb Sergius Paulus goyen daha Yesu nin dufaymin sanin iryenkek yenbe petpet irde hinhin. ⁹ Irkeb Holi Spirit belej Sol, Pol inen hanjen goyen hard unke Elimas kimin mat, ¹⁰ “Gebe mata igin kuruj gayen asogo irde al mata igin gama irnin tike usi yirde pet pet yirde ha. Irde Doyan Al Kurunyen mata fudinde goyen buluj irde ha goyen tubul ma ten ha. Ningeb gebe Satanyen mata po ten ha. ¹¹ Goke tenbe hanjka gabe Al Kuruj belej mata bulunge gote damum gunen tiya. Ningeb delge titmin hiyyen. Irkeb sobamde yara po det kura epte ma yenayin,” inyin. Irkeb goya goyen po gagap yara kidomak kura gore wan dilin pet tiyyin. Irkeb dilin titmin

hekeb ganuñ belen hanner nade belen nikala niryen yen sapsap tiyyin. ¹² Irkeb Sergius Paulus gobe mata forok yirin goyen kinyin. Irde Doyan Al Kurunñ nin saba tagalde hinaryum go nurdeb dinonñ kok yirin. Irdeb Yesu nin dufayminñ taren iryin.

Banabasya Polya Pisidia nanare nin taun kura Antiok kwaryum

¹³ Be, Polya dinuñ waranya go Pafos taunde mat hakwa tenbe Saiprus motmot go tubul ten Pamfilia nana bana nin taun Perga kwaminñ. Gega Yon, Mak inenñ hanjen gobe gor mat irem go yubul ten Yerusalem mulganñ hen kurinñ. ¹⁴ Be, Polya Banabasya gobe Perga taunde matbe taun kura Pisidia nana bana gonñ nin taun Antiok inenñ hanjende gor kwaryum. Irdeb Yuda marte usan nalu Sabat goyenter gabu yaminñde gor hurkunñ keperaryum. ¹⁵ Be, Yuda marte tikulaya Al Kurunñyen mere basanñ mar belenñ asanñde katinñ goyen kura kapyanñ henbe gabu iraminñ gote doyanñ mar belenñ irem goyen yenenñbe, “Irem, derbe alya bereya gar nin tarenñ hinayinñ yen faranñ yurtek saba kura hi kenem iginñ saba yiriryenñ?” yenbe al kura hulyanñ irke kunñ momonñ yiryinñ.

¹⁶ Irkeb Pol belenñ huwarde merene nurnanñ yenbe haninñ po tunanñ tiyyinñ. Irdeb gaha yinyinñ: “Denñ Yuda marya Yuda mar monñ gega, Al Kurunñ dolonñ irde hanñ mar, ga nurnanñ ko. ¹⁷ Yuda marte Al Kurunñ belenñbe asinininñ yago goyen basinñ yirdeb yende alya bereya yiryinñ. Irdeb bikkenñ nanam tubul tenñ kunñ Isip marte nanare hikeb yingenñ faranñ yurde saninñ yirkeb almelminñ

kurun forok yirin. Kamebe nanamde yumulgan tiye yenbe Al Kurun belen yingenđe tarenđe po yirkebe Isip tubul tiyamin. ¹⁸ Belen kun henya al ma hitek nana bana dama 40 gayen mata bulun bulun kurun ten hikebe Al Kurunbe bin misin bulun wor po katen hinhin gega, mel go yubul ma ten hinhin. ¹⁹ Irdeb Israel mar go Kenan nana bana hurkukebe Al Kurun belen megen goyenter hinhan mar almelmin 7 gayen gasa yirde bulun bulun yiryin. Irdeb megenminbe huginen ge yende alya bereya nin tubul ten yunyin. ²⁰ Be, hakwaninin yago Isip kwaminde mat kun kun mulgan hen Kenan megenđe sopte wayamin gobe dama 450 bana gayen mata kurun goyen forok yamin.

“Be, Yuda mar go kun megen yade keperke yenenbe Al Kurun belen alya bereya doyan yirde hinayin yen doyan mar yade forok yiryin. Kun kunbe Al Kurunyen mere basan al Samuel forok yen doyan yirde hinhin. ²¹ Irkebe goyabe Israel mar belen doyan al kurun hoyan nin gusunan iramin. Irkebe Al Kurun belen Benyaminyen minde nin al kura denem Kis gote urmin Sol yunke yen belen Israel marte doyan al kurun hen dama 40 gayen doyan yirde hinhin. ²² Be, Al Kurun belen Sol go bulun tike takira tenbe Dewit ten gasun wol kiryin. Yen gebe Al Kurun belen gaha yirin: ‘Yesi urmin Dewitbe bubulkunne wor po. Amanen nurde unen hime. Dufayne kurun kerde hime gayen yen belen gab gama irde pasi iryen,’ yirin. ²³ Ningeb Al Kurun belen bin ten mere tiyyin goyen po gama irdeb gogo Dewityen

minde mat alya bereya Al Kurun hitte Yumulgan ten ten Al Yesu Israel mar hitte ten kerke wayyin. ²⁴ Yesu go forok yen metenmin ma min uryinyabe Yon Baptais belen wa mehen hen alya bereya mata bulunmin yubul ten Al Kurun nin bin mulgan hen baptais tenayin yen Israel mar tumnan saba yirde hinhin. ²⁵ Yon go metenmin kun pasi irtek binde hen hikeb gaha yirin: 'Nebe ganun yen nurde nunen han? Dumulgan ten ten Al wake kenteke yen doyan irde han yen al gobe ne gago mon. Yenbe ne kamere wayyen. Ne al gahade mun gare epte ma kahan basanminde nin kan yugu tiyen,' yirin.

²⁶ "Ningeb, kadne yago, Abrahamyen minde nin marya den minin hoyan Al Kurun kafura irde yende mere po nurde han mar, ga nurnan ko. Dumulgan ten ten mere gobe nen tumnan gake ten kerke wayyin. ²⁷ Gega Yerusalem marya doyan marminya belen Yesu goyen keneb bebak ma tiyamin. Mel gobe Sabatmin Sabatminbe Al Kurunyen mere basan mar belen mere asande katin goyen kapyan hen hinhan gega, mere gote min bebak ma ten hinhan. Irdeb Yesube bulun usi ten mayteke kami yen mere mayamin. Mata tiyamin gobe Al Kurunyen mere basan mar belen kame mata gwahade forok yiyen yitin goyen po forok yirin gogo. ²⁸ Yesube titminen wor po, min minmon maynin yen Pailat gusunan iramin. ²⁹ Be, he hende mayke kamkeb faran tenbe tukun mete tiyamin. Be, mata tiyamin kurun gobe Yesu nin ten Al Kurunyen mere asande katin goyen gwahade po forok yirin. ³⁰ Goyenpoga bida ma

hiriñ. Al Kurun beleş isañ heke huwaryiñ. ³¹ Go kamereb yenya Galili naña bana mat Yerusalem kun mulgañ heñ hinhan mar goyen hitte wawun budamde forok yeke kenamiñ. Niñgeb gayenterbe mel goreb Yesu niñ Yuda mar saba yirde hañ. ³² Niñgeb deyya beleş mere igiñ Yesu niñ yitiñ goyen momoñ dirde har gago. Be, bikken Al Kurun beleş asininiñ yagot diliñde biña tiyyiñ. ³³ Irdeb gote iginenbe neñ dirneñ weñ hitte forok ire yeñ Yesu kamtiñde mat isañ hiriñ. Yesu goke Al Kurun beleş mere tiyyiñbe Tikiñ Asañde gahade katiñ hi:

‘Nebe nanake. Niñgeb urne ge niñ amañeñ nurd guneñ hime,’ yitiñ. *Tikiñ 2:7*

³⁴ Be, Al Kurun beleş Yesube bida ma hiyyeñ yeñ isañ heke huwaryiñ gobe Al Kurunyen mere basañ al Aisaia beleş asañde gahade kayyiñ:

‘Ne beleş Dewit hitte biña timiriñ goyen fudinde wor po gama irde guram girde tareñ gireñ. Guram gireñ gabe megen niñ al kura beleş epte ma gwaha girtek,’ yitiñ hi. *Aisaia 55:3*

³⁵ Irde Tikiñ Asañdebe Dewit beleş Yesu bida ma hetek goke,

‘Meteñ alge gigeñ tapat irde basaña irtiñ gobe epte ma bida hiyyeñ,’ yiriñ. *Tikiñ 16:10*

³⁶ Al Kurun gwahade mere iryiñ al Dewit gobe Al Kurunyen dufay kurun goyen pasi irdeb kamiñ. Irkeb tukuñ asem yagot dumunde kerkeb bida hiriñ. ³⁷ Gega Al Kurun beleş isañ hiriñ yeñ hite al Yesu gobe bida ma hiriñ. Hubu wor po. ³⁸ Niñgeb al kura yeñ ge dufaymiñ sañiñ iryenbe Al Kurun beleş mata buluñmiñ

halde unyen. Gote sabaminbe gago tagalde har.
³⁹ Niṅgeb, kadne yago, deṅbe Mose beṅen tikula kayyiṅ goyen gama irteke gab Al Kurun beṅen mata bulun miṅmon al huwak dinyen yen nurde han? Mon, epte mon! Goyenpoga al kura Yesu niṅ po dufaymiṅ tareṅ iryen gobe Al Kurun beṅen mata bulun miṅmon, al huwak yen kinyen.
⁴⁰⁻⁴¹ Be, Al Kurunyen mere basan mar beṅen asanḍe gahade katiṅ hi:

‘Deṅ sukal teṅ hanyen mar, nurde ga hinar ko.

Deṅ gayenter niṅ mar hitte det kura forok ireṅ.

Irde mata gob al beṅen keneṅ momon dirnayiṅ gega, usi yen nurnayiṅ.

Niṅgeb deṅbe kame gab keneṅ diltiṅ fot yemanbe kamnayiṅ, yen kayamiṅ. *Habakuk 1:5*

Niṅgeb mere gate igineṅ deṅ ulṅinde forok yenak geb, kenkela heṅ hinayiṅ,” yinyiṅ.

⁴² Be, Polya Banabasya Yuda marte gabu ya goyen tubul teṅ kat siṅare kureṅ tikeb gor niṅ mar beṅen, “Sabat nalu kura imoyenterbe wan saba dirhar gayen teban saba dirke nurtek,” yinamiṅ. ⁴³ Irde gabure gor mat siṅare kuṅbe Yuda marya al miṅ hoyanḍe niṅ Yuda mar mon gega, Yuda marte mata gama irde hanyen mar goreb Polya Banabasya gama yirde kwamiṅ. Irkeb irem goreb mel go mere yirde tareṅ yirye yenbe, “Al Kurun beṅen bunineṅ nurde duneṅ faran durde hi geb, hugineṅ yen ge po nurde gama irde hinayiṅ,” yinaryum.

⁴⁴ Be, kuṅ sopte Sabat nalu hekeb taun bana gor niṅ mar gobe Al Kurunyen mere nurniṅ yen

al budam wor po waŋ Yuda marte gabu yare gor gabu iramiŋ. ⁴⁵ Irkeb Yuda mar Pol niŋ igiŋ ma nuramiŋ gore al budam gabu iramiŋ goyen yeneŋbe daniŋ neŋbe gwahade moŋ yeŋ biŋ ar yamiŋ. Irdeb Pol beŋ mere teŋ hinhin gobe usi teŋ hi yeŋ sukal iramiŋ. ⁴⁶ Gega Polya Banabasya gobe kafura ma heŋbe, “Al Kurunyen merebe deŋ Yuda mar wa nurnayiŋ yeŋ gogo momoŋ diraruŋ. Gega harhoktiŋ uneneŋbe epte ma Al Kurunya hugineŋ hitek yahaŋ geb, gayenterbe epte ma deŋ momoŋ diryeŋ. Gwaha titneŋbe al miŋ hoyoŋ Yuda mar moŋ po gab kuŋ momoŋ yirde hireŋ tahar geb. ⁴⁷ Al Kurunyen mere tukuŋ Yuda mar moŋ hitte kuŋ tagaliryen dineŋ Doyaŋ Al Kuruŋ beŋ meremiŋ asaŋde hi goyen dunyiŋ. Merembe gahade:

‘Gebe hulsi yara heŋ al miŋ hoyoŋ Yuda mar moŋ hike kwa kuruŋ gayen ne beŋ yumulgaŋ tiyeŋ mere goyen momoŋ yirde tukayiŋ.

Irkeb biŋ bak yekeb ne beŋ yumulgaŋ tiyeŋ,’
yitiŋ hi,” yaryum. *Aisaia 49:6*

⁴⁸ Be, al miŋ hoyoŋ Yuda mar moŋ beŋ irem go mere tiyaryum goyen nurdeb amaŋ heŋbe Al Kurunyen mere palap iramiŋ. Irdeb alya bereya Al Kuruŋ beŋ yingeny a hugineŋ hitek yeŋ basiŋa yirtiŋ marbe tumŋaŋ Yesu niŋ du-faymiŋ saŋiŋ iramiŋ.

⁴⁹ Be, Al Kurunyen merebe naŋa bana kuruŋ go tagal tukuke nurtiŋ ala tiyamiŋ. ⁵⁰ Gega Yuda mar beŋ taunde gor niŋ doyaŋ marya bere samuŋ miŋyaŋ Yuda marte tikula gama irde hinhan goyen biŋ yakamamiŋ. Irkeb mel goreb

taunde gor niŋ mar kura yinkeb Polya Banabasya gasa yirniŋ yeŋ buluŋ buluŋ yirdeb, “Taun gayenter ga heŋ ma!” yineŋ yakira tiyamiŋ. ⁵¹ Irkeb gor niŋ mar goyen mata buluŋ tihit yeŋ biŋ bak yenaŋ yeŋbe yende matare kahaŋde tupi busaŋ heŋbe Antiok taun go tubul teŋbe Aikoniam taunde kwaryum. ⁵² Be, Antiok niŋ mar Yesu niŋ dufaymiŋ tareŋ iramiŋ gobe Holi Spirit beleŋ ketal yurke amaŋ heŋ hinhan.

14

Polya Banabasya Aikoniam taunde kwaryum

¹ Be, Polya Banabasya gobe teŋ hinaryum gwahade po Aikoniam taunde gor manaŋ Yuda marte gabu yare kuŋ saba keŋkela po tagalke Yuda marya al miŋ hoyanya goyen budam wor po Yesu niŋ dufaymiŋ tareŋ iramiŋ. ² Gega Yuda mar kura mere go igiŋ ma nuramiŋ mar goreb al miŋ hoyan Yuda mar moŋ biŋ yakamkeb Yesu niŋ dufaymiŋ saŋiŋ iramiŋ mar goyen asogo yiramiŋ. ³ Niŋgeb asogo yirde hinhan goyen fole yirtek yeŋbe Polya Banabasya go nalu budam po gor heŋbe kafura ma heŋya Doyaŋ Al Kurun beleŋ alya bereya bunineŋ nurde faraŋ yurde yawarde hinhin goke tagalde hinaryum. Irkeb gor niŋ mar gore fudinde yenaŋ yeŋbe irem gobe Doyaŋ Al Kurun beleŋ tareŋ yirke mata tiŋeŋ kurayen kurayen forok yirde hinaryum. ⁴ Irkeb taun goyenter niŋ mar kurabe irem goke hamiŋ. Munan kurabe Yuda mar niŋ hamiŋ. ⁵ Irkeb Yuda marya al miŋ hoyanya goyen doyaŋ marmiŋya

gabu irde irem go hora po gasa yirteke kamiryen yenj mere sege iraminj.

Polya Banabasya Listra taunde kwaryum

⁶ Gega irem gobe mere go nurdeb busaharde Likonia nanare ninj taun irawa kura Listraya Derbiya gor kwaryum. Irdeb nana bana go ninj taun binjanj wor kwaryum. ⁷ Kunj gonbe mere iginj Yesu ninj yitinj goyen tagalde tukunj hinaryum.

⁸ Be, Listrabe al kura kahanj simsimam goyen gor hinhin. Yenbe kawanj hiriinde mat po munj kura ma huwarde kunj hitinj. ⁹ Al goyen keperdeb Pol mere tej hinhin goyen kenkela palnja irde hinhin. Irde al gore Polyen mere go fudinde yenj nurde binj hek irke kenenbe Al Kurunj belenj amanej nurde sope iryenj yenj nurdeb Pol belenj dilinj bilminde po kenkela irdeb, ¹⁰ “Huwara!” inyinj. Irkeb bemel po huwarde kunj wanj tiyyinj. ¹¹ Be, al buda kurunj gore Pol mata tiyyinj go kenenbe yende mere mat po, “Baranj marnininj al faknunde hej katahar!” yenj wenjwonj tiyaminj. ¹² Irdeb Banabasbe Sus inaminj. Munanj Polbe tonanj al hej mere tej hinhin goke tenbe Hermes inaminj.

¹³ Be, Sus doloj ird ird yabe taun sinjare hinhin geb, Sus doloj ird ird mata doyanj alya taun goyenter ninj marya belenj Banabas goyen Sus usi tenbe bulmakaw al dirinj yade umnja gitik tenj yukunj kumga tenj irem go doloj yirninj yenj taun yame kurunde gor yawayaminj. ¹⁴ Irkeb Yesuyen mere basanj mar Banabasya Polya gobe gwaha tininj tahanj yeke nurdeb daninj goya gwaha tininj tahanj yenj buninjenj wor po nurdeb ulinjhorminj

erek yirde kup yeŋ kuŋ al buda goyen kahal bana heŋbe, ¹⁵ “Danin gwaha teŋ haŋ? Deyyabe al deŋ yara po geb! Deyyabe Al Kurun gwahader hitin nanŋin, megen, maŋya det kurun gayen yirin al gote mere iŋin gayen momon dirye yeŋ wayaruŋ. Irkeb mata kukuwamnen min minmon teŋ haŋ gahade gayenbe yubul teŋ Al Kurun hitte mulgaŋ henayin. ¹⁶ Bikkenbe Al Kurun beŋ megen nin al tumnan gayen go ma nurde unen hikeb okohom po yubul tike dufayminde po kuŋ hinhan. ¹⁷ Gega Al Kurunbe buninen minyan geb, huginen po ma yubul tiyin. ‘Gwaha yirmeke Al Kurunbe fudinde hi yeŋ bin bak yenayin,’ yeŋbe det iŋin iŋin yunen hiyen. Nanŋinde mat kigarin yunen hiyen. Irde binŋebe naluminde yunen hiyen. Irde binŋe budam yunenbe binde wor aman po makin yirde hiyen. Irde deŋ manan gwahade po dirde hiyen gega, Al Kurun nin ma nurde haŋ,” yinen kwep kwep tiyaryum. ¹⁸ Be, irem gore gwaha yaryum gega, al buda gobe bebak ma teŋ dapŋa gasa yirde irem go galak yirde dolon yirin yeŋ kimnen po hamin.

¹⁹ Be, Yuda mar kura Pisidia nanare nin taun kura Antiokya Aikoniamya mat Listra taunde wanbe al buda kurun gor nin goyen wor bin yakamamin. Irkeb Pol goyen hora po mayamin. Irde kama yeŋbe tulun teŋ taun sinare tukun tubul tiyamin. ²⁰ Gega kamere Yesu nin dufaymin taren irde hinhan mar beŋ wan gabu irde kalyan kerde hikeb geren heŋ huwarde sopte taun bana gon hurkurin. Be, fay urkeb yeŋya Banabasya Derbi taunde kwaryum.

*Polya Banabasya Siria nanjare ninj taun kura
Antiok mulgan haryum*

²¹ Be, Polya Banabasya gobe Derbi taunde kunbe Yesu ninj mere iginj goyen tagalke alya bereya karim ma Yesu ninj dufayminj saninj iraminj. Be, go kamereb irem go mulgan henj Litra taunde kwaryum. Gor matbe Aikoniam taunde kwaryum. Irdeb Aikoniam matbe Pisidia nanjare ninj taun Antiok taunde kwaryum. ²² Taunyanj goyen kunj henjabe alya bereya Yesu ninj dufayminj tarenj irtinj mar goyen, “Kame Al Kurunj hitte kuninj yenjbe okohom ma kutek. Kanduk kurayen kurayen yenenj gab kutek. Ningeb tarenj po henj Doyanj Al Kurunj ninj dufaytinj saninj iranj goyen tubul ma tinayinj,” yinenj saba yirdya yirdya kunj hinaryum. ²³ Kunj henjabe taun kurar ninj kurar ninj al kura Yesuyen alya bereya sios gote doyanj mar yirde kunj hinaryum. Irde binje kutja irde Al Kurunj mere irde henjabe doyanj mar Al Kurunj ninj dufayminj hek irde hinhan mar goyen Al Kurunj belenj doyanj yirde hiyenj yenj Al Kurunj hanijde yerde hinaryum.

²⁴ Be, irem go Pisidia nanja bana gonj metenj tenj kunj kunjbe Pamfilia nanjare forok yaryum. ²⁵ Irdeb kunj Perga taunde Al Kurunjen mere tagalde Atalia taunde kurkaryum. ²⁶ Irde Atalia taunde matbe hakwa tenj mulgan henj Siria nanjare ninj taun Antiok kwaryum. Taun goyen-terbe hanjapya Yesu ninj dufayminj tarenj irde hinhan mar belenj metenj goyen tiyiryenj yinenj Al Kurunj belenj buninjenj yirde faranj yurde hiyenj yenj Al Kurunj hanijde yeraminj. Ningeb metenj go

pasi irdeb mulgañ heñ gor po kwaryum.

²⁷ Be, irem go mulgañ heñ kuñ Antiok forok yenbe gor niñ sios tumñañ gabu yirdeb meten tej kuñ hinaryum goyen momoñ yiraryum. Al Kurun beñ taren yirde farañ yurke daha mat al miñ hoyañ yad yad miñ uraryum goyen goke kenkela momoñ yiraryum. ²⁸ Irdeb Antiok gorbe nalu ulyañde po Yesu niñ dufaymiñ sañiñ irde hinhan marya hinaryum.

15

Polya Banabasya Yerusalem kwaryum

¹ Be, Yesu niñ dufaymiñ taren irde hinhan mar kura Yudia nañare mat Siria nañare niñ taun Antiok kwamiñ. Gor kuñbe Yesu niñ dufaymiñ taren irtin mar gor niñ goyen, “Al kura Yesu niñ dufaymiñ sañiñ irtin gega, Yuda marte tikula Mose beñ kayyiñ goyen ma gama irde guba ma yenayiñ gobe Al Kurun beñ epte ma yumulgañ tiyyen,” yen saba yirde hinhan. ² Irkeb Polya Banabasya beñ sabamiñ goyen igiñ ma nurdeb mere go sopte huwa irye yen mel goya kadom mohonde tiyamiñ. Gwaha tike yenenbe Antiok niñ Yesuyen alya bereya beñ, “Yerusalem kuñ aposel budaya gor niñ sios gote doyañ maryat mohonde wor po mere gate miñ kenkela nurde ga wayyi,” yen hulyañ yiramiñ. Irkeb Yesu niñ dufaymiñ taren irtin mar kuraya kwamiñ.

³ Beñmiñbe Fonisia nañaya Samaria nañayan kuñbe Yesu niñ dufaymiñ taren irtin goyañ niñ mar goyen al miñ hoyañ Yuda mar moñbe daha mat Al Kurun hitte biñ mulgañ hamiñ goyen

momon yiraminj. Irkeb mere go nurdeb amanj wor po haminj. ⁴ Be, kunj Yerusalem forok yaminj. Irkeb gor ninj siosya gote doyanj maryabe aposel budaya belenj amanenj nurde yunenj gargar yiraminj. Irkeb Al Kurunj belenj mel go faranj yurde sanj yirke metenj tenj hinhan kurunj goyen tumnanjde po momon yiraminj. ⁵ Irkeb Yesu ninj dufayminj tarenj irde hinhan goyen kurabe Farisi mar ningeb, mel gore nurde huwardeb, “Al kura Yuda mar monj al minj hoyanjde ninj gore Al Kurunj gama irninj yenjbe nende tikula gama irde guba yenayinj,” yaminj.

⁶ Irkeb aposel budaya sios gote doyanj marya gore, “Mere gabe kanduknenj nurhet ninj, sope irninj,” yenj gabu iraminj. ⁷ Irdeb mere sege irke kunj kunj sobamde po hekeb Pita belenj huwarde gaha yinyinj: “Kadne yago, nende al monj al minj hoyanj goyen mere iginj Yesu ninj yitinj goyen nurde yenj ge dufayminj tarenj irnayinj yenj bikkenj Al Kurunj belenj ne Yuda mar al gayen basinja nirde hulyanj nirke kunj Yesu ninj momonj yirmirinj gobe nurde hanj gogo. ⁸ Al Kurunj, alya bereyat dufay kenkela wor po nurd yunenj hi Al gore nenj Yuda mar wa Holi Spirit dunyinj gwahade goyen po al minj hoyanj wor yuninj. Irkeb Al Kurunj belenj Yuda mar monj wor iginj nurde yunenj hi goyen bebak titirinj. ⁹ Al Kurunjbe gwahade goyen po nenja yenja tunjanđe denenj hi. Ningeb nende al ma yende al kura Yesu ninj dufayminj sanj iryenjbe Al Kurunj belenj iginj ala po mata bulunminj halde pasi iryenj. ¹⁰ Nenj Yuda marte tikula gobe nenja asininj yagoya

belen gama ird ird niŋ metenŋ wor po nurde hityen. Niŋgeb epte ma elan urtek gayen daniŋbe al miŋ hoyan gega Yesu niŋ dufaymiŋ taren irtin gayen kanduk kurun supahakde ugohol tiniŋ ten han? Deŋ gayen Al Kurun tunan urnin ten han? ¹¹ Gwaha ma tinayin. Doyan Al Kurun Yesu belen neŋ dawaryin gwahade goyen po yen wor buninŋ nurde yunenbe faran yurde yawaryin geb,” yinyin.

¹² Be, Pita go merem pasi irkeb Banabasya Polya belen wor mere tikeb dinŋen irde palna iramiŋ. Irkeb irem go Yuda mar mon gote nanayan kun meten ten hikeya Al Kurun belen mata tinŋen kurayen kurayen forok yirde hin-hin goyen momon yiraryum. ¹³ Meremiŋ pasi irkeb Yerusalem niŋ sios gote doyan al kura Yems Yesu kulin belen huwardebe gaha yinyin: “Kadne yago, ga nurnan. ¹⁴ Saimon Pita belen daha mat Al Kurun belen hanƙapya alya bereya kura Yuda mar mon goyen yawarde dirnen wen yiryin goyen momon dirke nurhet gogo. ¹⁵ Pita belen momon dira gobe bikken Al Kurunyen mere basan mar belen asande mere katin gote min goyen po momon dira. Merebe gahade:

¹⁶ ‘Ne Doyan Al Kurun gare yen hime.

Kamebe Dewityen min bulun hitin goyen ne belen mulgan hen wanbe sope iren.

Sope irde gabu irmeke teban taren hiyyen.

¹⁷ Gwaha irmekeb al hoyan belen ne niŋ nanƙennayin.

Yuda mar mon al min hoyan tumnan nenenbe bin mulgan hekeb nere alya

bereya henayin.

¹⁸ Al Kurun gwaha tiyen yen bin tiyyin mere kurun goyenbe al belen hakot nurde hinhan geb,

wan wan gayenter manan nurde hite,' yitin hi.

Amos 9:11-12

¹⁹ Ningeb Yuda mar mon Al Kurun hitte bin mulgan hen han mar goyen ingogaha ma yirtek.

²⁰⁻²¹ Gega Yuda marte tikulabe hakot taunyan taunyan tagalde hinhan. Gayenter wor nen Yuda marte gabu yanininyan Sabatmin Sabatmin huginen gwahade po tagalde hanen geb, mel go hitte asan po kan yunenbe, 'Ungura binje kan yuntin goyen go ma nene hinayin, lelep mata ma ten hinayin, dapna kura bininde fen tike kamtin ma haninde yaka tike kamtin gobe go ma nene hinayin, irde dapna dari wor go ma nene hinayin,' yinen mata gayen po gab utan yirtek," yinyin. Irkeb Yerusalem nin siosyen doyan mar belen Yuda mar mon Yesu nin dufaymin sanin irtin mar hitte asan kayamin.

Yerusalem nin sios belen Yuda mar mon hitte asan kayamin.

²² Irkeb aposel budaya Yerusalem nin Yesuyen alya bereya sios tumnan goyabe mel gote doyan mar belen, "Nende al kura basina irde hulyan yirke Polya Banabasya irde Antiok kunayin," yen mere mayamin. Irdeb Yudas denem kurabe Basabas goya Sailasya yade yapat yiramin. Al irawa gobe Yesu nin dufaymin taren irde hitin mar gote doyan mar. ²³ Irdeb Yerusalem hinhan

mar gore asañ katiñ gobe Antiok kutek mar go yunamiñ. Asañdeb gahade kayamiñ:

“Nenbe aposel budaya Yerusalem niñ sios gote doyañ mar gare asañ gago kañ dunhet.

Denbe Antiok taunya Siria nañaya Silisia naña bana goñ niñ al Yuda mar moñ al miñ hoyañ gega, Yesu niñ dufaytiñ tareñ irde hañ. Niñgeb nenbe kadtin yago.

²⁴ Be, dende mere momoñ nurtinbe al kura gar hanjen gore gor kuñbe den goyen mere kukuwam mat dirke kandukneñ wor po nurañ. Go mar gobe neñ beleñ ma hulyañ yirteke kwan. Yinñeñ dufayminde kuñ mere gogo dirañ. ²⁵ Niñgeb goke tenbe neñ beleñ nenya hite mar kura yade kadniniñ warañ wor po Banabasya Polya irde den hitte kunayin yen goke mere maytin. ²⁶ Irem gobe Yesu Kristu niñ meten ten hike gasa yirde bulun bulun yirke soñ kamde haryen. Gega goke kafura ma heñ metenmin goyen bada ma heñ haryen. ²⁷ Be, nende al yad yerteke kuriryen mar gobe Yudasya Sailasya. Irem gore den hitte kuñ gabe asañ bana gañ mere kañ hite gayen mohoñde wor po momoñ diriryen. ²⁸ Nende dufaybe Holi Spirityen dufayya tunande geb, neñ beleñ Yuda marte tikula goyen tenbe supahaktinde ma ugohol titek. Gobe kanduk kurun wor po. ²⁹ Goyenpoga unğura binçe kañ yuntin gobe go ma nene hinayin, dapña darim ma nene hinayin, dapña kura bininde kañ giti irke kamtin ma haniñde yaka tike kamtin gobe go ma nene hinayin, irde leplep mata ma ten hi-

nayin. Mata bulun gwahade ma ten hinayinbe igin po hinayin geb. Merenininbe gago po,” yamin.

³⁰ Be, mel go asan go tukuñ Antiok taunde forok yamin. Forok yenbe gor nin Yesuyen alya bereya gabu yirdeb asan go yunamin. ³¹ Yunkeb asan go kapyan hamin. Irde mere asande hi gore dufaymin sanin irke aman wor po hamin. ³² Irdeb Yudasya Sailasya wor Al Kurunyen mere basan mar geb, Antiok nin alya bereya Al Kurun nin dufaymin taren irde hitin goyen sanin hen hen ge faran yurye yenbe nalu ulyande po gor hen saba yirde hinaryum. ³³⁻³⁴ Be, irem gobe gor hen henbe Yerusalem kuren tikeb Antiok nin sios belan gabu irde aman hende yad yerke mulgan hen kwaryum.* ³⁵ Gega Polya Banabasyabe Antiok taunde gor hen Doyan Al Kurun nin taun goyenter nin mar goyen saba yirde hinhan. Irem gobe saba mar kadam budam goya gwaha ten hinhan.

Polya Banabasya bur yaryum

³⁶ Be, Antiok taunde gor hen meten ten tenbe nalu kurareb Pol belan Banabas kenenbe, “Hakot taunyañ kuñ Doyan Al Kurun nin saba yirde hinaryum goyen mulgan hen kuñbe kaddere yago Yesu nin dufaymin taren irde hitin mar goyen dahade han goyen kuñ yenye,” inyin.

³⁷ Goyareb Banabasbe, “Yon Mak inen hanjen goyen ten kure,” inyin. ³⁸ Gega Yonbe Pamfilia nanare gor irem go yubul ten busaharyin, irde

* **15:33-34:** Asan hoyandebe gahade hi: ³⁴ Gega Sailas gobe gor hen yen nuryin.

meten untiñ goyen go ma pasi iryiñ geb, Pol belen yenya kuñ kuñ goke igiñ ma nuryiñ. ³⁹ Irkeb gor matbe irem go kadam mohonđe tenbe bur yaryum. Irde Banabasbe Mak ten hakwa hende Saiprus motmotde kwaryum. ⁴⁰ Munañ Polbe Sailas ten kwen tikeb diñuñ Yesu niñ dufaymiñ sañiñ irtiñ Antiok hinhan mar gore, “Iginge kuri,” yinen Al Kuruñ belen doyañ yirde hiyen yeñ Al Kuruñ gusuñan iramiñ. Gwaha yirde yubul tikeb kwaryum. ⁴¹ Be, Polya Sailasya gobe Antiok taun tubul ten Siriaya Silisiaya nanare kuñbe Pol belen gor niñ sios goyen tareñ yirde hinhin.

16

Pol belen Timoti ten kuriñ

¹ Be, gwaha yirdeb kuñ Derbi taunde forok yaryum. Gor matbe Listra taunde kwaryum. Gorbe Yesu niñ dufaymiñ tareñ irde hitiñ al kura deñembe Timoti hinhin. Milinbe Yuda mar bere, irde yeñ wor Yesu niñ dufaymiñ sañiñ irde hinhin. Gega naniñbe Grik al.

² Be, Yesu niñ dufaymiñ tareñ irtiñ mar Listraya Aikoniamya taunde hinhan goreb Timoti al igiñ inen turuñ irde hinhan. ³ Irkeb Pol belen Timotiyen mere momon goyen igiñ nurdeb al go ten kwe yeñ nuryiñ. Gega Timoti naniñbe Yuda mar al mon geb, guba ma yitiñ goyen gor niñ Yuda marbe nurde hinhan. Ningeb Yuda mar gon hinhan mar gore Timoti kenenbe yeñ ge igiñ ma nurd unnayiñ yeñbe Pol belen guba yeñ unyiñ. ⁴ Go kamereb Listra taun tubul ten taun hoyanjan wor kwamiñ. Kuñ henyabe bikken Yerusalem

gor aposel budaya siosyen doyanj marya gore Yuda mar moŋ gega Yesu niŋ dufaymiŋ tareŋ irde hinhan mar goke mere mayde asaŋ kaŋ Antiok niŋ sios yunamiŋ goyen goke momoŋ yirde kuŋ hinhan. ⁵ Irkeb mere go nurdeb goŋ niŋ sios goyen dufaymiŋ saŋiŋ hamiŋ. Irde al hoyan tiŋeŋ manan Yesu niŋ momoŋ yirke gise haŋka al budam yeŋ ge dufaymiŋ tareŋ irde hinhan.

Pol belej yuwarwarte Masedonia al kura kiniŋ

⁶ Gwaha teŋbe mel karwo, Polya Sailasyabe Timotiya go, “Eŋia naŋare kuŋ mere igiŋ Yesu niŋ yitiŋ goyen saba yirniŋ,” yamiŋ. Gega belejmiŋ goyen Holi Spirit belej pet tike Frigiaya Galesiaya naŋare kwamiŋ. ⁷ Gor matbe Misia naŋaya Bitinia naŋaya gote biptire kwamiŋ. Irdeb Bitinia naŋare kuniŋ yekeb goyen manan Holi Spirit belej pet tiyyiŋ. ⁸ Niŋgeb Misia naŋa bana gor kuŋ kuŋbe Troas taunde forok yamiŋ. ⁹ Kuŋ gor henjab wawuŋ kura Pol belej yuwarwarte Masedonia niŋ al kura kenke huwardeb esen mere irdeb, “Masedonia belej gaŋ waŋ faran durayiŋ,” inyiŋ. ¹⁰ Be, Pol belej go tagalke nurdeb, “Al Kuruŋ belej Masedonia niŋ marbe mere igiŋ Yesu niŋ yitiŋ goyen momoŋ yirniŋ yeŋ dikala dira,” yeŋ goyare po gitik teŋ kuniŋ titiriŋ.

Lidia Yesu niŋ biŋ mulgan hiriŋ

¹¹ Be, hakwa kura Troas taunde mat teŋbe Samotres motmotde po kutiriŋ. Irdeb fay urkeb gor mat sopte hakwa go hende po Neapolis taunde kutiriŋ. ¹² Gor matbe kahaŋniniŋde kuŋ

kuŋ Filipai taunde forok yitirin. Taun gobe Masedonia gote taun kurunmin. Roma gabmanyen meten marbe gor heŋ naŋa go doyan irde hinhan. Neŋbe naŋkahal budam yara gor hinhet.

¹³ Be, Sabat nalu kurarebe Yuda mar beŋ gabu irde Al Kurun mere irde hinhan gasun nin naŋkinnin yeŋ taun gote yame kurunde mat kat kuŋbe fete kura gor kutirin. Irde fe siŋakde gorbe bere buda kura gor gabu iramin go yeneŋbe yeŋya keperde mere teŋ hinhet. ¹⁴ Gorbe Taiaaira taunde nin bere kura deŋem Lidia wor bana goŋ heŋ mereninin nurde hinhin. Yende metenbe amil umŋam bukkenya digulakya suluk yirke bukken yara hitin* goyen yirde hike damu teŋ hinhan. Yeŋbe Al Kurun doloŋ irde hinhin geb, Polyen saba go nurde hikeyabe Al Kurun beŋ dufaymin fegelkeb saba gote min biŋ bak yirin. ¹⁵ Niŋgeb yeŋya dirinminminya saba goyen fudinde yeŋ nurdeb baptais tamin. Go kamereb yaminde duke yeŋbe, “Fudinde Doyan Al Kurun nin dufaymin tareŋ ira yeŋ nurd nunhan kenem wake yaner kunin,” dinyin. Irde dinen teban po dirkeb bada heŋ kuŋ yeŋya hinhet.

Polya Sailasya koyare yeramin

¹⁶ Be, kurarebe Yuda mar beŋ Al Kurun mere irde hinhan gasunde kutirin. Gor kuŋ heŋya belenbe bere foŋeŋ kura kintirin. Yeŋbe al kurate meten bere, irde damum moŋ meten teŋ yunen hinhin. Yeŋbe uŋgura beŋ ketal urtin gore dufay unke al hitte kame da mata forok yenayin

* **16:14:** Amil bukken yara gobe doyan marte amil umŋa yirde hanjen.

goyen goke tagalde hiyen. Niŋgeb al beley hora unenbe, “Kame ne hitte da mata forok yiyyen?” yen gusunay irde hanyen. Be, yenbe doyan irde hinhan mar gwaha mat hora budam yade yunen hiyen. ¹⁷ Be, bere gore Polya nenya gama dirdeb, “Mel gabe Al Kurun tonnen yan wor po Al gote meten mar. Mel gabe daha mat Al Kurun beley alya bereya yumulgan tiyyen goke momon dirde han,” yen kuware mere ten hinhin.

¹⁸ Be, bere gore huginen wawun budamde gwaha po dirde hinhin. Irkeb wawun kurare kurab Pol go bin ar yeke tigiri tenbe unura bere go ketal urtin hinhin goyen, “Yesu Kristuyen denemde ginhem. Bere ga tubul ten kat kwa!” inyin. Irkeb goyare po bere go tubul ten kat kurin.

¹⁹ Irkeb bere go doyan irde hinhan mar gore hora ten ten belemi pet tike kenenbe bin ar yamin. Irkeb Polya Sailasya go yanarde yulun ten merere yirni yen taun gote gabu gasun doyan marmin hinhande gor yukamin. ²⁰ Bere doyan irde hinhan mar beley Filipai taun gote doyan mar Roma gabman al hitte yukunbe, “Al iraw gabe Yuda mar al. Irem garebe nen taun gayen bana nin al bulun dirde har. ²¹ Yenbe mata hoyan wor po nen Roma mar gahade gare epte ma titek goyen tagalde har,” yen tagal yunamin.

²² Be, al buda kurun gor gabu iramin go tunnande asogo yirde gasa yirtek yamin. Irkeb doyan mar beley fuleya marmin yinkeb ulinhormin erek yirde yuguya ten yunenbe sikken ulinde yusulak tiyamin. ²³ Yusulak ten bulun

wor po yirdeb yad koya bana yeramiñ. Irdeb koya doyañ al goyen, “Keñkela doyañ yira ko. Monjo, busahariryen geb,” inen hayhay iramiñ. ²⁴ Gwaha inke nurdeb irem go yukuñ koya bana goñ kahalte wor po gwaha mat kura busahartek miñmoñ bana yiryiñ. Irdeb he hakwa al fere yird yird niñ yukuñ yirtiñ hinhande gor kahañ gor yerde sen po giti yiryiñ.

²⁵ Be, wawuñ binde wor pobe irem gore Al Kurun mere irde kasor irde tikiñ heñ hikeb koyare hinhan mar hoyañ beleñ nurde hinhan. ²⁶ Irem go gwaha ten hikeyabe bemel po niniña kurun tikeb koya gote miñ aņsok irde tubul tike yame gor niñ tumñañ siksuk iramiñ. Irde sen koyare hinhan mar giti yiramiñ goyen wor yinğen suk yeñ pasi hamiñ. ²⁷ Irkeb koya doyañ al gore huwarde kuñbe yame tumñañ hol yitiñ yeneñbe al koyare hinhan marbe busaharhañ yeñ nurdeb fuleñare niñ bidilamiñ ten yinğen mayeñ tiyyiñ. ²⁸ Gega Pol beleñ arañ po keneñbe kwep iryiñ. “Gigeñ mayde ma! Neñbe tumñañ po hite geb!” inyiñ.

²⁹ Goyarebe kidoma bana mere irde hinhin geb, koya doyañ al gore hulsi niñ hoy yiriñ. Irkeb hulsi tawañ unkeb kup yeñ hurkuñ irem go diliñde kafura hende uliñ barbar yeñ kuñ kuku kayyiñ. ³⁰ Gwaha tenbe siñare yade katyiñ. Irdeb, “Irem, daha timeke gab Al Kurun beleñ nawaryeñ?” yineñ gusuñañ yiryiñ. ³¹ Irkeb, “Dufayge Yesu Kristu niñ po sañiñ irayiñ gab Al Kurun beleñ gumulgañ tiyyeñ. Irde ge niñ ten diriñmiñge tumñañ gwaha tinayiñbe yeñ wor yumulgañ

tiyyen,” inaryum. ³² Irkeb al gore dirinminmin hoy yirke wakeb Polya Sailasya beley tumnande Doyan Al Kurun nin saba yirde momon yiraryum. ³³ Be, go wawun goyen po koya doyan al gore irem go ulinde dariya usuya goyen halde yuntek gasunde yukun halde yunenbe mala tiyyin. Gwaha yirkeb goyare po irem gore mel goyen tumnan baptais yiraryum. ³⁴ Go kamereb irem go yaminde yukun binje yunke naryum. Be, al goya dirinminmin yagobe Al Kurun nin dufaymin taren iramin goke aman wor po hamin.

³⁵ Be, fay urke wampotbe taun gote doyan mar beley, “Koya doyan al go inke al irawa yad fere tiyun goyen yubul tike kuri,” yen fulen marmin hulyan yirke kun inamin. ³⁶ Irke koya doyan al gore Pol goyen, “Taun doyan mar beley yubul tike kuri ninhan ningeb, iginje bitirin kamke kuri,” inyin. ³⁷ Gega Pol beley hardeb fulen mar goyen yinyin: “Mon, deyyabe Roma mar al gega, kibe dulin wor po min minmon al dilinde dusulak dirde koyare deran. Munan hankebe balmin kuri dinhan? Mon, deyyabe epte ma gwaha tiyen. Yinke wan yingen dade sinare dukunayin,” yinyin. ³⁸ Irkeb kun taun doyan mar hitte mulgan henbe, “Irem gobe Roma mar al ney beley mali gasa yirtek mon gega, bulun yirtin,” yinkeb kafura hamin. ³⁹ Irde wan irem go pohogay yirdeb koyare mat yukun sina yirdeb, “Dubul ten hoyande kuri,” yinamin. ⁴⁰ Gwaha yirkeb katen sinare henbe Lidiyen yare kwaryum. Kun gorbe Yesu nin dufaymin taren irde hinhan mar yenenbe saba yirde sanin

heñ heñ ge farañ yurdeb yubul tiyaryum.

17

Polya dinuñ waranyabe Tesalonaika taunde kwamiñ

¹ Be, Polya dinuñ waranyabe Amfipolis taunya Apolonia taundeya kuñ gor matbe Tesalonaika taunde forok yamiñ. Gorbe Yuda marte gabu ya kura hinhin. ²⁻³ Be, Polbe teñ hinhin gwahade po Tesalonaika taunde gor manañ Yuda marte gabu yare kuriñ. Irdeb Sabat nalu karwo gayen gor kuñbe al wañ gabu irde hinhan mar goyen Al Kurunyen asañde Mesaia kame wayyen yitiñ al goke momoñ yirde hinhin. Mesaia gobe uliñ misiñ kurun kateñ kamdebe huwaryen yitiñ goyen Al Kurunyen asañde mat miñ pitik irde momoñ yirde hinhin. Irdeb, “Ne belej Mesaia niñ dinen hime al gobe Yesu,” yinyiñ. ⁴ Gwaha yinke nurdeb Yuda mar kurabe Polyen saba go fudinde yeñ nurde Polya Sailasyat mere gama iramiñ. Goyenbe mel go po moñ. Grik mar gega Al Kurun kafura irde hinhan goya taun goyenter niñ doyañ marte berem weñ manañ budam po gwaha tiyamiñ.

⁵ Gega Yuda mar kurabe al budam belej irem gote saba po gama irkeb goke biñ ar yamiñ. Irdeb taun bana goñ al budam gabu irde hinhan gasuñde gor kuñ al dufaymiñ buluñ goyen gabu yirde fuleña tinañ yeñ biñ yakamamiñ. Gabu irke al budam wor po hekeb taun binde gor kwep kwep teñ det gwamuñ tenya tenya kwamiñ. Irdeb irem go yade yukuñ kawan alya bereya diliñde

yirniñ yeñbe yeñ ge teñ Yesonyen yare kwamiñ. ⁶ Gega irem go gor ma yeneñbe Yesonya diñuñ yago Yesu niñ dufaymiñ sañiñ irde hinhan mar kura yade yuluñ teñ taun doyañ irde hinhan mar hitte yukamiñ. Irde mel goreb, “Polya diñuñ yagoya gayenbe naña kurun goyen kuñ heñbe kanduk karkuwañ forok yirde kuñ hanñen gore gar wayañ. ⁷ Irkeb Yeson beleñ yamiñde yerde hiyen. Yesonyen yare gabu irde hañ mar gobe Roma gabmanyen doyañ al kurun Sisaryen mere ma gama irde hañ. Irde, ‘Doyañ al kurun hoyañbe al kura Yesu inen hanñen go po ga hi,’ yeñ hañ,” yeñ taun doyañ mar diliñde misiñen yañ po tagalamiñ.

⁸ Irkeb taun doyañ marya al gor gabu iramiñ mar gobe biñ ar yamiñ. ⁹ Irde Yesonya kadom yagoya goyen, “Mata bulunñiñ goke murunñem kernañ,” yinke gwaha tiyamiñ. Irkeb, “Kamebe sopte gwaha ma tinayiñ,” yinen yubul tike mulgañ heñ kwamiñ.

Polya Sailasya Beria kwaryum

¹⁰ Be, gwaha tiyamiñ goyen wawuñ hekeb Tesalonaika niñ mar Yesu niñ dufaymiñ tareñ irtin mar beleñ Polya Sailasya goyen yad yerke Beria taunde kwaryum. Kuñ gor forok yeñbe Yuda marte gabu yare kwaryum. ¹¹ Beria taunde niñ Yuda marbe Tesalonaika niñ yara moñ. Yeñbe irem gore Yesu niñ mere tagalde hike aw aw ma yurde palña yirde hinhan. Irdeb irem gote mere gob fudinde ma usi goyen bebak tiniñ yeñ Al Kurunñen mere asañde hakot katiñ goyen gise hanñka kapyañ heñ gor niñ mere keneñ bebak teñ

hinhan. ¹² Irde gor niñ Yuda mar budam Yesu niñ dufaymiñ tareñ iramiñ. Goyenbe mel go po moñ. Al miñ hoyañ Grik alyabe bere denem yanja goyen wor Yesu niñ dufaymiñ sañiñ iramiñ.

¹³ Be, Pol beleñ Al Kurunyen mere Beria taunde gor tagalde hinhin gote mere momoñ gobe Tesalonaika niñ Yuda mar beleñ nurdeb gor wor kwamiñ. Irdeb gor niñ mar goyen biñ yakamde dufaymiñ haga yiramiñ. ¹⁴ Gwaha tike yenenbe goyare po Beria niñ mar Yesu niñ dufaymiñ tareñ irde hinhan gore Pol go teñ kerke makañde kurkuriñ. Munañ Timotiya Sailasyabe gor po hinaryum. ¹⁵ Be, Pol go al kura beleñ maynak yenbe yenya kwamiñ mar gore tukun Athens taunde tubul tiyamiñ. Irdeb mulgañ hiniñ tikeb Pol beleñ mel goyen, “Timotiya Sailasya yinke arañeñ po wañ gar nupi tiyiryen,” yinyiñ.

Polbe Athens taunde kuriñ

¹⁶ Be, Pol go Athens taunde heñ irem goyen doyañ yirde henyaabe taun binde gor Al Kuruniniñ usi teñ det toneñ yirtiñ goyen budam wor po yeneñ dufaymiñ kandukneñ wor po hiriñ.

¹⁷ Irkeb Yuda marte gabu yareb nalumde kun Yuda marya Grik marya Al Kurun kafura irde hinhan goya mere teñ saba yirde hinhin. Irde gise hanca hugineñ taun binde al budam kun wañ teñ hinhande gor kun al gor hinhan goyen Al Kurunyen mere saba yirde hinhin.

¹⁸ Mere igiñ Yesu niñ yitiñ goyen tagalde henyaabe Yesu mayke kamde huwaryiñ goyen goke saba yirde hinhin. Goyen saba yirde hikeyabe al kura Epikuriayen dufay gama irde

saba teŋ hanŷen marya dufay hoyan kura Stoik yeŋ hanŷen gote saba teŋ hanŷen marya gore Polyen saba goyen nurdeb yeŋya kadom moŋde tiyamiŋ. Irdeb go mar goyen kura belen, “Al gabe daniŋ malikan lawlaw yeŋ hi?” yamiŋ. Irkeb al hoyan kura belen, “Al gabe tikula hoyan niŋ diniŋ hi,” yamiŋ. ¹⁹ Gwaha yeŋbe Atens taunde gor niŋ doyan mar belen gabu irde hanŷen gasuŋ Areopagus inen hanŷende gor kuŋ ga mere titek inenbe Polya tumŋan kwamiŋ. Irde gor kuŋbe, “Saba gergen tagalde ha goyen keŋkela miŋde mat momoŋ dira. ²⁰ Ge belen dufay gergen kura neŋ ma nurde hityen goyen tagalde ha gote miŋ nurtek niŋgeb, momoŋ dira ko,” inamiŋ. ²¹ (Be, Atens taun gote miŋ marya al hoyande niŋ waŋ gor hanŷen maryabe duliŋ po heŋ dufay gergen po nurtek yirde hinhin. Irde dufay gergen goke po tagalke kuŋ kuŋ wawuŋ yurde hinhin. Hugineŋ gwahade po teŋ hinhan.)

²²⁻²³ Be, mel gore gwaha inke Pol belen gabu gasuŋ Areopagus inen hanŷende gor huwardeb gaha yinyiŋ: “Deŋ Atens niŋ mar! Tauntiŋ bana gayen kuŋ waŋ teŋ heŋyabe deŋ belen doloŋ yirniŋ yeŋ det toneŋ kurayen kurayen rindam yaŋ yirtiŋ goyen budam wor po yinmiŋ. Gega rinda kurabe det toneŋ miŋmoŋ hike kinmiŋ. Irdeb bindere kuŋ gorbe, ‘Rinda gabe Al Kurun kura go ma nurd unen hite gote gasuŋ,’ gwahade katiŋ hi goyen kinmiŋ. Goke teŋ deŋbe Al Kurun fudinde doloŋ irtek nurde haŋ yeŋ denen hime. Niŋgeb deŋ belen keŋkela ma nurde unen haŋ Al Kurun fudinde wor po goyen goke momoŋ

direnj tihim. ²⁴ Al Kurunj gobe megenya nanjinya irde det kurunj gayen yiryinj. Yenbe megenya nanjinya gote Doyanj Al Kurunj. Ningeb yenbe al belenj dolonj irninj yenj ya irde unhet yenj hanjen bana gonj ma hiyen. ²⁵ Yenbe tonnininj dunyinj geb, gago dilnininj gergenj hite. Irde det buda kurunj gayen wor yenj belenj dunyinj. Yenbe det buda kurunj gote minj al geb, det kuranj ma amu henj hi. Ningeb det kura hannininj irde untek epte monj. Hubu wor po! ²⁶ Hanjkapya wor pobe yingenj al unjkurenj iryinde gor mat po al minj hoyanj kurayen kurayen gogo forok yaminj. Irde megenj ga tenj keperde tukaminj. Al Kurunjbe dufayminj epte. Ningeb nenj ma forok yitirinja gwaha nanja forok yenayinj, irde damde hinayinj goyen yingenj dufayminj nurde hinhin. ²⁷ Be, Al Kurunj gisaw ma hi al gore, 'Det kurunj yirmirinj gayen al belenj yenenbe ganunj belenj yiryinj yenj ne ninj sar kernayinj. Irdeb nenenbe fudinde yenj nurdeb ne hitte wanayinj,' yenj mata kurunj gogo tiyyinj. ²⁸ Be, Al Kurunjbe gisaw ma hi goke tenjbe al kura belenj, 'Nenbe Al Kurunjen tarende tonnininj yanj henj kunj wanj tenj binininj fut irde hite gago,' yirinj. Yirinj gwahade goyen po dende al kura belenj, 'Nenbe Al Kurunjen dirnenj wenj,' yenj tikiinj bilminj kayyinj. ²⁹ Fudinde nenjbe Al Kurunjen dirnenj wenj ningeb, Al Kurunjbe al dufayde det tonenj kura gol, silwaya hora belenj yirtinj gwahade yenj ma nurtek. ³⁰⁻³¹ Bikkenjbe Al Kurunjbe gwahade yenj ma nurde unenj hinhet gega, goke dinenj ma tenj hinhin. Gega yenj belenj nalu goyenter yirinde gorbe megen

niņ alya bereya tumņañ igiņya buluņya goyen pota yiryen. Niņgeb gayenterbe, ‘Megen niņ al tumņañ mata buluņmiņ yubul teņ Al Kuruņ niņ biņ mulgaņ henayiņ,’ yineņ hi. Be, nalu goyenterbe Al Kuruņ beleņ basiņa irde meten untiņ al gore keņkela po megen niņ al tumņañ pota yiryen. Be, mata gwahade forok yiyyen goyen al tumņañ fudinde yeņ nurnayiņ yeņ Al Kuruņ beleņ al go kamyiņde mat isañ heke huwaryiņ,” yinyiņ.

³² Be, Pol beleņ Yesu kamde ga huwaryiņ goke yeke nurdeb, “Al ga usi wet kura dirde hi be,” yeņ hinmaņ iramiņ. Munaņ kura marbe, “Kame ga mere go sopte momoņ dirayiņ,” inamiņ. ³³ Be, Pol go gabu gasuņ goyen tubul teņ kuriņ. ³⁴ Be, gorbe al budam moņ, yuņkureņeņ kura gore Polyen saba gobe fudinde yeņ nurdeb gama irde Yesu niņ dufaymiņ saņiņ iramiņ. Goyen mar goyen kurabe doyaņ marte gabu gasuņ Areopagus ineņ hanyende gor kuņ hiyen al kura Dionisius. Munaņ kurabe bere kura deņem Damarisyabe al hoyañ kura goya.

18

Polbe Korin taunde kuriņ

¹ Be, Pol go Atens taun tubul teņbe Korin taunde kuriņ. ² Gorbe Yuda mar al kura deņembe Akwilaya berem Prisilaya hike yinyiņ. Be, al gobe Pontus naņare kawaņ hiriņ, irdeb kuņ Itali naņare hinhin. Gega Roma gabmanyen doyaņ al kuruņ Klodius beleņ, “Yuda marbe Itali naņare

niņ taun kurun Rom ga tubul ten hoyande kunayin,” yirin. Irkeb ire unya gobe Itali nana go tubul ten Korin taunde wayaryum. Irde gor sobamde ma hikeya Pol wake kenaryum gogo. ³ Be, Akwilabe dapna sikken po sel haran hen hen al. Irde Pol manan meten goyen po ten hora ten hiyen geb, ire unya goya hen tumnan meten go ten hinhan. ⁴ Irdeb, ‘Daha mat kura Yuda marya Grik marya gayen saba yirmeke Yesu niņ dufaymin taren yirnan,’ yen Sabat nalumin nalumin huginen Yuda marte gabu yare kun saba yirde hinhin.

⁵ Be, gor hen gwaha ten hikeyabe Sailasya Timotiya gobe Masedonia nanare mat wayaryum. Wakeb sel ya yird yird meten go tubul ten Al Kurunyen mere goyen po tagalde, “Fudinde Yesube Mesaia,” yinen saba yirde hinhin. ⁶ Gega Yuda mar gobe Pol beken saba yiryn go ma nurtek yirke sukal irde hinhan. Irkeb Pol beken mel goyen, “Al Kurunyen mere saba dirde hime gayen ma nurhan geb, kame kanduk kura forok yiyyen gobe dende samun. Neya neya mon. Nebe dubul ten Al Kurunyen mere tukun al min hoyan po ga momon yirde hen geb,” yinenbe mel goyen nindiken bulun tihit yen kenen bebak tinayin yen nurdeb Yuda marte matare ulinhormin busan hirin. ⁷ Irde yubul ten Titius Yastusyen yare kurin. Yamin gobe Yuda marte gabu ya sinakde gor hinhin. Yenbe Yuda mar al mon gega, Al Kurun dolon irde hiyen. ⁸ Be, gabu yare gor gabu irde hinhan mar gote doyan al Krispusya dirinmin tumnan Polyen saba nurde Doyan

Al Kurunj niŋ dufaymiŋ tareŋ iramiŋ. Al hoyan Korin taunde niŋ manaŋ budam Yesu niŋ dufaymiŋ saŋiŋ irde baptais tamiŋ.

⁹⁻¹⁰ Be, gor henyaŋe wawuŋ kura yuwarwarte Doyaŋ Al Kurunj forok yeŋbe, “Nere al budam taun gayenter haŋ geb, al kura beleŋ epte ma muguneŋ buluŋ buluŋ giryeŋ. Irde nebe geya har geb, al saba yird yird niŋ kafura heŋ bada ma hawayiŋ. Hugiŋeŋ tagalde po hayiŋ,” inke Pol go kinyiŋ. ¹¹ Be, Polbe dama uŋkureŋ irde gagasi 6 gayen gor heŋ Al Kurunyen mere saba yirde hinhin.

Yuda mar beleŋ Pol merere keramiŋ

¹² Be, Roma al Galio beleŋ Akaia naŋa doyaŋ irde hikeya gor niŋ Yuda mar beleŋ gabu irde Polbe Akaia naŋa gote taun Korin hinhin goyen fere teŋ merere keramiŋ. ¹³ Merere tukuŋbe doyaŋ al Galio diliŋde gaha inamiŋ: “Al garebe mata hoyan mat Al Kurunj dolon irde hinayiŋ yeŋ al saba yirde Yuda marte tikula ma gama irnayiŋ yineŋ hi,” inamiŋ. ¹⁴ Irkeb Pol beleŋ hako ga mere goyen wol heweŋ tikeyabe Galio beleŋ Yuda mar go, “Al gare al kura mayke kamuŋ ma mata buluŋ kura tiyuŋ manhan dende mere ga nurme-woŋ. ¹⁵ Gega mere yahaŋ gabe deŋ Yuda marte deŋeya mereya niŋ po kadom mohonde teŋ haŋ. Irde tikulatiŋ ge po ŋagak yahaŋ gobe dindiken po mere go sope irnayiŋ. Nebe meretiŋ gayen go ma nureŋ,” yinyiŋ. ¹⁶ Irdeb merere mat yakira teŋbe, “Siŋare kunaŋ!” yinyiŋ. ¹⁷ Irkeb Yuda mar go biŋ ar yeke tigiri teŋ yende gabu yare gabu irde haŋyen mar gote doyaŋ al Sostenes goyen

mere gasunđe go po mayde mayde keramiņ. Gega Galioibe yeneņ wasak tiyyiņ.

Pol mulgaņ heņ Siria naņare niņ taun Antiok kuriņ

¹⁸ Be, Pol gobe Korin sobamde heņbe Siria naņare mulgaņ hewe yeņ Prisilaya uņ Akwilaya yade gor niņ mar Yesu niņ dufaymiņ tareņ irtiņ mar go yubul teņ makaņ siņare niņ taun Senkria kuriņ. Irde gor kwe yenyabe bikkeņ Al Kuruņ hitte biņa tiyyiņ goke teņbe Yuda marte matare tonaņ walde gabe hakwa teņ kuriņ.

¹⁹⁻²¹ Be, taun go tubul teņ kuņbe Efesus taunde forok yamiņ. Irdeb Pol go Yuda marte gabu yare kuņ mel gor niņ mar goyen, ‘Daha mat kura Yesu niņ nurwoņ,’ yeņ keņkela po mere yirde hinhin. Gwaha yirde hikeyabe mel gore, “Ulyande heņ saba dirde hayiņ,” ineņ basiņa iramiņ. Gega bada yiryiņ. Irdeb kwe yenya, “Kame Al Kuruņ beleņ sopte kwa ninke gab wayeņ,” yinyiņ. Irdeb hakwa teņ kuriņ. Be, Efesus taunde gorbe Prisilaya uņ Akwilaya goyen yubul tiyyiņ. ²² Irdeb kuņ Sisaria taunde forok yiriņ. Gor matbe kahaņde kuņ Yerusalem forok yeņ Yesuyen alya bereya sios gor niņ yeneņ mere yirdeb go kamereb Siria naņare niņ taun Antiok kuriņ. ²³ Be, Antiok taunde hitteņ teņbe sopte Galesia naņaya Frigia naņaya bana goņ kuņ waņ teņbe Yesu niņ dufaymiņ tareņ irde hinhan mar goyen yeneņ saba yirde saņiņ yirde kuņ hinhin.

Apolos beleņ al saba yirde hinhin

²⁴ Be, Pol go gwaha tenj kunj hikeyabe Yuda mar al kura denem Apolosbe Aleksandria taunde kawan hiriñ al goyen Efesus taunde wayyiñ. Yenbe Al Kurunyen mere ep hitiñ, irde merem nurdmiñbe pañtalkek wor po. ²⁵ Yenbe bikkeñ al kura belej Doyañ Al Kurunñ niñ saba irke nuryiñ. Irdeb Yesu niñ al saba yird yird niñ amanenñ wor po nurde kenkela yen ge tagalde hinhin. Gega yenbe Yon Baptais belej mata bulun yubul tenj baptais tenayiñ yen tagalde hinhin go po ga nurde hinhin. Munañ Holi Spiritiyen baptais Yesu belej yitiñ gobe go ma nurde hinhin.

²⁶ Be, yen belej Yuda marte gabu yare kunj gor al gabu irde hinhan goyen kafura ma henj saba yirde hinhin. Irkeb Prisilaya unj Akwilaya sabamiñ go nurdeb yamiñde tukaryum. Irdeb Apolos goyenbe ire unya gore kenkela wor po Al Kurunyen mata saba irke nurde bebak tiyiñ.

²⁷⁻²⁸ Be, Apolos go gor henj henjbe Akaia nañare kwen yiriñ. Irkeb diñun Yesu niñ dufaymiñ tareñ irde hitiñ mar Efesus taunde niñ gore Apolos goyen tareñ henj henj niñ farañ yurde asañ kayamiñ. Asañ gobe Yesu niñ dufaymiñ sañiñ irtiñ mar Akaia nañare niñ gore Apolos kenenbe igiñ igiñ irnayiñ yen kayamiñ. Be, Apolos go Akaia nañare kunjbe gor niñ Yuda mar niñ kafura ma henj mel goya kawan gabu irde saba misiñen yirde hike gwaha mat kura gor niñ Yuda mar belej mere titek moñ hamiñ. Gwaha irde henjab Yesube Mesaia goyen momoñ yirde goke Al Kurunyen mere yikala yirde hinhin. Be, Apolos gobe kunj gwahade saba yirde hike Al

Kurun belen bunijen nurde yunen faran yurke Yesu nin dufaymin taren irtin mar goyen sabamin nurde taren hamin. Be, Apolos gobe gwahader po gor nin sios faran yurde hinhin.

19

Polbe Efesus taunde kurin

¹ Be, Apolos gobe Akaia naŋa bana go nin taun Korin hikeyabe Polbe belenmin Galesiaya Frigiaya dugu bana mat kun kun makan sinare nin taun Efesus forok yirin. Gorbe Yesu nin dufaymin taren irtin mar kura yinyin. ² Irdeb, “Yesu nin dufaymin taren iramin goyenbe Holi Spirit manan tamin we?” yen gusunan yirin. Irkeb, “Mon, Holi Spirit nin yen ha mere gobe tinen wor po. Ma po nurde hityen,” inamin. ³ Irkeb, “Be, ningeb danin baptais tamin?” yinyin. Irkeb, “Nenbe Yon Baptais belen saba tagalde hinhin gote min po gama irde baptais titirin,” inamin. ⁴ Irkeb Pol gore gaha yinyin: “Yonbe al belen, ‘Mata buluninin yubul ten Al Kurun nin bininin mulgan hihit,’ yeke gab baptais yirde hinhin. Irdeb, ‘Kame Al kura harhokner wayyen al goke dufaytin sanin irnayan,’ yirin. Be, Yon belen yirin al gobe Yesu nin yirin,” yinyin. ⁵ Gwaha yinke nurdeb, “Baptais Yesu belen yitin goyen tetek,” inkeb Pol belen Doyan Al Kurun Yesu denemde baptais yirin. ⁶ Be, baptais yirde mel go hende hanin yerde Al Kurun gusunan irkeb Holi Spirit katyin. Irkeb yende mere mon, mere tinen kurayen kurayen tiyamin. Irde Al Kurun belen

mata kame forok yiryen goke tagalamiñ. ⁷ Be, gorbe al 12 belej gwaha tiyamiñ.

⁸ Be, Pol go gor gagasi karwo hinhinyabe Yuda marte gabu yare kuñ kafura miñmon gwaha mat bebak tinayin yen mel goya mere tagalde saba yirde hinhin. Mere miñbe Al Kurun belej yende alya bereya doyan yird yird mata goke mere tenya saba yirde hinhin. ⁹ Gega tonan tareñ Yuda mar kurabe Polyen saba goke igin ma nurde Yesu nin dufaymin tareñ ird ird nin bada hamin. Irde al buda dilinde Yesu gama ird ird mata goyen bulun mat tagalamiñ. Goke tenbe Pol belej mel go yubul tenbe Yesu nin dufaymin sanin irtin mar go po ga saba nurd nurd ya kurun kura denembe Tiranus gor yukurin. Gorbe nankahalmiñ nankahalmiñ huginen Al Kurunen mere miñ goyen mel goya tagalde saba yirde hinhin. ¹⁰ Be, Pol gobe dama irawa gor hinhin. Goyarebe Esia nana bana go nin Yuda marya al miñ hoyan Grik marya goyen tumnan mere Doyan Al Kurun nin yitin goyen nuramiñ.

Siwa urmin yago

¹¹ Be, Al Kurun belej Pol goyen taremin unke mata tinen wor po kurayen kurayen forok yirde hinhin. ¹² Irkeb Pol belej amilya nufol hal hal amel parwek sisan yurtin goyen wor al belej yukun gore po al garbam minyan sisan yurde hike igin hen hinhan. Irde al kura unguram yan wor gwahade po yirde hike ungura belej al go yubul ten kuñ hinhan.

¹³ Be, Yuda mar al kura belej ungura al bana hinhan goyen yakira ten ten ge kuñ wan ten

hinhan. Irde mel gore unğura al bana han goyen yakira tiniñ yeñ Doyañ Al Kurun Yesu denje urde, “Pol beleş sabamiñ tagalde hiyen al Yesu gote denemde dinhet. Kat kunañ!” yineñ hinhan. ¹⁴ Pris buda gote kurunmiñ denembe Siwa gote urmiñ yago 7 goyen manañ gwaha teñ hinhan.

¹⁵ Be, nalu kurarebe al kura unğuram yañ al goyen sope irniñ yeñ yamiñde kuñbe, “Unğura go takira tihit,” yeñ nuramiñ. Gega unğura gore wol heñbe, “Yesuya Polyabe nurd yuneñ hime. Munañ denbe ganuñ mar?” yinyiñ. ¹⁶ Irdeb al unğura ketal urtiñ gore po al 7 goyen yeñala po yirde hikaka yirde gasa polon yirkeb dari sirsur iramiñ. Irdeb uliñhormiñ yago erek yirde yugu teñ yunkeb kupson busaharamiñ. ¹⁷ Irkeb Efesus taunde niñ Yuda marya al miñ hoyañ Grik marya beleş mere momoñ go nurdeb kafura wor po hamiñ. Irdeb Doyañ Al Kurun Yesu turuñ iramiñ. ¹⁸ Irde Yesu niñ dufaymiñ tareñ iramiñ gega, mata buluñmiñ yubul ma titiñ mar budam goyen goya gab al diliñde matamiñ kawan tagalde sopte gwaha ma teñ hitek yamiñ. ¹⁹ Irde Yesu niñ dufaymiñ tareñ irtiñ gega, mere bal asañde katiñ miñyañ marbe asañmiñ goyen yukuñ kumga tiyamiñ. Asañ kumga tiyamiñ gote muruñgembe al 50,000 beleş nañkahal unğureñde meten teñbe hora tenayiñ goya tuñande. ²⁰ Be, Doyañ Al Kurun niñ yitiñ mere gobe gwaha mat sañiñ heñ kurun heñ tukuriñ.

²¹ Be, mata gwahade forok yekeb Pol gobe Yerusalem mulgañ hewen yeñ beleşnebe Masedoniaya Akaiaya nañayañ kwen yeñ dufay hiriñ.

Irdeb, “Yerusalem gor hej gabe fudinde wor po Rom manañ kwen,” yiriñ. ²² Gwaha yenbe meten marmiñ Timotiya Erastusya yad yerke yeñ wa meheñ hej Masedonia nanare kwaryum. Irkeb yenbe Esia nanare gor ulyañde yara hinhin.

Efesus taunde kanduk kurun forok yiriñ

²³ Be, Pol go Esia nana bana goñ niñ taun Efesus hikeyabe gor niñ al kura belen Yesu gama ird ird mata goke igiñ ma nurde kanduk kurun forok iramiñ. ²⁴ Gwaha tiyamiñ mar al kurabe Demetrius. Yenbe silwa hora belen det yird yird al. Yen belenbe yende unğura biriñ Atemisya yamiñya gote toneñ mukneñ mukneñ silwa belen yirke al damu teñ hanjen. Irkeb yenya meten marmiñya gobe hora kurun wor po yade hanjen. ²⁵ Gega Pol belen wañ Al Kurunyen mere kurun irkeb mel gote hora teñ teñ belen bulun hiriñ goke biñ ar yiriñ. Niñgeb Demetrius gore meten marmiñya yeñ meten teñ hinhin gote kadom yago hoy yirke wakeb gaha yinyiñ: “Mel, meten teñ hityen garebe hora kurun tulun teñ dunen hiyen nurde han gogo. ²⁶ Gega Pol inen hanjen al gore Efesus taunde gar wañ nende alya bereya saba hoyañ po yirke yirkeb al budam nende mata yubul tiyañ. Goyenbe Efesus taunde gar po moñ. Esia nana bana gor niñ al manañ tumnañ gwaha yirun goyen wor dindiken nurdeb kenañ. Al goreb, ‘Det toneñ kura al belen yirtin gobe Al Kurun fudinde moñ,’ yeñ hi. ²⁷ Niñgeb meteniniñ denem bulun ireñ tiya. Goyenbe go po moñ. Nende tikula kiryiñ bere Atemis gote toneñ goyen kerde doloñ ird ird ya gobe alya

bereya belen tareŋ miŋmon yeŋ nurnayiŋ. Irke denem kurunŋ Esia naŋa banaya megeŋ kurunŋ ga nurd untiŋ ala teŋ hanŋen gobe tareŋ miŋmon yeŋ nurde unnayiŋ,” yinyiŋ.

²⁸ Be, gwaha yinke nurdeb biŋ kak hekeb, “Atemisbe Efesus taunde gar niŋ tikula bere wor po,” yeŋ kwipkwep tiyamiŋ. ²⁹ Irdeb mel gore taunde gor mata kandukneŋ yade forok yiramiŋ. Irdeb mel gore Polyen metenŋ kadom, Masedonia naŋare niŋ al irawa, Gaiusya Aristakusya yade gasa yirniŋ yirniŋ yirde yulunŋ teŋ gabu gasunŋ kurunŋde tumŋaŋ kup yeŋ yukamiŋ. ³⁰ Gwaha yirkeb Pol belenŋ al buda kurunŋ gabu iramiŋ gote diliŋ mat huwarde mere yire yekeb Yesu niŋ dufaymiŋ saŋiŋ irtiŋ mar belenŋ basiŋa irde utaŋ iramiŋ. ³¹ Irde Esia naŋare niŋ doyaŋ mar kurabe Polyen kadom niŋgeb, Pol niŋ yeŋ, “Inke gor ma forok yiyyeŋ,” yeŋ mere keramiŋ. ³² Be, gabu iramiŋ mar gobe kukuwa wor po hamiŋ. Kura marbe mere miŋ hoyanŋ niŋ hewhow teŋ hinhan. Munanŋ kurabe mere miŋ hoyanŋ niŋ wenŋwoŋ teŋ hinhan. Al budam wor pobe miŋ goke gabu irhet yeŋ ma nuramiŋ.

³³ Be, goyarebe Yuda mar belenŋ sios niŋ po mere fuguru tiniŋ yeŋbe al kura denem Aleksanda gare al gabu kurunŋ go diliŋ mat huwarde mere yiri yeŋbe, “Gwaha gwaha yawayiŋ,” inenŋ hulayanŋ iramiŋ. Irkeb al buda kurunŋ go diliŋ mat huwaryiŋ. Irdeb palŋa nirnanŋ yeŋ haniŋ tunanŋ yiryiŋ. Mere kandukneŋ forok yeŋ hi gobe neŋ Yuda mar belenŋ ma teŋ hite yinenŋ tiyyiŋ. ³⁴ Gega gabu iramiŋ mar belenŋ keneŋ al gobe Yuda mar

al yeŋ bebak teŋbe, “Atemisbe neŋ Efesus marte tikula bere. Yeŋbe kurun wor po!” yeŋ ulyande wor po weŋwoŋ teŋ hinhan. Irkeb al gobe mere titek ma hiriŋ.

³⁵ Gwaha teŋ hikeb taunde gor niŋ doyaŋ al kura beleŋ mel go, “Balmiŋ hinaŋ,” yinenbe gaha yinyiŋ: “Efesus mar, deŋbe tikula bere Atemisiyen ya kurun go doyaŋ irde hanŋyen. Irde hora himam yende toneŋ yara naŋkiŋde mat po katiŋ goyen ya go bana kerde doyaŋ irde hanŋyen gobe megen niŋ al kurun gayen tumŋaŋ nurde haŋ. ³⁶ Niŋgeb al kura beleŋ usi ma yenayiŋ. Niŋgeb bekeŋde heŋ dufay keŋkela heŋ ga mata tinayiŋ. ³⁷ Irem gabe nende tikula bere sukal ma iraruŋ. Irde det toneŋ yirde dolon yirde hityen gote yayaŋ samuŋ kura ma kawe tiyaruŋ. Gega duliŋ wor po gago yuluŋ teŋ yawayhaŋ. Mata gabe igiŋ moŋ. ³⁸ Mere gahade nurd nurd nalum yaŋ geb, Demitriusya kadom weŋya beleŋ al kura merere yirniŋ yeŋ nurdeb igiŋ yukunbe mere sope irtek mar diliŋde gab tagalke nurnayiŋ. ³⁹ Gega mel gore dufay kernayiŋ goyen igiŋ ma nurnayiŋbe taunde gor niŋ mere sope ird ird marte karkuwaŋmiŋ momoŋ yirke gabu kurun irde gab kanduk go sopte sope irnayiŋ. ⁴⁰ Niŋgeb haŋka gabu irde hekhok kurun taŋaŋ gabe miŋ miŋmoŋ wor po taŋaŋ. Niŋgeb Roma gabman beleŋ denenbe merere dukun gusaŋaŋ dirkeb daha mat wol hetek? Roma gabman beleŋ deŋ mata taŋaŋ gake igiŋ ma po nuryeŋ” yeŋ saba yiryiŋ. ⁴¹ Gwaha yinenbe yakira tike bur yeŋ kwamiŋ.

20

Polbe Masedoniaya Grikya nanjare kurin

¹ Be, mata kurun go hubu hekeb Pol belen gor nin mar Yesu nin dufaymin taren irtin goyen hoy yirke gabu iramin. Irkeb saba yirde dufaymin taren irde yubul ten Masedonia nanjare kurin.

² Goyan kun henjabe Yesu nin dufaymin sanin irtin mar taren hen hen ge faran yure yen saba yirde yirdeb yubul ten kun kun Grik nanjare forok yirin. ³ Gorbe gagasi karwo hinhin. Irdeb hakwa ten Siria nanjare kwe yirin. Gega Yuda mar belen maytek yamin goyen nurdeb mulgan hen Masedonia nanjayan mat gab kun Siria forok yewen yen kurin.

⁴ Irkeb Beria taunde nin al Sopater yenbe Pirus urminya, Tesalonaika nin al irawa Aristakusya Sekundusyabe Derbi taunde nin al Gaiusya belen Polya kwamin. Irde Timotiya Esia nanjare nin al irawa Tikikusya Trofimusya manan mel goya tumjan kwamin. ⁵ Be, mel go wa mehen hen kun Troas taunde Polya nenya doyan dirde hinhan. ⁶ Munan nenbe, “Yuda Marte Beret Yis Minmon Nen Nen Nalu Kurun” inen hanjen go hubu heke gab Filipai taun go tubul ten makende kurkun hakwa tenbe wawun siptesonon kamereb Troas forok yitirin. Irdeb mel go yupi ten gorbe wawun ⁷ hinhet.

Polbe Troas kurin

⁷ Be, gor hiteke kun Sande hekeb nen tumjan Yesu kamin goke dufay hen hen ge beret ninin yen gabu irtirin. Gwaha ten gise yubul ten kwen go yenbe Al Kurunyen mere saba yirke kun kun wawun binde hirin. ⁸ Gabu irde hinhet ya gobe

al heñ heñ gasuñ karwo hende bande niñgeb, neñbe gasuñ funañ hende wor pore gor hinhet. Gorbe hulsi budam yusuñ yurtiñ melak heñ hinhin. ⁹ Be, Pol mere teñ hikeyabe al foñeñ kura deñembe Yutikusbe meñe yamere keperde mere palña irde hinhin. Mere nurde arkup teñ kuñ kuñ biñ sir yekeb megen takteñ mayyiñ. Irkeb al kura belañ arañ po kurkuñbe kamtiñ kenamiñ. ¹⁰ Irkeb Pol wor kurkuñ kamtiñ hakwam megen hinhin goyen besa irdeb, “Kafura ma yo. Kama moñ geb,” yinyiñ. ¹¹ Gwaha teñ sopte mulgañ heñ hurkuñbe Yesu kamyiñ goke dufay heñ heñ niñ beret gale heñ namiñ. Go kamereb meremiñ basañ heñ saba yirke kuñ kuñ fay urkeb yubul teñ kuriñ. ¹² Be, Pol go gwaha tikeb al foñeñ takteñ mayke kamyiñ gega, sopte huwaryiñ al goyen yamiñde tukamiñ. Irde, “Kama al go gago huwara,” yeñ biñ yurum wor po hamiñ.

Polbe Troas taunde mat Miletus taunde kuriñ

¹³ Be, Polbe, “Troas taunde mat kahañde kuñ Asos taunde forok yewen. Irde gor mat gab hakwa hende kwen,” dinkeb neñ wa hakwa hende Asos taunde kutiriñ. Irkeb Polbe yiriñ gwahade po Asos taunde kuriñ. ¹⁴ Be, Pol wañ Asos taunde dupi teñbe tumñañ hakwa hende kuñ Mitalini motmotde forok yitiriñ. ¹⁵ Be, fay urkeb gor mat hakwa goyenter po kuñ Kios motmotde forok yitiriñ. Irdeb firtiriñ fay urkeb Kios mat Samos motmotde kutiriñ. Be, sopte fay urkeb gor mat Miletus taunde kuñ forok yitiriñ. ¹⁶ Be, gwahade teñ kuñ hinhetya goyenbe Polbe, “Esia nanñare mosoyneñ po teñbe epte ma Yerusalem

kuŋ Pentekos nalu keneŋ,” yeŋ nurdeb, “Esia naŋa bana goŋ niŋ taun Efesus ma kutek,” yiriŋ.

Polbe Efesus taunde niŋ siosyen doyaŋ mar yinyiŋ

¹⁷ Irdeb Miletus taunde mat po Efesus taunde niŋ sios doyaŋ mar niŋ keya heke kinniŋ yeŋ katamiŋ. ¹⁸ Katenŋ kenkeb Pol beleŋ gaha yinyiŋ: “Esia naŋare haŋkapyaya waŋ denya dahade hinhem gobe keŋkela neneŋ hinhan. ¹⁹ Yuda mar beleŋ mere mayde buluŋ nirke kanduk kuruŋ wor po keneŋbe delne fimiŋ katenŋ hinhin. Gega Doyaŋ Al Kuruŋ niŋ metenŋbe teŋ hinhem po. Gwaha teŋ hinhemyabe deŋne kuruŋ ird ird niŋ ma nurde hinhem. ²⁰ Saba kura igiŋ tareŋ diriyeŋ yeŋ nurdeb kuŋ saba dird dird niŋ bada ma heŋ gabu karkuwaŋyaŋ saba dirde hinhem. Irde kurabe yatiŋyaŋ yatiŋyaŋ kuŋ saba dirde hinhem gobe nurde haŋ gogo. ²¹ Nebe kawan po Yuda marya al miŋ hoyoŋ Grik marya tumŋaŋ Al Kuruŋyen mere saba yirde, ‘Mata buluŋtiŋ yubul teŋ Al Kuruŋ niŋ bitiŋ mulgaŋ hekeb Doyaŋ Al Kuruŋniniŋ Yesu niŋ po dufaytiŋ saŋiŋ irnayiŋ,’ yineŋ hinhem.

²² “Be, ga hime gabe Holi Spirit beleŋ Yerusalem kwa nineŋ hi yeŋ nurde hime geb, gwaha tiyeŋ. Gega gor da mata ulner forok yiyyeŋ gobe go ma nurde hime. ²³ Gega taunyaŋ kuŋ himekeyabe Holi Spirit beleŋ, ‘Gebe Yerusalem kukeb fere gird koyare gernayiŋ. Irke kanduk buluŋ wor po kenayiŋ,’ nineŋ hinhin go po ga nurde hime. ²⁴ Goyenpoga goke kafura ma heweŋ. ‘Al Kuruŋ beleŋ alya bereya niŋ buniŋeŋ nurde yumulgaŋ

teñ teñ belen kiryinj mere igin goyen momon yirde hayinj,' yeñ Doyanj Al Kurun Yesu belen meten nunyinj goyen bada ma hewen. Meten gobe pasi po ireñ. Gwaha teñ himekeya mununke kameñ goyenbe goke ma nurde hime.

²⁵ “Be, Al Kurun belen alya bereya doyan yird yird mata niñ kuñ wañ teñ saba dirde hinhem mar kurabe deñ gago goyen kamebe sopte ma nennayinj yeñ nurde hime. ²⁶⁻²⁷ Niñgeb funanj momon direñ tihim. Be, nebe bada ma heñ Al Kurunyen dufay goyen tumñanj momon dirde himeke nurde pasi hañ. Niñgeb al kura saba nurd nurd ga Al Kurunyen mere ma gama irde kanduk kennayinj gobe yende samun. Nere kanduk mon yeñ gago hayhay dirde hime. ²⁸ Niñgeb keñkela heñ hinan ko. Deñbe Holi Spirit belen Yesu gama irde hañ mar gote doyan mar diryinj geb, mel go keñkela doyan yirde hinayinj. Yesuyen alya bereya sios goke teñ Al Kurun belen Urmin megen teñ kerke katen kamyinj geb, sios gobe Al Kurunyen wor po. Niñgeb sipsip doyan mar belen sipsipmiñ keñkela doyan yirde hañ gwahade goyen po deñ wor sios goyen keñkela wor po doyan yirde hinayinj. ²⁹ Dubul direñ tihim harhoknerbe kulu duwi belen sipsip yisen hanyen gwahade goyen po al kura wañbe dufaytiñ bulun yirnayinj yeñ nurde hime. ³⁰ Irde deñ bana gare mananj al kura huwardeb, ‘Yesu niñ dufaymiñ tareñ irtinj mar goyen dufaymiñ bulun yirteke gama dirnan,’ yeñ Al Kurunyen mere fudinde goyen hoyanj mat saba yirnayinj. ³¹ Niñgeb keñkela wor po heñ hinan ko. Dama

karwo denya hinhembe huginē nan kahalya wawunya dun kuren dun kuren hayhay dirde esen mere dirde hinhem goyen goke bitin sir ma yiyyen.

³² “Be, Al Kurun belen doyan dirde hiyen goke gago Al Kurun gusunan irde hime. Irde Al Kurun belen buninen nurde dunenbe faran durde hi goke yitin mere goyen bitinde po hiyen yen gusunan irde hime. Mere go bitinde hen kurun hekeb taren hinayin. Irde Al Kurun belen dirnen wen det igin yunen yirin goyen wor tenayin.

³³ Nebe almet horaya ulin umnaya yenen bene huwartin mon. Hubu wor po. ³⁴ Irde kadne yagoya Al Kurunen meten ten hen yabe det kuran nurdeb nigen meten ten hora tenbe detninin damu ten himyen goyen kenkela nurde han gogo.

³⁵ Doyan Al Kurun Yesu belen, ‘Al Kurun dilinde al det yunen yunen mata gobe det yad yad mata gote folekken wor po yen nurde hi,’ yirin goyen bene sir ma yen hiyen. Ningenb mata kurun ten hinhem gobe meten sanin gahade ga ten gab al det minmon mar goyen faran yurde hinayin yen dikala dirde hinhem,” yinyin.

³⁶ Be, Pol go gwaha yinenbe gor gabu iramin marya tumnan dokolhon yugulun tenbe Al Kurun mere iramin. ³⁷ Irdeb mel gore Pol kun kun nin buninen nurde besa irde esen uramin. ³⁸ Mel gobe Pol belen, “Kame sopte ma nennayin,” yirin goke buninen wor po nuramin. Irdeb tumnan po tukun hakware tubul tiyamin.

Polbe Yerusalem kurin

¹ Be, go kamereb Polya nenya tumnan mel go yubul ten hakwa hende kun kun motmot kura denembe Kos gor po forok yen firtirin. Irde fay urkeb Rodes motmotde kutirin. Gor matbe Misia nanare nin taun kura makan sinare hinhin Patara gor kutirin. ² Gorbe hakwa hoyan kura Fonisia nanare kwen ten hike kenenbe go hende kutirin.

³ Hakwa hende kun henyaabe Saiprus motmot ten megen kurun belen pel irde alare mat po Siria nanare kutirin. Kun kunbe Tair taunde forok yitirin. Gorbe taunde gor nin samun yago hakware nin meten mar belen yad sin yiramin. Irkeb nenbe megen kattirin. ⁴ Kat sinare kunbe Yesu nin dufaymin taren irtin mar kura gor yitirin. Irdeb yena gor wawun 7 hinhet. Gor hitekeyabe Holi Spirit belen Polbe kame Yerusalem kun kanduk kinyen goyen mel go bebak yirkeb basina irman hamin. ⁵ Gega Yerusalem kutek naluninin forok yekeb kunin yen gitik titeke Yesu nin dufaymin taren irtin hinhan mar goyen tumnan beremya dirnen wena wor taun go tubul ten nena kun makan sinare forok yitirin. Irdeb megen dokolhonnin yugulun ten tumnan Al Kurun mere irtirin. ⁶ Go kamereb kadam hayhay girde tenbe yubul ten hakwa hende kuteke denenbe mel gobe mulgan hamin.

⁷ Be, Tair taun go tubul ten kun kunbe Tolemes taunde forok yitirin. Gorbe hakwa tubul ten sinare kurkun Yesu nin dufaymin sanin irtin mar yenenbe yena wawun unjukan po firtirin. ⁸ Irde

fay urkeb taun go tubul ten kuŋ Sisaria taunde forok yitirin. Gorbe Filipyen yare kutirin. Filipbe Al Kurunyen mere goyen alya bereya saba yirde hiyen. Yenbe hakot aposel buda belen meten faran mar nin yekeb yenya al hoyan 6 goya yawaramin al go goyen. ⁹ Yenbe wirin sipte karkuwan hitin gega, fonen po hinhan. Bere sipte gobe Al Kurunyen mere basan hen tagalde hanen.

¹⁰ Be, gorbe wawun budam yara po hitekeyab Al Kurunyen mere basan al kura denem Agabus go Yudia nanare mat katyin. ¹¹ Katen nen hinhetde gor forok yenbe Polyen kan mal temde tendere nin goyen tenbe yingen de haninya kahaya fere tiyyin. Irdeb, “Nigen hanneya kahaneya fere tihim gahade gayen po Yuda mar Yerusalem taunde han gore kan gate min albe haninya kahaya fere ten al min hoyan Yuda mar mon gote haninde kernayin yen Holi Spirit belen nina,” yirin. ¹² Gwaha yeke nurdeb nenya Yesu nin dufaymin taren irtin mar gor nin goya belen Pol goyen Yerusalem ma kwayin inen utan irtirin. ¹³ Gega Pol belen, “Danin esen buninen buninen ten dufayne bulun irde han? Nebe nad fere nirnayin goke ma nurde hime. Doyan Al Kurun Yesu nin wor igin kamen yen nurde hime geb,” dinyin. ¹⁴ Goyenpoga mereninin ma nurtek hekeb, “Al Kurun belen dufay kirtin gobe gwahade po forok yiyyen,” yenbe bada hitirin. ¹⁵ Gwaha tenbe detninin yade Yerusalem hurkunin yen taun go tubul titirin. ¹⁶ Irkeb Yesu nin dufaymin taren irtin mar Sisaria taunde hinhan

gore dukun Yerusalem forok yenbe gar hinayin yen Nasonyen yare dubul tiyamin. Yenbe Saiprus motmotde nin al. Al gobe hakot po Yesu nin dufaymin sanin irtin hinhin.

Polbe Yems kinyin

¹⁷ Be, Yerusalem nin Yesu nin dufaymin taren irtin mar belen denenbe aman hamin. Irkeb gor firtirin. ¹⁸ Irdeb fay urkeb Yems kinnin yen nenya Polya tumnan yen hitte kutirin. Kunbe yenya gor nin doyan mar manan tumnan yintirin. ¹⁹ Pol belen Yemsa doyan marya go yenenbe kadam pere gird tenbe meten ten hinhin goyen minde mat tagalde tukun tukun pasi iryin. Irde Al Kurun belen taren irke al min hoyan Yuda mar mon hitte kun meten dahade ten kun hinhin goyen manan momon yiryin. ²⁰ Irkeb gor hej mere nuramin mar belen Al Kurun turun iramin. Irdeb Pol gaha inamin: “Gebe Yuda mar budam wor po dufaymin Yesu nin sanin iran gobe nurde ha. Goyenpoga go mar gobe tumnan nen Yuda marte tikula manan taren po tanarde gama irde han goyen wor nurde ha gogo. ²¹ Be, mel gobe ge belen Yuda mar mon al min hoyande nin nanjare kun henya saba ten hinhan goyen nurde han. Ge belen gon nin Yuda mar saba yirdeb, ‘Nende tikula Mose belen kayyin goyen ma gama irnayin. Irde dirintin yagobe guba ma yen yunnayin,’ yinen hinhan goyen nurde han. ²² Irdeb ge gar wayan gayen hej ga mon nurnin tahan. Ningeb kanduk kurun kura kinnin tihit geb, daha titek? ²³ Ningeb mere girnin tihit gayen po gama ira ko. Monjo kanduk kinnin geb. Be, nende al

sipte kura Yuda marte matare biña tiyañ ga hañ. ²⁴ Niñgeb al sipte goya Al Kurunyen ya balem bana kunayin. Irdeb Yuda marte matare wukken heñ heñ mata doyañ mar hitte kuñ mata tinayin goke hora yunayin. Irkeb go mar gore biña tiyañ al sipte gote tonañ kara tinayin. Gwaha tike gab al tumñañ geneñbe, ‘Mere yeñ ulinde nurde hityen kurun gobe usi. Yeñbe fudinde nende tikula gama irde hi,’ yeñ bebak tinayin. ²⁵ Be, neñ belej al miñ hoyañ Yuda mar moñ gega, Yesu niñ dufaymin taren irtin mar goke bikken asañ kañ yunenbe, ‘Uñgura biñge teñ yuntin ma nene hinayin, dapña darim ma nene hinayin, dapña kura biñinde kañ giti irke kamtin ma haniñde yaka tike kamtin gobe ma nene hinayin, irde leplep mata ma teñ hinayin,’ yineñ mata goyen goke po bisam yirtirin gobe nurde ha gogo,” inamin.

²⁶ Be, inamin go ferde fay urkeb Pol belej al sipte goya tumñañde Yuda marte matare wukken heñ heñ mata go tiyamin. Irdeb go kamereb Al Kurunyen ya balem bana hurkunbe, “Biña tiyañ goyen pasi irde nende matare wukken heñ heñ mata goyen nalu gwahader ga hubu hiyyen geb, dapña yawañ dunmeke al sipte gake teñ kumga tinayin,” yeñ bebak yiriyin.

Pol fere tiyamin

²⁷ Be, wukken heñ heñ mata teñ hinhan goyen kuñ murun belej heñ nalu 7 hewen tikeb Yuda mar kura Esia nanare mat Yerusalem wayamin gore Pol go Al Kurunyen ya balem ban hike kenamin. Irde Pol go busaharyenkek yeñ tanamin. ²⁸ Irdeb, “Israel mar, farañ durnañ!

Al gare neŋ Israel marya nende tikulaya Al Kurunyen ya balemya gayen gake al tumŋaŋ buluŋ mat saba yirde hiyen. Irde al miŋ hoyan Grik mar goyen ya balem biŋde yawayuŋ. Irdeb al mali ma hurkutek ya balem goyen buluŋ iruŋ,” yineŋ gor hinhan mar goyen biŋ yakamke biŋ ar yamiŋ. ²⁹ (Be, mel gore Grik mar niŋ yamiŋ gobe Efesus taunde niŋ al Trofimusya Polya belej Yerusalem gor hike yenamiŋ. Niŋgeb dufaymiŋdebe Al Kurunyen ya balem bana al miŋ hoyan goŋ hurkutek moŋ yeŋ bisam irtiŋ hiyen goyen Pol belej al goyen teŋ bana goŋ hurkuŋ daw yeŋ nuramiŋ.)

³⁰ Be, mere go nurdeb goyare po Yerusalem niŋ mar tumŋaŋ biŋ ar yamiŋ. Irkeb kurhan mat mat Al Kurunyen ya balemde gor kup yeŋ wayamiŋ. Irdeb ya bana mat Pol go tuluŋ teŋ siŋare tukukeb goyare po ya gote yamem kurun go tayamiŋ. ³¹ Be, al buda gore mayniŋ teŋ hikeb Roma gabmande fulenŋa marte doyan al kurun go, “Yerusalem bana kanduk kurun forok yihi,” mere momoŋ go nuryiŋ. ³² Nurdeb goyare goyen po fulenŋa marmiŋ kuraya gote doyan marmiŋya yadeb al buda gabu irde hinhande gor kup yeŋ kurkamiŋ. Irkeb al gabu irde Pol mayde hinhan kurun goyen mel go yeneŋbe tubul po tiyamiŋ. ³³ Irkeb fulenŋa marte doyan al kurun belej fulenŋa marmiŋ hulyan yirke Pol teŋ sen irawa belej po fere tiyamiŋ. Gwaha irdeb al buda kurun hitte fulanŋ kaŋbe, “Al gabe ganuŋ? Irde daha tiya?” yineŋ gusuŋaŋ yiryiŋ. ³⁴ Irkeb gabu iramiŋ mar kura belej kwep kwep teŋbe, “Polbe mata gwahade gwahade tiya,” yamiŋ. Irkeb kura

belenbe mere hoyan yen kwep kwep tiyamin. Be, gwaha ten mere tuktawan irkeb doyan al go mere tiyamin goyen bebakken ma nuryin. Irdeb fulenja marmin yinke Pol ten fulenja marte yare kwamin. ³⁵ Kun ya binde hen hurkuni ten hikeb al buda Pol maynin yen gama irde hinhan mar gore bin ar yeke Pol ugun po kertek hamin. Irkeb fulenja mar belen tatum urde ten hurkamin. ³⁶ Irkeb gama irde hinhan mar gore, “Mayke kami! Mayke kami!” yen kwep kwep ten hinhan.

³⁷ Be, ten ya binde hurkuni tikeyabe Pol belen fulenja marte doyan al kurun goyen, “Igin mere kura giren?” inen gusunan iryin. Irkeb, “Ey, ge gayen Grik mere nurde ha?” inyin. ³⁸ Irdeb sopte po, “Hakot kura Isip nin al Roma gabman asogo ire yen al 4,000 yade sawsawa po kurun nanare yukurin goyenbe ge ma ganun?” inen gusunan iryin. ³⁹ Irkeb, “Mon, nebe Yuda mar al, Silisia nanare nin taun kurun Tarsus, Roma gabman belen doyan irde hire gor nin al. Ningeb igin nubil tike al ga mere yiren?” inyin.

⁴⁰ Be, fulenja marte doyan almin kurun gore igin inkeb Pol gobe yare hurkun hurkunde gor huwarde, “Balmin hinayin,” yinenbe hanin tunan yiryin. Irkeb balmin hikeyabe Yuda mar gote mere mat mere yiryin.

22

¹ “Kadne yago, merem yan nirhan gayen pet ten nigen ge tagalen tihim ga nurnan ko,” yinyin.

² Go yirin gobe Yuda marte mere mat tike nurdeb liwlaw tiyamin kurun go bada hen balmin palna

iramiņ. Irkeb Pol belej, ³ “Nebe Yuda mar al, Silisia naņare niņ taunde Tarsus kawan himiriņ. Gega waņ Yerusalem gar heņ kurun himiriņ. Irkeb Gamaliel belej nende tikula Mose belej asininiņ yago asaņde kaņ yuniņ goyen goke keņkela wor po saba niryiņ. Irkeb deņ belej gayenter Al Kurun niņ po nurde mata teņ haņ gahade gayen po ne wor gwaha teņ saba upsineņ gama irde hinhem. ⁴ Irdeb Yesu belej alya bereya gaha teņ hinayiņ yeņ tikula kiryiņ goyen gama irde hinhan mar goke biņ arneņ nurde yunenbe yade fere teņ koyare yerdeb kurabe gasa yirmeke kamde hinhan. ⁵ Go teņ hinhem gobe Al Kurun doloņ ird ird mata doyaņ mar pris buda gote kurunmiņa Yuda marte doyaņ marya wor neneņ hinhan geb, igiņ momoņ dirnayiņ. Nebe mel go hitte kuņ Damaskus taunde niņ meteņ kadom belej faraņ nurnayiņ yeņbe yinmeke asaņ kaņ nunamiņ. Irkeb asaņ go teņbe Yesu niņ dufay saņiņ irtiņ mar goyen fere yirde Yerusalem gar yawaņ buluņ buluņ yirniņ yeņ Damaskus taunde kumiriņ.

⁶ “Be, kuņ kuņ naņa baņkahal hekeb Damaskus taun binde himekeyabe bemel po hulsi tareņ kura naņa folekkeņ kurun gore naņkiņde mat ne hitte po timiyyiņ. ⁷ Irde gore nirkeb megen nakteņ mununyiņ. Irke al melak kura goreb, ‘Sol, Sol, daniņ mununeņ buluņ buluņ nirde ha?’ ninyiņ. ⁸ “Irkeb Doyaņ Al Kurun goyen, ‘Gebe ganuņ?’ inmekeb, ‘Nebe Nasaret niņ al Yesu, mununeņ buluņ buluņ nirde ha al goyen,’ ninyiņ. ⁹ Be, al neya tumņaņ kuņ hinhet mar gobe hulsi

go po ga kenamiñ. Gega mere gobe al gore mere teñ hi yeñ ma bebak tiyamiñ. ¹⁰ Gwaha ninkeb, ‘Doyañ Al Kurun, daha tiyeñ tihim?’ inmekeb, ‘Huwara. Irde Damaskus taunde kwa. Gor gab gwaha gwaha tiyayiñ yeñ basiña girmiriñ goyen nurayiñ,’ ninyiñ. ¹¹ Be, hushi kurun gore nirke delne kidoma wor po hiriñ geb, al kun hinhet mar gore po nanarde nad Damaskus taunde kwamiñ.

¹² “Be, gorbe al kura deñem Ananias hinhin. Yeñbe Yuda marte tikula kenkela gama irde hiyen. Irkeb Yuda mar taun goyenter hinhan goreb palap wor po irde hanyen. ¹³ Be, Ananias gore ne hitte wañ huwardeb, ‘Kadne, sopte delge wuk yeke nankena,’ yiriñ. ¹⁴ Irkeb goyare po delne wuk yeke det yinmiriñ. Irkeb yeñ beñ gaha ninyiñ: ‘Al Kurun asininiñ yago beñ hakot dolon irde hinhan Al goyen ge beñ gab du-faymiñ keneñ bebak teñbe Al Huwak Yesu goyen delger forok yeñ mere girkeb nurayiñ yeñ bikken basiña giriñ. ¹⁵ Niñgeb gebe mata keneñ mere nurañ goyen goke kunbe al naña kurun ga hike kwa goyen momon irde tukayiñ. ¹⁶ Niñgeb da doyañ irde ha? Huwarde kunbe baptais tekeb Al Kurun beñ mata bulunje halde gunyen. Irkeb yeñ dolon irayiñ,’ ninyiñ.

¹⁷ “Be, kamebe mulgañ heñ Yerusalem wamiriñ. Gorbe kun Al Kurunyen ya balem bana heñ mere irde heñyabe yuwarwarte Doyañ Al Kurun kinmiriñ. ¹⁸ Irkeb Doyañ Al Kurun beñ, ‘Taunde gar niñ marbe ge beñ ne niñ tagalde ha gayen fudinde yeñ ma nurde asogo girnayiñ geb, arañ po Yerusalem ga tubul teñ hoyande kwa,’

ninyiñ. ¹⁹⁻²⁰ Gega ne belen huwardebe, ‘Doyan Al Kurun, mel gobe epte ma asogo nirnayiñ. Nebe meten alge Stiwen hora po mayan goyarebe gor hinhem. Irde al belen Stiwen mayniñ ten hikeb igiñ nurde go mar gote uliñhor yago doyan yirde hinhem. Irde meten alge Stiwen goyen hora po uguñ kerke kamun goyen kinmin. Irdeb Yuda marte gabu yayan kun alya bereya ge niñ dufaymin taren irtin marbe yawan yusulak ten koyare yerde hinhem. Niñgeb Yerusalem niñ mar gabe kenkela nurde nunen han,’ inmiriñ. ²¹ Gega Doyan Al Kurun belen wol henbe, ‘Ne belen po gad germeke nanja gisaw al min hoyan Yuda mar monde nanjare kwayiñ. Niñgeb huwarde kwa!’ ninyiñ,” yinyiñ.

²² Be, al buda go meremin palja iramin kun al min hoyan Yuda mar mon niñ tagalke nurdeb biñ ar yamin. Irkeb, “Al gabe megen gar hitek mon niñ, mayke kami!” yen kwep kwep tiyamin. ²³ Irdeb al buda goreb Pol belen Al Kurun sukal ira yen biñ ar wor po yekeb kwep kwep ten uliñhor yago yuguya ten mulowo yade nanja kota yemeyde tiyamin. ²⁴ Irkeb fulenja marte doyan al kurun belen fulenja marmin go yinke Pol go ten fulenja marte yare tukamin. Irkeb fulenja marte doyan al kurun gore, “Kun usulak tike daniñ merem yan irde kwep kwep irde han goyen momon diryen,” yinen hulyan yiryiñ. ²⁵ Irkeb fulenja mar belen kun Pol goyen usulak tiniñ yen haninya kahanya yad giñ yirdeb hete giti iramin. Irkeb Pol belen fulenja mar gote doyan al kura gor hinhin goyen, “Roma mar al ne gahade gayen

mere miŋ ma nurdeya mali yusulak tinayiŋ yeŋ Roma gabman beleŋ igiŋ yitiŋ we?” inyiŋ. ²⁶ Irkeb fulenja marte doyaŋ al gob kurunmiŋ hitte kuŋbe “Al gabe Roma al geb, daha ireŋ taha?” inyiŋ. ²⁷ Irkeb fulenja marte doyaŋ al kurun gore Pol hitte kuŋbe, “Momonj nira. Ge gayen fudinde Roma al?” inyiŋ. Irkeb, “Fudinde,” yiriŋ. ²⁸ Irkeb al gore, “Nebe Roma al hewe yeŋbe hora kurun tubul teŋ gab Roma al himiriŋ,” inyiŋ. Irkeb Pol beleŋ, “Gebe gwaha tiyariŋ gega, Adonebe Roma al geb, ne wor Roma al,” inyiŋ.

²⁹ Be, Pol go gwaha yeke nurdeb fulenja mar usulak teŋ gusuŋaŋ irniŋ yeŋ doyaŋ hamiŋ gobe warga heŋ okohom po bada hamiŋ. Irkeb Pol go Roma al gega, malikan miŋ miŋmonj fulenja marmiŋ yinke sende fere tiyamiŋ goke kafura hiriŋ.

Polbe merere huwaryiŋ

³⁰ Irdeb nalu go wawuŋ heŋ sopte fay urkeb fulenja marmiŋ yinke Pol go sen yugu teŋ unamiŋ. Irde, “Da misiŋde wor po Yuda mar beleŋ Pol mere uliŋde iran goyen upsineŋ bebak tiye,” yeŋbe pris buda gote karkuwanmiŋya Yuda marte doyaŋ mar tumŋaŋ wake gabu irke gab gusuŋaŋ yire yeŋ mere kiryiŋ. Irkeb tumŋaŋ gabu irke fulenja marte doyaŋ al kurun beleŋ Pol tawake al buda kurun gote diliŋde huwaryiŋ.

23

Pol beleŋ Yuda marte doyaŋ mar buda hitte Yesu niŋ tagalyiŋ

¹ Be, Pol go huwarde Yuda marte doyañ mar gabu iramiñ go yenenbe, “Kadne yago, nebe Al Kurunñ niñ metenñ po tenñ henyañbe bener wukkenñ wor po nurdeya metenñ timeke wañ wañ gago hihi. Al Kurunñ diliñde mata bulunñ kura ma tenñ himyen,” yinyiñ. ² Gwaha yekeb pris buda gote kurunñmiñ Ananias beñenñ kadom yago Pol bindere hinhan go hulyañ yirde, “Mohonñde go maynañ,” yinyiñ. ³ Irkeb Pol beñenñ meremiñ go nurdeb, “Gebe nende tikula ufurd unenñbe gor keperde, ‘Gebe bulunñ gwaha gwaha tiyañ,’ ninha. Goyenbe gigenñbe tikula goyen pel irdeb merene kenñkela ma nurde mali ga maynañ yinha? Gebe siñare mat geneñmiñbe igiñ wor po gega, bege banabe tikiñ barañ wor po ha. Niñgeb goke tenñbe Al Kurunñ beñenñbe mugunyenñ geb,” inyiñ. ⁴ Irkeb al Pol bindere hinhan goreb, “Yenñbe Al Kurunñyen metenñ al wor po. Pris buda gote kurunñmiñ goyen go ma nurde nanyañ irha?” inenñ kwep kwep iramiñ. ⁵ Irkeb Pol beñenñ wol henñbe, “Kadne yago, nende tikularebe, ‘Doñañ altiñ kura mere bulunñ ma irde hinayiñ,’ yitiñ gobe nurde hime. Niñgeb yenñbe al gwahade yenñ ma nurde nanyañ irhem,” yinyiñ.

⁶⁻⁸ Goyare goyenbe Yuda marte doyañ mar gabu iramiñ gobe Farisi marya Sadusi marya goyen Pol beñenñ yenenñ bebak tiyyiñ. Be, Farisi marbe al kamdebe sopte huwarnayiñ, irde Al Kurunñyen miyonñbe hañ, al toneñ manañ hañ yenñ nurde hañyen. Munañ Sadusi mar gobe gwahade ma nurde hañyen. Niñgeb Pol go mel goyen yenenñbe, “Kadne yago, adonebe Farisi al geb, ne

manan gwahade po. Niŋgeb nebe Al Kurun beley al kamkeb kame sopte yisan hiyyen gobe fudinde yen nurdeb goke po doyan heŋ hime goyen goke tagalde himyen. Gega goke igin ma nurde gago merere nerhan,” yen mere sanin po yiryin. Sadusi marya Farisi marya gobe kadom igin ma nurd gunen ten hanjen geb, Pol mere tiyyin go nurdeb yingen ulin kadom mohonde tiyamin. Irde dufaymin unkuŋen kertek ma hamin. ⁹ Irdeb hekhok ten kwipkwep ten epte ma tiyamin. Gwaha tenbe Farisi mar kura Yuda marte tikula saba yird yird mar gore huwardeb, “Al gabe mata bulunmin kura ma kenhet. Monŋo Al Kurunyen miyon beley yar kura ma det toneŋ beley yar kura inyin kenem daha tinayin?” yamin.

¹⁰ Irde al buda kwipkwep ten hinhan go kun bulun wor po heŋ artek heke nurdeb, “Monŋo gwaha ten Pol mayke kamyen,” yen fulenŋa marte doyan al kurun gore fulenŋa marmin hulyan yirde, “Kurkun Pol tawanan. Munan epte mon kenem kwep kwep yirde gasa yirhet yirhet yirde gab ten wanayin,” yinyin. Irkeb kun gwahade po tenbe Pol gob fulenŋa marte yare ten kwamin.

¹¹ Be, gwaha tiyamin go wawun goyenbe Doyan Al Kurun beley Pol dilinde forok yenbe, “Kafura ma yo. Taren po heŋ hayin. Yerusalem gar al ne nin momon yirde saba yirde hayen gwahade goyen po Rom taunde manan kun gwahade po ten hayin geb,” inyin.

Yuda mar beley Pol maynin yen sege iramin

¹²⁻¹³ Be, fay urkeb go wampot goyenbe Yuda mar kura 40 gwahade goyen gabu irdeb daha

mat kura Pol mayteke kamyen yen mere sege iramej. Irdeb, “Fudinde wor po, Polbe mayteke kamkeya gab bingeya feya netek,” yenbe bina tiyaminj. ¹⁴ Gwaha tenbe Yuda marte doyan mar parguwakya pris buda gote karkuwanminya hitte kunbe, “Nenbe, ‘Feya bingeya kutnare henbe Pol mayteke kamke wor wor gab ig ulinj titek,’ yihit. ¹⁵ Ningeb denya Yuda marte doyan maryabe fulena marte doyan al kurun hitte kunbe usi irdeb, ‘Pol go sopte tubul ten dunke mataminj ge kenkela gusunanj irninj,’ innayinj. Irkeb tubul ten dunkeb ten wanayinj. Irkeb nenbe belen doyan hen hitek geb, gonj po mayteke kamyen,” yinaminj.

¹⁶ Gega Pol yayinj belen mere momonj go nurdeb fulena marte yare kunj Pol momonj iryinj. ¹⁷ Irkeb Pol gobe fulena mar 100 gote doyan al kura hoy irdeb, “Al gabe doyan alinj hitte kunj mere kura momonj irenj tenj hi geb, yenj hitte tenj kwa,” inyinj.

¹⁸ Irkeb al goreb Pol yayinj goyen fulena marte doyan al kurun hitte tukunbe, “Pol koyare hi al gore hoy nirke kunj kenmekeb, ‘Al gare doyan alinj kurun mere kura momonj irenj tiya. Ningeb doyan alinj hitte tenj kwa,’ ninkeb gago ge hitte tawayhem,” inyinj. ¹⁹ Gwaha inkeb al gore Pol yayinj go haninde tanarde hoyanj belen tukunbe, “Da mere momonj nirenj tenj ha?” inyinj. ²⁰ Irkeb al goreb, “Yuda marbe mere sege irde dufay unjkurenj po irhanj. Ningeb gise go goyenbe wanj, ‘Pol tubul tenj dunke tukunj da mata wor po tiyunj goyen Yuda marte doyan mar dilinde huwarke gusunanj irtek,’ usi girnayinj geb. ²¹ Albe 40

gwahade gore dufay unjkurenj po irdeb, ‘Bingeya feya kutnja irtek geb. Pol maydeya gab mali titek,’ yenj binja tiyanj mar gobe bana kunj gere mere ninj po doyanj hiniyj yahanj. Nijgeb Yuda marte doyanj mar belenj gise wanj mere girke goya yende mere ma nurayinj. Irde Pol wor tubul ma tenj yunayinj,” iniyinj. ²² Irkeb fulenja marte doyanj al kurunj gore huwardeb, “Iginge kwa. Goyenpoga mere momonj nirha gabe al hoyanj kura momonj ma irayinj,” inenj hayhay iryinj.

Fulenja marte doyanj al belenj Pol Feliks hitte tenj kerke kurinj

²³ Irdeb fulenja mar 100 gote doyanj al irawa hoy yiryinj. Irke wakeb, “Derbe kunj fulenja mar kahanje kunj fulenja tenj hanjen mar 200 ya hos hende mat fulenja tenj hanjen mar 70 goyen yinke gitik tinayinj. Irde hakde fulenja tenj hanjen mar 200 goyen mananj momonj yiriryenj. Irdeb denj tunnanj 9 kilok wawunbe Pol tenj Sisaria taunde kurkunayinj. ²⁴ Irde Roma gabman al denjem Feliks Yudia nanja doyanj irde hi al hitte kunayinj. Monjo al belenj maynak geb, Polbe hos hende tenj kunayinj,” yinyinj. ²⁵ Irde asanj kura kanbe yunyinj. Merebe gahade:

²⁶ “Doyanj al Feliks, nebe Klodius Lisias belenj asanj gago kayhem. Gebe doyanj alne wor po yenj nurd gunenj hime.

²⁷ Al gayenbe Yuda mar belenj tenj mayninj tiyanj. Gega Roma al yeke nurdeb fulenja marne yade kunjbe mayninj tenj hinhan mar hanijde mat tenj waminj. ²⁸ Irdeb da misinde wor po Yuda mar belenj mere ulinde irde asogo irde

han̄ goyen gusun̄an̄ yirde bebak tiye yen̄be Yuda marte doyan̄ mar gote gabure tukumin̄. ²⁹ Goyenbe ten̄ fere ten̄ mayteke kami yan̄ gega, min̄ min̄mon̄ gwaha irnin̄ tiyan̄. Min̄ yara kinmin̄be Yuda marte tikula nin̄ ten̄ mere ulin̄de iran̄. ³⁰ Irdeb Pol goyen maynin̄ yen̄ mere sege iran̄ goyen nurdeb balmin̄ po ten̄ kermeke ge hitte kwa gago. Irdeb Yuda mar go da misin̄de wor po al go maynin̄ tiyan̄ goyen ge hitte kun̄ gab delge mat tagalnayan̄ yinmin̄,” gwahade kayyin̄.

³¹ Be, fulen̄a mar go doyan̄ almin̄ kurun̄ belen̄ yinyin̄ goyen po gama irdeb wawun̄ go po Pol ten̄ Sisaria taunde kunin̄ yen̄ kun̄be belen̄ Antipatris taunde feramin̄. ³² Irde fay urkeb fulen̄a mar hos manan̄ gore po Pol ten̄ Sisaria taunde kwamin̄. Irkeb fulen̄a mar hoyan̄ kurun̄ gobe gor mat mulgan̄ hen̄ Yerusalem kwamin̄. ³³ Be, fulen̄a mar Pol ten̄ kwamin̄ go Sisaria taunde forok yen̄be doyan̄ almin̄ belen̄ asan̄ kayyin̄ goyen Feliks Yudia nan̄a doyan̄ irde hiyen̄ al go unen̄be Pol manan̄ yen̄ hitte mekeramin̄. ³⁴ Irkeb Feliks belen̄ asan̄ go kapyan̄ hen̄be Pol go, “Gebe dare nin̄ al?” inen̄ gusun̄an̄ iryin̄. Irkeb Pol belen̄ wol hen̄be, “Nebe Silisia nan̄are nin̄ al,” inyin̄. ³⁵ Irkeb, “Igin̄ge gar hayin̄. Irkeb mere ulger irde han̄ mar goyen wake gab tumnan̄ merere huwarnayan̄. Irkeb meretin̄ nuren̄,” inyin̄. Irdeb meten̄ marmin̄ hulyan̄ yirdeb, “Tukun̄ Herotyen̄ ya kurun̄de gor kerde doyan̄ irde hinayan̄,” yinyin̄.

Polbe Feliks diliŋde huwarde mere tiyyiŋ

¹ Be, wawuŋ siptesoŋoŋ kamereb pris buda gote kurunmiŋ Ananaiasya Yuda marte doyaŋ mar parguwak kuraya Sisaria kuŋ Roma gabman al Feliks hitte Pol go tagal unniŋ yeŋ kurkamiŋ. Goyenterbe al kura deŋembe Tetulus goyen mel gore, “Neŋ faraŋ durde merere harde mere tiyayiŋ,” inkeb mel goya tumŋaŋ kwamiŋ. Al gobe Roma gabmanyen mere sope ird ird mata goyen keŋkela nurde hinhin al.

² Be, Pol niŋ mere kerkeb wayyiŋ. Irkeb Tetulus belen huwarde gaha yiriŋ: “Feliks, gebe doyaŋ al-niniŋ wor po. Ge belen upsiniŋ doyaŋ dirde hike neŋbe dahadem moŋ, igiŋ po heŋ waŋ waŋbe gago hite. Dufayge tiŋeŋ wukkeŋ wor po goyen kerde doyaŋ dirkeb naŋa kurun gayen bana niŋ alya bereya tumŋaŋ igiŋ po hite. ³ Ge belen meten kurun gwahade teŋ hayen goyen goke neŋ tumŋaŋ amaŋeŋ wor po nurd gunen hityen. ⁴ Be, ne belen mere ugun po timeke piŋeŋ nurd nunak geb, bada heweŋ. Gega ok ninkeb mere muŋ kura tiyeŋ. ⁵ Be, al garebe megeŋ kurun gayen kuŋ waŋ teŋ Yuda mar biŋ yakamde dufaymiŋ bulun yirde hinhin. Irkeb kanduk karkuwaŋ karkuwaŋ forok yeŋ hinhan. Yeŋbe al buda kura ‘Nasaret niŋ mar’ yineŋ hanyen gote doyaŋ al. ⁶⁻⁷ Irde al gare po Al Kurunyen ya balem bana goŋ Yuda mar moŋ al miŋ hoyeŋ mali teŋ hurkuŋ. Al gare gwaha mat ya balem goyen bulun ireŋ teŋ hikeb

tenj fere titinj.* ⁸ Ningeb gigenj gab gusunj irkeb yinjen mohonde kenkela tagalke gab gwahade ningeb gago tagal unen merere kerhanj yen bebak tiyayinj,” inyin. ⁹ Be, Tetulus belen mere tenj pasi irkeb Yuda mar bana gonj hinhan gore, “Mere tiya gobe fudinde wor po!” yaminj.

¹⁰ Irkeb Feliks belenj, “Pol, ge wor huwarde mere tiya,” inen haninj tunanj iryinj. Irkeb Pol go huwardeb Feliks goyen, “Gebe dama budamde wor po nanja kurunj gayen doyanj irde hayen. Irde al ge hitte wanj merere huwarke ge belenj dufay kenkela wor po henja mereminj nurde sope irde hayen. Ningeb nebe delger gago nigenj ge pet tenj mere tiyenj tihim. ¹¹ Be, nebe Al Kurunj dolonj ire yenj Yerusalem taunde hurkuminj mat wanj hanja gabe nanja fay 12 hihi. Ningeb usi yenj kenenbe gigenj ga al gusunj yirke bebak girnayinj. ¹² Be, mere ulner irde hanj mar gayen Al Kurunjen ya balem bana al kuraya kadom mohonde ma tenj himeke nenanj. Irde Yerusalem taun banaya Yuda marte gabu yayanj wor al kura ma binj yakamde hinhem. Hubu wor po. ¹³ Ningeb tagalde nunen hanj mar gayen daha matbe minj goke kura merere kirtinj yenj momonj girke nurayinj? Hubu wor po! ¹⁴ Gega Nasaret

* **24:6-7:** Asanj hoyandebe gahade katinj hi: ⁶ Irde al gare po Al Kurunjen ya balem bana gonj Yuda mar monj al minj hoyanj tenj hurkenj tiyuj. Al gare gwaha mat ya go buluj irenj tenj hike fere titinj. Irde nende matare al gate mata buluj goke tagalde murungem untek nurtinj. ⁷ Gega Fuleja marte doyanj al Lisias belenj wanj mudunhem mudunhem dirde Pol gayen tenj kunj. ⁸ Irdeb, ‘Al gayen ulinje merem yanj irtek marbe Feliks hitte kunj momonj irnayinj,’ dinunj,” inyinj.

niņ al Yesu belej tikula kiryiņ goyen gama irde haņ mar al goyen kurabe gago ninen haņ gobe fudinde. Mel gabe Yesuyen tikula goyen fudinde moņ yeņ haņ. Gega nebe gwaha mat Al Kurun asininiņ yago belej doloņ irde hinhan Al goyen doloņ irde himyen. Irde Al Kurunyen mere Moseya Al Kurunyen mere basan marya belej asande katiņ kurun goyen fudinde yeņ nurde gama irde himyen. ¹⁵ Irde mel gare Al Kurun diliņde al huwakyabe huwak moņya goyen tumņan Al Kurun belej kamtiņde mat al yisan heke huwarnayiņ yitiņ goyen fudinde yeņ mata goke doyaņ heņ hanyen gwahade goyen po ne manaņ goke doyaņ heņ himyen. ¹⁶ Goke tenbe bener wukkeņ wor po nurdeya mata ten himeke alya Al Kurunya diliņdebe igiņ po neneņ hinayiņ yeņ kurut yeņ himyen.

¹⁷ “Nebe dama budam po Yerusalem tubul ten nana siņare po kuņ hinhem. Irdeb nere alya bereya Yuda mar kura det miņmoņ al bunineņ goyen faraņ yure yeņ hora ten gab Yerusalem mulgaņ heņ kumiņ. Be, goya goyenbe Al Kurun wor doloņ irde galak ire yeņ kumiņ. ¹⁸ Be, Al Kurunyen ya balemde heņ Yuda marte matare wukkeņ heņ heņ mata ten himekeyab mel gare waņ nenaņ. Goyenterbe al budamya ma hinhet. Balmiņ po heņ al kura ma buluņ irde hinhem. ¹⁹ Ya bana goņbe Esia naņare niņ Yuda mar kura hinhan gore nenaņ. Niņgeb mata buluņ kura timeke nenaņ kenem mel gore po ga delger huwarde ne niņ tagalke nurayiņ. ²⁰ Gega go mar gobe gar ma haņ geb, haņkapyā Yerusalem gor

Yuda marte doyan mar diliᅇde huwarmeke nere kanduk kura ulner hi keneᅇ gab mel gare igiᅇ momoᅇ girnayiᅇ. ²¹ Nebe Yerusalem gor merere huwardeb, ‘Al kamtiᅇbe sopte huwarnayiᅇ yitiᅇ mere gobe fudinde wor po yeᅇ nurde hime. Mere gwahade timiᅇ gokeb gago merere nerhaᅇ,’ yineᅇ kwep kwep yirmiᅇ. Niᅇgeb kanduknebe gogo po yeᅇ nurde hime,” inyiᅇ.

²² Be, Feliks gobe Yesu beler tikula kiryiᅇ goyer kenkela nurde hinhin. Niᅇgeb mere tiniᅇ tiyamiᅇ goyer utaᅇ yirdeb, “Fuleᅇa marte doyan al kurur Lisias beler wake meremiᅇ nurde gab kanduk gake dufay kura kereᅇ,” yineᅇ yakira tiyyiᅇ. ²³ Irdeb fuleᅇa mar 100 gote doyan al gor hinhin goyer, “Pol go tukur koyare kerde doyan irde hayiᅇ. Goyerpoga kurarebe igiᅇ tubul tike dufaymiᅇde wilwul teᅇ hiyeᅇ. Irkeb diᅇur yago kura waᅇ keneᅇ det kurur nurkeb farur urde hinayiᅇ,” inyiᅇ.

²⁴ Be, hitᅇer yara teᅇbe kur nalu kurarebe Feliksya berem Drusilaya wayaryum. Feliks berem Drusilabe Yuda mar bere. Be, waᅇ gor heᅇbe Feliks go Pol niᅇ keya hiriᅇ. Irkeb waᅇ Yesu Kristu niᅇ dufaymiᅇ taren irde yende mere gama ird ird mata niᅇ tagalke nurde hinhin. ²⁵ Be, Pol beler alya bereya Al Kurur diliᅇde daha mat huwak po hinayiᅇ, irde daha matbe uliᅇde po aman hetek mata fole irde hinayiᅇ, irde kame Al Kurur beler alya bereya igiᅇnya bulunya goyer pota yirde muruᅇgem yunyeᅇ goke tagalyiᅇ. Irkeb Feliks beler mere go nurdeb kafura hiriᅇ. Irdeb, “Ep niᅇ, mulᅇur hawa. Irde nalu kurare kura ge niᅇ

yemeke gab wake sopte mere ten hiren,” inyin.
²⁶ Be, Feliks go han kayen han kayen Pol hoy irde mere ten hinaryum gobe, “Gwaha timeke hora kura nunke gab koyare hi goyen tubul timeke kuyen,” yen dufay henbe gogo ten hinhin. Gega Pol gobe hora kura mun ma unyin.

²⁷ Be, Pol go gwahade po hike kun kun dama irawa hubu hirin. Irkeb Feliks go metenmin tubul ten kutek nalu hekeb al kura denem Porsius Festus belen gasunmin tirin. Gega Feliks gore Yuda mar belen amanen nurd nunnayin yenbe Pol koyare po tubul tenbe kurin.

25

Pol belen Sisar hitte kun kun nin Festus gusunan iryin

¹ Be, Festus belen Feliksyen gasun ten doyan al kurun henbe wawun karwo hubu hekeb Sisaria taunde mat Yerusalem taunde hurkurin. ² Goya goyenbe pris buda gote karkuwanminya Yuda marte doyan marya belen Festus hitte kun Pol mere ulinde iramin. ³ Irdeb, “Pol gobe belen doyan hen mayteke kamyen,” yen bikken mere sege irde ep iramin geb, Festus goyen, “Pol go dunke nen belen Yerusalem gar ten wan merere kertek geb, ingin aranen faran durayin we?” inamin. ⁴ Gega Festus belen wol henbe, “Polbe Sisaria taunde koyare hi. Nebe hen ga mon mulgan hen taunde gor kurken tihim. ⁵ Ningeb mata bulun kura tiyun nurde han kenem doyan martin kura gama nirde kunayin. Kun gor gab

tumnaŋ merere huwardebe da mata buluŋ tiyuŋ goyen tagalnayiŋ,” yinyiŋ.

⁶ Be, Festus go wawuŋ 8 wet kura ma 10 gwahade wet goyen mel goya Yerusalem gor heŋbe Sisaria taunde mulgaŋ heŋ kurkuriŋ. Kuŋ firyiŋ geb, fay urkeb Pol teŋ merere kere yeŋbe mere sope ird ird gasuŋde keperdebe metenŋ mariniŋ hulyaŋ yirde, “Kuŋ Pol teŋ wanaŋ,” yinyiŋ. ⁷ Irkeb Pol go merere huwarke Yuda mar Yerusalem mat katamiŋ gore kuŋbe kalyaŋ keramiŋ. Irdeb mere kanduk kurayen kurayen yeŋ uliŋde iramiŋ. Gega meremiŋ goyen bebakkeŋ kura ma tikeb Festus beleiŋ fudiŋde yeŋ ma nuryiŋ. ⁸ Irkeb Pol wor yiŋgeŋ ge teŋbe, “Nebe Yuda marte tikula muŋ kura ma buluŋ irde himyen. Al Kuruyen ya balem wor goke buluŋ ma nurde himyen. Irde Roma niŋ doyaŋ al kuruŋ Sisaryen mere wor keŋkela po gama irde himyen,” inyiŋ.

⁹ Gega Festus go gwaha timekeb Yuda mar beleiŋ biŋde igiŋ nurnayiŋ yeŋbe, “Igiŋ sopte mulgaŋ heŋ Yerusalem hurkuke gab merege gor wor nureŋ?” ineiŋ gusuŋaŋ iryiŋ. ¹⁰ Irkeb wol heŋbe, “Nebe Yuda mar buluŋ kura ma yirmiŋ gobe keŋkela wor po nurde ha gogo. Niŋgeb gago Roma gabmanyen metenŋ al diliŋde kandukne sope ire yeŋ delger huwarhem. ¹¹ Goyenbe fudiŋde mata buluŋ kura timiŋ kenem igiŋ goke teŋ kameŋ. Gote merem moŋ. Gega mel Yuda mar gore mere ulner irde haŋ gayen fudiŋde moŋ kenem al kura beleiŋ epte ma wor po mel gote haniŋde niryenŋ. Niŋgeb gar epte moŋ yeŋ nurde hime geb,

Rom kuŋ Sisar diliŋde gab huwarde mere tiyen yeŋ momoŋ girde hime” inyiŋ. ¹² Irkeb Festusya meten faran marmin yago yinŋen uliŋ Pol mere tiyyiŋ goke sege irdeya gab huwardebe, “Rom kuŋ Sisar diliŋde huwareŋ yaha geb, gwahade po tiyayiŋ,” inyiŋ.

Festus beŋ Pol niŋ Agripa inyiŋ

¹³ Be, naŋa fay karwo gwahade kamereb Yuda marte doyaŋ al kurun Agripaya haymin Bernaisiya beŋ, “Roma gabman al Festus goyen kuŋ kenye. Irkeb palap nirhar yeŋ nuryeŋ,” yeŋ Sisaria taunde kwaryum. ¹⁴ Be, Agripa go sobamde yara po gor hikeb Festus beŋ Pol niŋ momoŋ ire yeŋbe gaha inyiŋ: “Al kura Feliks beŋ teŋ koyare kerde tubul teŋ kuŋ gobe gar hi. ¹⁵ Yerusalem taunde hurkumiŋ. Irkeb pris buda gote karkuwanminya Yuda marte doyaŋ mar parguwakya beŋ ne hitte waŋbe al go merem yaŋ irde, ‘Ge beŋ gab al go teŋ merere kerde mata bulun tiyaŋ inayiŋ,’ yeŋ gusuŋaŋ niraŋ. ¹⁶ Irkeb ne beŋbe, ‘Roma gabmanyen matarebe al kura merere huwarkeb tagal unnayiŋ mar go manaŋ tumŋaŋ merere huwarnayiŋ. Irdeb al goreb mel gote diliŋde yinŋen ge teŋ mere tiyyeŋ. Gwaha ma tiyyeŋ gobe miŋ miŋmoŋ epte ma tagal unnayiŋ mar goyen haniŋde mekertek,’ yinmin. ¹⁷ Gwaha yineŋbe tumŋaŋ waŋ gar firtiŋ geb, fay urkeb mere nurd nurd gayen araneŋ po nure yeŋ Pol go tawanaŋ yinmeke tawayaŋ. ¹⁸ Irkeb al buda merem yaŋ iraneŋ mar gore Pol uliŋde mata bulun wor po kura wet tiyuŋ geb, tagalniŋ tahaŋ yimiŋ gega, hubu. ¹⁹ Meremiŋ kura gobe asem

yagot mataya sabaya niŋ al goya kadom mohonđe tiyaŋ. Irde meremiŋ kurabe Pol gore al kamtiŋ kura deŋembe Yesu goyen huwaryiŋ hi yekeb goke manaŋ kadom mohonđe tiyaŋ. ²⁰ Irkeb gwaha mat kura meremiŋ goyen fudinđe ma usi goyen bebak titek ma himiŋ. Niŋgeb bada heŋ Pol go, ‘Igiŋ Yerusalem taunde hurkuŋ gor sopte merere huwarayiŋ?’ ineŋ gusuŋaŋ irmiŋ. ²¹ Gega Pol beleŋ huwardebe, ‘Nebe Roma gabmanyen doyaŋ al kurun hitte kuŋ yeŋ diliŋ mat huwarde gab mere gayen tagaleŋ,’ ninuŋ. Gwaha ninkeb bada heŋ meten marne hulyaŋ yirdeb, ‘Belheŋ tukun koyare kerde doyaŋ irde hinayiŋ. Irkeb kame ga ten kermeke Sisar hitte kuyen,’ yinmiŋ,” inyiŋ.

²² Be, Agripa beleŋ mere momon go nurdeb, “Mere gayen nigeŋ wor po nuren yeŋ nurde hime,” inyiŋ. Irkeb Festus beleŋbe, “Gise ga meremiŋ nurayiŋ,” inyiŋ.

²³ Be, fay urkeb Polyen mere nurye yeŋbe Agripaya haymiŋ Bernaisiya goyen al beleŋ denen turun dirnayiŋ yeŋbe doyaŋ mar karkuwanđe umŋa bidak ten mere sope ird ird gasunđe kwaryum. Sisaria taunde niŋ fulenŋa mar karkuwanya taun gote doyaŋ mar manaŋ yad kwaryum. Be, forok yeŋ gasunmiŋyaŋ keperde tukukeb Festus beleŋ meten marmiŋ yinke kuŋ Pol tawayamiŋ. ²⁴ Irkeb Festus beleŋ huwardeb, “Yuda marte doyaŋ al kurun Agripaya deŋ gar gabu irhaŋ mar ga nurnaŋ ko. Al ga keneŋ haŋ gabe Yuda mar kurun Sisaria taunde garya Yerusalem taunde haŋ mar tumŋaŋ gore, ‘Al gabe

daniñ ma tubul teñ dunke mayhet,' yeñ gusuñan nirde kwep kwep teñ epte ma tiyan. ²⁵ Gega mata buluñ bebakkeñ kura tiyuñ irke goke mayteke kamyen yeñ ma kinmiñ. Irde Pol goreb, 'Roma gabman doyañ al kurun hitte kuñ yeñ diliñde merere huwareñ,' yeñ gusuñan niruñ. Niñgeb goke teñbe al ga teñ kermeke Rom kuyeñ yeñ nurmiñ. ²⁶⁻²⁷ Goyenpoga miñ goke asañ kañ al ga teñ kermeke Roma gabman doyañ al kurun Sisar hitte kuyeñ yeñ ma nurde hime. Dufaynerbe al merere yirtin goyen miñ keñkela ma nurde mali po Sisar hitte yad yermeke kunayin gobe igin moñ yeñ nurde hime. Niñgeb goke teñbe diltin mat gago teñ wayhem. Irde Yuda marte doyañ al kurun Agripa, ge manañ gar ha. Niñgeb ge beleñ gusuñan irde mere miñ keneñ bebak teñ gab momoñ nirke asañde kayeñ," inyiñ.

26

Pol beleñ Agripa diliñde mere tiyyin

¹ Be, Festus beleñ gwaha yekeb Agripa gore, "Be, gigen ge kura tagalke nurniñ," inyiñ. Irkeb Pol go mere miñ ure yeñbe haniñ tuñan urde gaha inyiñ: ² "Yuda marte doyañ al kurun Agripa, Yuda mar beleñ mere ulner irde hañ kurun gayenbe fudinde moñ yeñ nigen ge teñ al hoyan diliñde moñ delger po huwarde tagaleñ tihim gake amañeñ nurhem. ³ Delger huwarhem gake amañeñ nurde hime ginhem gobe dahade moñ. Gebe Yuda marte mata keñkela wor po nurde hayen. Irde da misiñde wor po nindikeñ Yuda mar uliñ kadom mohoñde teñ hityen goyen wor

kenkela nurde hayen. Niŋgeb mere tiyeŋ tihim gayen piŋeŋ ma nurayiŋ.

⁴ “Yuda mar kurunŋ gobe ne damde kawan himiriŋ, irde bikkeŋ naŋaner mat waŋ Yerusalem gor keperde kurunŋ henyabe dahade hinhem goyen kenkela wor po nurde nuneŋ haŋ. ⁵ Niŋgeb mel gobe ne hakot al foŋeŋ hinhemya Farisi mar al heŋbe daha teŋ hinhem goyen nurde pasi geb, momoŋ girniŋ yeŋbe igiŋ momoŋ girnayiŋ. Farisi marbe Yuda marte tikula tareŋ wor po tanarde gama irde haŋyen. ⁶ Be, haŋka merere nerhaŋ gabe Al Kurunŋ beleŋ bikkeŋ asininiŋ yago hitte mata kura forok yiyyeŋ yeŋ biŋa tiyyiŋ goyen ne manaŋ goke doyaŋ irde hime niŋgeb, gago merere huwarhem. ⁷ Al Kurunŋ beleŋ biŋa tiyyiŋ gote igineŋbe Yuda mar kurunŋ gayen wawuŋya naŋkahalya hugiŋeŋ Al Kurunŋ doloŋ irde heŋya kentek yeŋ doyaŋ heŋ haŋyen. Gega, doyaŋ al kurunŋ Agripa, Al Kurunŋ beleŋ biŋa tiyyiŋ goyen neŋ tumŋaŋ doyaŋ irde hityen gote igineŋ forok yiriŋ goyen goke tagalde himekeb gago Yuda mar beleŋ merem yaŋ nirde haŋ. Igiŋeŋbe Yesu kamiŋde mat huwariŋ gogo. ⁸ Niŋgeb nebe fudinde wor po Al Kurunŋ beleŋ al kamtiŋbe sopte yisaŋ hiyyeŋ yeŋ nurde hime. Munaŋ deŋ kurunŋ gar gabu irhaŋ mar gabe daniŋ usi yeŋ nurde haŋ?

⁹ “Bikkeŋbe ne wor kamiŋde mat sopte huwariŋ yeŋ hinhan al Nasaret niŋ Yesu goke igiŋ ma nurdeb fudinde wor po asogo ireŋ yeŋ nurde hinhem. ¹⁰ Irdeb goyen po gama irdeb kuŋ pris buda gote karkuwaŋmiŋ momoŋ yirmeke ok

ninkeb kuŋ Yesu niŋ dufaymiŋ saŋiŋ irtiŋ mar goyen budam yade koyare yerde hinhem. Irde gasa yirteke kamnaŋ yeke ne manaŋ, ‘Igiŋ gwaha yirnayiŋ,’ yemeke gasa yirde hinhan. ¹¹ Irde hugiŋeŋ Yuda marte gabu yayaŋ kuŋ Yesu niŋ dufaymiŋ tareŋ irtiŋ mar go yeneŋbe buluŋ buluŋ yirde gasa yirde hinhem. Irde, ‘Yesu nanyaŋ irde harhoktiŋ unnayiŋ,’ yineŋ kanduk karkuwaŋ karkuwaŋ yuneŋ hinhem. Nebe go mar goke bene ar wor po yeŋ hinhin geb, yeŋ ge naŋkene yeŋ taun hoyanđe naŋa gisaw wor kuŋ hinhem.

¹² “Mata gwahade kurun goyen teŋ kuŋ henya nalu kurarebe pris buda gote karkuwaŋmiŋ beleŋ igiŋ ninkeb Yesu niŋ dufaymiŋ tareŋ irtiŋ mar fere yire yeŋ Yerusalem taunde mat Damaskus taunde kumiriŋ. ¹³ O, Agripa, kuŋ henyaŋe naŋa baŋkahal heke hulsi saŋiŋ kura naŋa folek kurun gore naŋkiŋde mat neyabe al neya kuŋ hinhet mar hitte temeyke kinmiriŋ. ¹⁴ Be, hulsi kurun gore gwaha dirke neŋ tumŋaŋ megen dakteŋ mudunyiŋ. Irke al melak kura Yuda marte mere mat, ‘Sol, Sol, daniŋ buluŋ buluŋ nirde ha? Asogo nirde fuleŋa nirde ha gobe gigeŋ manaŋ buluŋ irde ha geb,’ ninyiŋ. ¹⁵ Irkeb ne beleŋ wol heŋbe Doyaŋ Al Kurun goyen, ‘Gebe ganuŋ?’ inmekeb Doyaŋ Al Kurun beleŋ gaha ninyiŋ: ‘Nebe Yesu. Ge beleŋ mununeŋ buluŋ buluŋ nirde ha al goyen. ¹⁶ Niŋgeb huwara. Haŋkabe meten alne gire yeŋbe gago delger hihim. Niŋgeb delger nenha gaya det budam kame gikala girde heŋ goyen tumŋaŋ kuŋ alya bereya hitte tagalde kuŋ hayiŋ. ¹⁷⁻¹⁸ Nigeŋ po gad germeke Yuda marya

al miñ hoyanya hañ bana kwayiñ. Kuñ ne niñ tagalkeb biñ bak yenayiñ. Irkeb Satanyen tareñ bana hañ go tubul teñ Al Kurun hitte waniñ yenbe ne niñ dufaymiñ tareñ irnayiñ. Irkeb Al Kurun belem mata bulunmiñ halde yunkeb Al Kurun dirneñ weñ henayiñ. Meten go teñ hikeyabe Yuda marya al miñ hoyanya belem mugunen hinayiñ gega, ne belem doyan girde heñ,' ninyiñ.

¹⁹ “Niñgeb Yuda marte doyan al kurun Agripa, nebe yuwarwarte nanñinde mat Yesu delner forok yen mere niryiñ goyen pel ma irde gama irmiriñ. ²⁰ Nebe meremiñ po gama irdeb Damaskus taunde niñ Yuda mar hitte wa Al Kurunyen mere tagalmiriñ. Irdeb Yerusalem taunde niñya Yudia nanare niñya al hitte kuñ Al Kurunyen mere tagalde hinhem. Irde al miñ hoyan Yuda mar moñ hitte wor Al Kurunyen mere tagalde kuñ hinhem. Gwahade tagalde kuñ henyabe, ‘Mata bulunñiñ yubul teñ Al Kurun niñ bitin mulgan henayiñ. Gwaha teñbe Al Kurun diliñde mata igiñ po teñ hinayiñ. Irkeb al hoyan belem denenbe fudinde Al Kurun niñ biñ mulgan hañ yen dennayiñ,’ yen saba yirde hinhem. ²¹ Ne gwaha teñ kuñ himekeb Yuda mar belem goke igiñ ma nurde Al Kurunyen ya balem bana goñ nade mununniñ tiyamiñ. ²² Gega Al Kurun belem faran nurkeb wan wan hanka gago delger huwarde al denem yanya al maliya hitte Yesu niñ tagalde hime. Nebe Moseya Al Kurunyen mere basan marya belem kame mata kura forok yiyyen yitiñ goyen go po tagalde hime. Hoyan niñ ma tagalde hime. ²³ Mata kame forok yiyyen yen

tagalamiŋ gobe Mesaia niŋ tagalamiŋ. ‘Mesaiabe uliŋ misiŋ kurun kateŋ gab kamyen. Irde gor mat huwaryen. Mata gobe tiŋen wor po. Al kura gwaha ma titiŋ. Yenbe Yuda marya Yuda mar moŋ kidoma bana heŋ mata bulun ten haŋ marya goyen biŋ bak yenayiŋ yen gogo kamtiŋde mat huwaryen,’ yamiŋ,” inyiŋ.

Pol beŋ Agripa goyen Yesu gama irayiŋ inyiŋ

²⁴ Be, Pol go yiŋen ge ten hako tagalde hikeyabe Festus beŋ merem waldebe, “Pol, gebe kukuwa haha! Dufay karkuwan karkuwan yawarariŋ gore girke kukuwa heŋ ha gogo,” inen kwep iryiŋ. ²⁵ Gega Pol beŋ wol heŋbe, “Doyan al Festus, mere gabe fudinde yen hime. Kukuwa henya ma yen hime. ²⁶ Yesu uliŋde mata forok yiriŋ gobe balmiŋ ma forok yiriŋ geb, Agripabe mata goyen keŋkela nurde hi. Niŋgeb mere ten hime gab yenbe goke yen hi yen nurde hi. Goke tenbe nebe kafura ma heŋ yen diliŋ mat igiŋ mere ireŋ,” inyiŋ. ²⁷ Irdeb Agripa kenenbe, “Ge gayen Al Kurunyen mere basan mar beŋ mere tagalde hinhan goyenbe fudinde yen nurde ha? Ne benerbe fudinde yen nurde ha yen genen hime,” inyiŋ. ²⁸ Gwaha inke Agripa beŋ wol heŋbe, “Gayamuŋ gayen po parsay irmekeb Kristen al hiwi yen nurde gago kurut nirde ha?” inyiŋ. ²⁹ Irkeb wol heŋbe, “Nalu ulyanđe ma dolfonde goke ma nurde hime. Gega haŋka geya al buda kurun gar heŋ merene nurhan gayen tumnan ne himiŋ gwahade po den wor Yesu niŋ dufaytiŋ saniŋ yirnayiŋ yen Al Kurun gusuŋan irde hime.

Gega gama nirde koyare hinan yey ma dinen hime,” inyin.

³⁰ Irkeb Yuda marte doyan al kurun Agripaya haymin Bernaisiya Roma gabman doyan al Festusyabe al buda kurun gor hinhan goya tumnan bur yinin yey huwaramin. ³¹ Irdeb mere sope ird ird gasun go tubul ten kun henya yingen ulin mere tenbe, “Al gabe mata bulun kura ma tiyun gega, da misinde wor po ten koyare kerde mayteke kami yey kurut yey han?” yamin. ³² Be, Agripa beley Festus go, “Al gabe kun Sisar dilinde huwarde ga mere tiyen ma yiyun manhan han ka gayenbe okohom po tubul titeke kuwon,” inyin.

27

Rom kun kun nin Festus beley Pol go hakwa hende kiryin

¹ Be, Festus gore Pol go Rom taunde ten kermeke kuyen yey nurde al kura denembe Yulius haninde kiryin. Al gobe “Sisaryen Fuleja Mar” yinen hanjen gote fuleja mar 100 doyan yirde hinhin. Goyenterbe al hoyan kura koyare hinhan mar go manan al gote haninde yiryin. Irke Yulius beley mel go yade hakwa ten Itali nanare kunin tikeb nen manan Pol go gama irde tumnan kunin titirin. ² Be, Sisaria taun nen hinhetde gorbe hakwa kura Esia nanare nin taun Adramitium mat wayyin goyen kintirin. Irdeb hakwa go sopte mulgan hen Esia nanare nin taun makan sinayan kwen ten hike nurtirin. Irde go hende kutirin. Hakwa hende gorbe Masedonia nanare nin taun Tesalonaika nin al Aristakusya tumnan kutirin.

³ Be, kuñ fay urkeb Saidon taunde forok yitirin. Gorbe Yulius belen Pol igin igin ire yenbe, “Kuñ dige yago kura yena. Irkeb det kuran nurde ha goyen faran gurnayin,” inyin.

⁴ Be, taun go tubul ten kutekeb meñe kurun wor po huwarke kuñ kuñninin metenen diryin. Irkeb Saiprus motmotbe hanninin tapa belen pel irde ketal urde kutirin. ⁵ Irde Saiprus motmot murun fafor tenbe Silisiaya Pamfilia nanare nin makan ala goyen kahal po paten kuñ Lisia nanare nin taun Maira forok yitirin. ⁶ Gorbe Yulius belen Isip nanare nin taun Aleksandria nin hakwa kura goyen Itali nanare kwen ten hike kinyin. Irdeb hakwa go hende kunan dinkeb go hende hurkutirin.

⁷ Be, kutirin gega meñe kurun huwarkeb wawun budam makeñde hinhet. Irde bekenñe kuñ kuñbe Nidus taunde forok yitirin. Irde gor mat Rom po kuniñ yitirin gega, meñe muñ kura falmuk ma hirin. Irkeb bada hen hakwa go bul irde Krit motmot murun deñembe Salmone goyen hanninin yase belen pel irde motmot go ketal urde kutirin. ⁸ Be, kutirin goyenbe meñe kurun po geb, hakwa bemel kuñ kuñ goyen metenen diryin. Irkeb makan feren gama irtinen ten kuñ tiyun kura deñembe “Makan Kamtinde” gor forok yitirin. Tiyun gobe Lasea taun bindere hinhin.

⁹ Be, belen kuñ hinhetya goyenbe nana fay budam wor po yubul titirin. Irde gonbe Yuda marte Binje Kutna Nalu hubu hen meñe bulun kurun forok yeke makeñde epte ma kutek nalu hewen tike ¹⁰ Pol belen Yuliusya hakware nin

metenj marya goyen, “Mel, kuniñ yeke kuniñ tihit go belenbe kanduk kurunj kenteke geb. Hakwaya samunya yemeyde nindikenj mananj bulunj hetek geb,” yinenj hayhay yiryin. ¹¹⁻¹² Gega al budam belenj, “Garbe meñe nalure hakwa hitek monj geb, Finiks taunde kuniñ. Gorbe naña bulunj heke hakwa hitek gasunj iginj geb, taunde gor henj meñe goyen doyanj irde hiteke wanj fole tike gab kutek,” yaminj. Finiks taun gobe Krit motmot goyen murunj, naña kurkur belenj mat hinhin. Be, al budam gwaha yekebe Yulius belenj Polyen mere gama irtinjenbe hakware ninj metenj marte doyanj alya hakwa gote minj al gote mere po fudinde yenj nuryin.

Karam meñe kafuram wor po huwaryin

¹³ Be, kuniñ titekeyabe meñe iginj mat wake kenenbe mel gore, “Meñe nenj yitinj go gago forok yihi,” yaminj. Irde anja tulunj tike hurkukeb hakwa go tenj Krit motmot goyen makanj ferenj gama irtinjen tenj kwaminj. ¹⁴ Gega henj ga monj yuwara meñe kurunj Krit motmot dugure mat katyin. ¹⁵ Irke Finiks taunde kuniñ yenj tunanj urtirinj gega, meñe go kurunj wor po geb kutek monj hekeb tubul tike yenj belenj po hakwa go tenj makanj alare tukurinj. ¹⁶ Irde meñe belenj dukukeb motmot dirnenj kura denembe Kauda goyen ketal urde kutirinj. Goyenterbe hakwa dirnenj kura hakwa kurunj nenj kunj hinhetde gor feñ titinj tulunj tenj hinhin goyen bulunj hiyyenkek yenbe tenj hakwa kurunj hende kirninj yenj hakware ninj metenj mar belenj kurut yaminj. Metenjenj yiryin gega, kamebe tenj keraminj. ¹⁷ Irdeb

hakwa kurun go hende kun hinhet goyen galan yiyyenkek yenbe kan taren belen po yade hakwa yufuk bana yerke kurkukeb hakwa goyen he fere titin yara irde taren iramin. Irde Libia nanare nin makan sinare Sairtis inen hanyende gor ka kininin karkuwan gor hanyen geb, hakwa go kun gor nek yiyyen yen kafura hamin. Irdeb gwaha irteke hakwa ga bekennde kwi yen anga tubul tike kurkurin. Goyenbe mene belen ten kun hinhin po.

¹⁸ Be, karam mene kafuram kurun goyen mun kura ma falmuk hiri. Irkeb makan duba karkuwan karkuwan gore wan hakwa go karim ma irde hinhan. Irkeb kun fay urkeb hakwa goyen mun kura hipirken hiwi yenbe hakware nin meten mar belen tiyun kurar nin det goyen kura yade makannde yemeyamin. ¹⁹ Be, sopte po fay urkeb meten mar belen hakware nin meten ten ten det kura yade yemeyamin. ²⁰ Be, nalu sobamde po makannde hinhet goya goyenbe menyaya makanya goyen kura mun falmuk ma po haryum. Bulun wor po hekeb nanaya dinambeya mun kura ma yintirin. Irdeb, "Go ma hitek. Makannde po kamnin tihit," yen nurtirin.

²¹ Be, al buda kurun go dula ma tike kun kun nalu ulyande hiri. Irkeb Pol belen huwarde gaha yinyin: "Mel, mere dirmin goyen nurdeb Krit motmot ma tubul titin manhan kanduk kurun gahade ma kentewon. Irde hakware nin detya samunya kurun gayen ma yemeywon. ²² Goyenpoga nen al buda kurun gayenbe kura ma po kamtek. Hakwa po ga bulun hiyyen.

Niṅgeb kafura ma yo. Tareṅ heṅ hinayiṅ. ²³ Nebe Al Kurunyen meten al. Yen ge po meten ten hime. Niṅgeb hanṅka wawunbe yende miyon beṅ waṅbe, ²⁴ 'Pol kafura ma yo. Gebe Sisar dilinḍe huwarde mere tiyayiṅ geb. Irde Al Kurun beṅ geya hakwa hende kuṅ han mar buninḅen nurd yunen faran yuryen geb go ma kamnayin,' nina. ²⁵ Niṅgeb nebe Al Kurun beṅ nina gwahade po forok yiyyen yen hekkeṅ nurde hime. Niṅgeb goke tenbe gago kafura ma heṅ sanin po hinayiṅ dinhem. ²⁶ Goyenbe hakwa gabe kuṅ motmotde kura gor heṅ gab bulun hiyyen geb, goyen nurde ga hinayiṅ," yinyin.

²⁷ Be, hakwa ten Krit motmotde nin taun kura denembe "Makan Kamtinḅe," go tubul ten wan wan wawun 14 hiriṅ. Goyenterbe mene beṅ po dade makan kura denem Mediterenian Makan beṅ gon dukuriṅ. Irkeb wawun binḅe gwahadebe hakware nin meten mar goreb megen kura bindere hi yara nuramiṅ. ²⁸ Gwahade nurdeb kan yulyan kura tenbe det kanduk ten kan murun kurhan fen tenbe ten kerke makan bana kurkuriṅ. Gwahade irde makan go dukunmin tunan tiyaminbe 40 mita kenamiṅ. Be, mun kura kutnen tenbe sopte po tunan tiyamin. Irde goyareb dukunminbe 30 mita po kenamiṅ. ²⁹ Gwahade kenenbe monḅo uguṅ po kutekeb hakwa ga hora hende hurkun galan yiyyen yenbe anḅa sipte yade hakwa kimyan beṅ mat yemeyamiṅ. Gwaha irde gor henbe aranen fay urwon yen nurde hinhan.

³⁰ Goya goyenbe hakware nin meten mar

kurabe busaharniņ yeņ aņģa hoyaņ kura sopte muruņ belēņ mat yemeyhet usi teņbe kuņ hakwa dirneņ bikkeņ isaņ heņ hakwa kuruņ hende keramiņ goyen teņ kerke makaņde kurkuņ hinhin. ³¹ Irkeb Pol belēņ go yeneņbe fulēņa marya doyaņ almiņ Yuliusya hitte kuņbe, “Metēņ mar gayen hakwa ga tubul teņ busaharnayiņbe deņ kuruņ gayen epte ma hinayiņ,” yinyiņ. ³² Gwaha yinkeb fulēņa mar goreb kuņ hakwa dirneņ giti irtiņ kaņ go walke makaņ alare katkeb tubul tiyamiņ.

³³ Be, naņa miņģe hekeb Pol belēņ mel go yeneņbe, “Naņa fay 14 bana gayen kafura wor po heņ biņģe kura ma naņ. ³⁴ Goyenbe kuratiņ muņ kura ma kamyēņ. Niņģeb dufaytiņ tareņ irde biņģe nene tareņ po heņ hinayiņ,” yeņ kimneņ yiryiņ. ³⁵ Be, Pol go gwaha yineņbe kuņ beret teņbe al buda kuruņ go diliņde beret goke Al Kuruņ turuņ irde ubala teņ niriņ. ³⁶ Irkeb al buda go Pol belēņ gwaha yinkeb biņģe igiņ nurde saņiņ heņbe biņģe namiņ. ³⁷ Be, hakwa hende gorbe al 276 hinhet. ³⁸ Be, biņģe keņkela wor po heņ namiņ. Irde ep irhet yeņ nurdeb biņģe kura hinhan gobe hakwa muņ kura hipirkeņ hiwi yeņbe yade makaņde yemeyamiņ.

³⁹ Be, naņa fay urkeb hakware niņ metēņ mar belēņ megeņ kura kenamiņ. Goyenpoga naņa gor hihit yeņ bebak ma tiyamiņ. Irde hakwa kuņ gor heņ heņ gasuņ kura sawsawa miņyaņ goyen keneņbe igiņ wet gor kuniņ yeņ nuramiņ. ⁴⁰ Irdeb al kurabe kuņ aņģa gote kaņ walde pasi yirkeb al kurabe kuņ hakwa tigiri teņ teņ det

kimyan belen hiyen gote kan goyen yugu tiyamin. Munan kura marbe hakwa hende nin sel goyen isan hamin. Irkeb hakwa gobe makan sinare sawsawa minyande kurin. ⁴¹ Gega kun henyabe katul kurun hende hurkun nek yen dapsan hirin. Irkeb makan duba karkuwan wan kimyan belen mayke maykeb gilgalan iryin.

⁴² Gwaha tike kenenbe fulen mar belen al koyare nin yade kun hinhan goyen galun ten kun huginen busaharnak yen bidilare gasa yirnin tiyamin. ⁴³ Gega doyan almin Yulius belen Pol nin nurdeb fulen marmin utan yiryin. Irdeb, “Fe galun ten ten nurde han mar go wa solok yen galun ten sinare kunayin. ⁴⁴ Irde fe galun ten ten ma nurde han marbe hakwa galan yitinde nin he parwek kura ma det potpot titek kura yanarde galun ten kunayin,” yinyin. Be, gwaha mat nen tumnan ala igin po sinare forok yitirin. Al kura ma kamamin.

28

Malta motmot

¹ Be, nen tumnan sinare hetekeb motmotde gor nin mar belen, “Motmot gabe Malta,” dinamin. ² Gorbe kigarin kurun katke nana menjek wor po hirin geb, mel gore gargar wor po dirde dukun kak kawalde dunamin. ³ Irkeb Pol belen kun he fere kura tawan kak hende kiryin. Goya goyenbe kunere duwi kura he fere bana gon hin hin geb, kak belen uka irke busaharde katenbe Pol haniinde isen bingun tiyyin. ⁴ Irkeb motmotde gor nin al belen kenenbe yingen ulin mere tenbe,

“Fudinde wor po, al gabe al gasa yirke kamde kamde al. Ningeb yenbe makañde po kamwon gega, go ma kamkeb al banare hi goreb mata bulunminde murun gembe kunere belej isa gago,” yamin. ⁵ Gega Pol go ulinde misin kura ma nuryin. Irde kunere go taran ten kak alare timiyyin. ⁶ Goyenbe mel gore Polbe haninya ulinya pompom wet yinin tahan ma, huwarde hire mat dilin girgir irke takten mayke bemel po kamen tiya yen nuramin. Irde Pol go daha kura tiyen tiya yen kenkela po kenen hinhan. Gega daha kura ma tike kenenbe, “Nenbe usi tihit. Al gabe unğura geb, gago ma kama,” yamin.

⁷ Be, Malta motmotde nin doyan al kura denembe Publius goyen gor hinhin. Yenbe nen hinhet bindere hinhin, irde megenminbe kurun wor po. Be, yen belej nen hoy dirke kun yenza wawun karwo gor firtirin. Gor hitekeb yen belej gargar dirde igin igin wor po dirke amanen nurde hinhet. ⁸ Be, gor hinhetya goyenbe Publius nanibe ayganya kasorsorya bulun wor po irkeb gasunde po firtinde hinhin. Irkeb Pol go mere momonmin nurdeb kun kenen hanin yerde unen Al Kurun gusunan irkeb igin hirin. ⁹ Be, goyen kenenbe garbam mar kurun motmot goyenter nin goyen pasi po Pol hitte wayamin. Irkeb yen belej garbam mar goke Al Kurun gusunan irkeb igin hamin. ¹⁰⁻¹¹ Irkeb go kenenbe palap wor po dirde mata igin igin po diramin.

Pol go Rom taunde forok yirin

Be, Malta motmotde gorbe gagasi karwo hinhet. Go kamereb hakwa kura menje kurun nalu

heke gor hen henbe nalu go hubu heke kwen ten hinhin goyen kenenbe hakwa go hende kutek yitirin. Irkeb al buda Malta motmotde nin gore hakwa hende kun henyabe det goke nurnayin yenbe det galak dirde yingen po yukun hakwa binde yerde dunamin. Hakwa gobe Isip nanare nin taun Aleksandria nin. Hakwa go murundebe Grik marte tikula al irawa denembe Kestaya Poluksyat tonen yirin.

¹² Be, Malta motmotde matbe kun kun Sisili motmot kurunde gor nin taun kura denembe Sairakus forok yitirin. Irde nana fay karwo gor hinhet. ¹³ Irde gor matbe kun Itali nanare nin taun kura Regium forok yitirin. Be, firtirin fay urkeb taun go tubul ten kutirin. Kun henyabe mene igin mat huwarke igin po kutirin. Be, wawun hen kun sopte fay urkeb Itali nanare nin taun hoyan kura Puteoli forok yitirin. ¹⁴ Gorbe Yesu nin dufaymin taren irtin mar yupi titirin. Irkeb yen belen pere dirde gargar diramin. Be, mel goyabe meten nana unkuken gor hinhet. Go kamereb Rom kuni yen taun go tubul ten kahanininde kutirin. ¹⁵ Irkeb al buda kura Yesu nin dufaymin taren irtin mar Rom taunde gor nin belen nende mere momon nuramin. Irdeb wan nen ge doyan hini yen gasun kura “Apius Maket” inen hanyende gor doyan dirde hinhan. Munan al buda kurabe taun kura denembe “Ferd ferd Gasun Karwo” inen hanyende gor wan doyan dirde hinhan. Be, kun gor forok yen Pol belen al buda go yenen binde igin nurde sanin hen Al Kurun turun iryin.

¹⁶ Be, kuñ Rom taunde forok yitiriñ. Irkeb Roma gabman beleş Pol go koyare ma kerdebe ya kura unamiñ. Irke gor heñbe gagasim gagasim ya go damu teñ hinhin. Goyenpoga yeñ unñkureñ po ma hinhin. Fuleña al unñkureñ kura beleş doyañ irde hinhin.

¹⁷ Be, Pol go kuñ naña fay karwo kamereb Yuda marte doyañ mar gor hinhan goke keya hirin. Be, wañ gabu irkeb gaha yinyin: “Kadne yago, nebe nende alya bereya buluñ ma yirmin. Irde asininiñ yagot mata kura ma pel irmin. Gega Yuda mar Yerusalem hañ gore merem yañ nirde Roma mar haniñde nerañ. ¹⁸ Irkeb Roma mar beleş gusuñañ nirañ gega, miñ goke kura mununke kamtek moñ geb, nade siñare nirniñ tiyañ. ¹⁹ Irkeb Yuda mar goreb goke igiñ ma nurañ. Irkeb nebe gwaha kura titek moñ nurdeb, ‘Sisar diliñde ga mere tiyeñ,’ yeñ Roma al go inmiñ. Gega nere al goyen tagal yune yeñ ma gwaha inmiñ. ²⁰ Niñgeb nigen goyen momoñ dire yeñbe gago deñ ge keya hihim. Yuda mar kuruñ gare al kame wañ doyañ diryeñ yeñ doyañ irde hañyen al goke tagalde himekeb gago koyare nerañ,” yinyin.

²¹ Irkeb mel gore wol heñbe, “Yuda mar Yudia nañare hañ gore kura asañ kañ ge niñ momoñ dirdem moñ. Irde nende al kura Yudia nañare mat wayañ gore kura ulger mere buluñ kura ma tagalke nurtin. ²² Gega al budam hike kwa kuruñ gabe deñ Yesu gama irde hañ mar goke tagalde duney hañ. Niñgeb goke momoñ dirke nurnin yeñ nurde hite,” inamiñ.

²³ Be, gwaha inenbe sopte gabu irniŋ yeŋ nalu tiyaŋiŋ. Be, nalu tiyaŋiŋde gor hekeb Pol hinde gor al karim ma gabu iramiŋ. Haŋkapy a gabu iramiŋ gwahade moŋ. Irkeb wampot mat Al Kurun beŋ dirneŋ weŋ doyaŋ yird yird mata goke saba yirke kuŋ kuŋ wawuŋ hiriŋ. Irde Yesu niŋ momoŋ yirmeke bebak tinaŋ yeŋbe Mose beŋ tikula asaŋde kayyiŋ goya Al Kurunyen mere basaŋ mar beŋ asaŋde katiŋde gor mat mere gote miŋ tagalyiŋ. ²⁴ Irkeb kura marbe Pol beŋ mere tiyyiŋ gobe fudinde yekeb kurabe usi yeŋ nuramiŋ. ²⁵ Mel gore gwaha yeke Pol beŋ yeneŋbe mere funaŋ gaha yinyiŋ: “Holi Spirit beŋ mere fudinde kura asetiniŋ yago nurnaŋ yeŋ Al Kurunyen mere basaŋ al Aisaia momoŋ irkeb gahade kayyiŋ:

²⁶ ‘Al Kurun beŋ Israel mar hitte kuŋ gaha yinayiŋ nina:

Deŋbe merene nurde hinayiŋ, irde keneŋ hinayiŋ gega, bebak ma po teŋ hinayiŋ.

²⁷ Fudinde wor po, mel gate biŋbe saŋiŋ wor po. Kirmiŋbe migisuŋ yurtiŋ. Irde diliŋbe mala titiŋ.

Moŋ manhan kirmiŋde nurde, diliŋde keneŋbe biŋde bebak wor po teŋ ne hitte mulgaŋ heŋ wake sope yirmewoŋ,’ yitiŋ hi. *Aisaia 6:9-10*

²⁸⁻²⁹ Niŋgeb yiriŋ gwahade po deŋ Yuda marbe Al Kurunyen mere pel irde haŋyen geb, Al Kurun beŋ alya bereya yumulgaŋ teŋ teŋ gote mere igiŋ goyen al miŋ hoyoŋ Yuda mar moŋ hitte

tenj kerke kukeb yenj belej gab nurde gama irde hinayinj goyen momonj dirde hime gago,” yinyinj.*

³⁰ Be, Pol gobe ya kura Roma gabman belej unke gor henbe gagasim gagasim damu tenj hinhin. Gorbe dama iraw hikeyabe al belej kinninj yenj wanj hinhan. Irkeb yenj belej, “Iginge, wanj nenej hinayinj,” yinej hinhin. ³¹ Irkeb kafuram monj Al Kurunj belej dirnenj wenj doyanj yird yird mataya Doyanj Al Kurunj Yesu Kristu ninj tagalde saba yirde hinhin. Irkeb metenj tenj hinhin goyen al kura belej utanj irtek ma hirinj.

* **28:28-29:** Asanj hoyandeb gahade hi: 29 Irkeb al buda kurunj gob bur yenj kunj henyabe Pol mere tiyyinj goke yingenj ulinj kadam mohonde tiyaminj.

**Al Kurunyen Mere Igin
The New Testament in the Gwahatike Language of
Papua New Guinea
Nupela Testamen long tok ples Gwahatike long
Nuigini**

copyright © 2000 Wycliffe Bible Translators, Inc.

Language: Gwahatike

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-10

PDF generated using Haiola and XeLaTeX on 3 Mar 2023 from source files dated 9 Oct 2020

dbba218f-41f3-5f08-b0b6-2a7c919093ab